

Dill' wen dill' kob daa bzej Matewa'

*Dii xoxcto' Jesucrístona'
(Lc. 3:23-38)*

¹ Dga cho'en dill' nan Jesucrístona' nake' xiiñ dia che dii Davina' na' dii Abrahama'.

² Abrahama' goke' xa Isaaca', na' Isaaca' goke' xa Jacoba', na' Jacoba' goke' xa Judána' len beñ' bisheeka'. ³ Na' Judána' goke' xa Fáreza' len Zárana', na' xñeeka' wlie' Tamar. Na' Fáreza' goke' xa Esróma', na' Esróma' goke' xa Arama'. ⁴ Na' Arama' goke' xa Aminadaba', na' Aminadaba' goke' xa Naasónna', na' Naasónna' goke' xa Salmónna'. ⁵ Na' Salmónna' len Rahaba' gokgake' xaxña' Booza'. Na' Booza' goke' xa Obeda' na' xñeena' wlie' Rut. Na' Obeda' goke' xa Isaína'. ⁶ Na' Isaína' goke' xa Davina', na' Davina' goke' xa Salomónna'. Na' xña' Salomónna', beena' bikaa Davina', goke' xool dii Uríaza'.

⁷ Na' Salomónna' goke' xa Roboama', na' Roboama' goke' xa Abíaza', na' Abíaza' goke' xa Ásana'. ⁸ Na' Ásana' goke' xa Josafata', na' Josafata' goke' xa Jorama', na' Jorama' goke' xa Uzíaza'. ⁹ Na' Uzíaza' goke' xa Jotama', na' Jotama' goke' xa Acaza', na' Acaza' goke' xa Ezequíaza'. ¹⁰ Na' Ezequíaza' goke' xa Manaséza', na' Manaséza' goke' xa Amónna', na' Amónna' goke' xa Josíaza'. ¹¹ Na' Josíaza' goke' xa Jeconíaza' len beñ' bisheeka',

legaken' zoa kana' bche'byen ben' Babilóniaka' ben' Israelka' lalle'ka'.

¹² Na' shlak ni zoagake' Babilóniana' golj Salatiela' xiin Jeconíaza', na' Salatiela' goke' xa Zorobabela'. ¹³ Na' Zorobabela' goke' xa Abiuda', na' Abiuda' goke' xa Eliaquima', na' Eliaquima' goke' xa Azora'. ¹⁴ Na' Azora' goke' xa Sadoca', na' Sadoca' goke' xa Aquima', na' Aquima' goke' xa Eliuda'. ¹⁵ Na' Eliuda' goke' xa Eleazara', na' Eleazara' goke' xa Matánna', na' Matánna' goke' xa Jacoba'. ¹⁶ Na' Jacoba' goke' xa Joséna' ben' che Maríana', xna' Jesúza', beena' lekzka' nsi'gake' Cristo.

¹⁷ Na' ka' gok wzoa shda' diaka' wzololenzan dii Abrahama' na' biyoll-lenan dii Davina'. Na' wde zi shda' diaka' bizzololenan dii Davina' axt ka bche'byengake' ben' Israelka' Babilóniana'. Na' wizak zi shda' diaka' bizzolon ka bche'byengake' legake' Babilóniana' axt ka wzoa Crístona', beena' bsel' Chioza' inabi'e.

Ka golj Jesúza'
(Lc. 2:1-7)

¹⁸ Ki gok ka golj Jesucrístona': Xnee Maríana' ba nakan ikaa Joséna'ne', na' ka zi' soalene'ne' bi'e, la' Espíritu Santo che Chioza' bene' kwenche bi'e. ¹⁹ Na' Joséna' beena' ba nakan ikeene', nake' to ben' chon ka cheeni Chioza', na' daa bi goklallee wsi'e Maríana' yel' zto' gokile' choonlalleene' ka kono gakbe'i. ²⁰ Na' shlak chza'lallee gone' dga, to anjl che Xancho Chioza' bli'lawe' le' lo bishgal che'na', na' chi'ene':

—José, xiin dia che dii Daví, bi illebo' ikoo Maríana' daa ba no'e, la' Espíritu Sántona' bene'

kwenche bi'e. ²¹ Na' sane' to bi' byodo' na' wsi'ob' Jesús, la' leban' yislab' ben' yell cheb'ka' lao saaxya che'ka' kwenche bi kwiayi'gake'.

²² Gok yog' diiki kwenche gok ka wna dii beena' wdixjee daa goll Chioza'ne', chi'e:

²³ To nool wew' wee, na' sane' to bi' byodo', na' wsi'gake'b' Emanuel.

Na' Emanuel zevin: Chioza' zoalene' cho'.

²⁴ Na' ka biban Joséna', bene' kon ka goll anjl che Xancho Chioza'ne' na' wkee Maríana'. ²⁵ Na' bi wdelle'ne' axt ki wxanche' bi'do'na', na' bsi'eb' Jesús.

2

Wyaj ben' sin'ka' jawiagake' Jesúza'

¹ Jesúza' golje' yell Belénna', daa lia gana' mbani Judeana', kana' chnabia' Heródeza'. Na'ch bal' ben' sin', ben' nsed che beljka', za'gake' ka de gana' chla'lə wbilla', bllintegake' Jerusalénna'. ² Na' che'gake':

—¿Gani rey che ben' Israelka', bi'na' ba golj? Nezinto' ba goljb' la' ka de gana' chla'lə wbilla' ble'into' to belj dii bzajniin neto' nan ba goljb', daan ba za'nto' kwenche we'la'onto'b'.

³ Na' ka beni Heródeza' daa wngake', gokshejlallee, na' lekzka' yog'lol ben' Jerusalénka'. ⁴ Na'ch Heródeza' goxe' yog'lol bxo'zka' chnabia', na' ben'ka' chli' chsedi ley che dii Moiséza', na' wnabile' legake' gan chiyal' galj Crístona', beena' wsel' Chioza' inabi'e. ⁵ Na'ch gollgake'ne':

—Yell Belénna' daa mbani Judeanan' galje', la' kan' bzej to ben' wdixjee daa goll Chioza'le', chi'e:

6 Na' li', yell Belén llio' gani mbani Judeani,
aga inacho nako' dii liizelozi bibi zakii ladj yellka'
zakii llia Judeani;

la' lawo'ni ichej to ben' inabi'e,

na' gap wwie' ben' Israelka', ben'ka' nak yell cha'.

7 Na'ch Heródeza', ka kono gokbe'zi goxe' ben'
sin'ka' na' wñabile' legake' batyen'an ble'gakile'
belja'. 8 Na'ch bselee legake' Belénna' na' golle'
legake':

—Li shaj, na' li lljadiljyoll bi'do'na', na' kat'
yillelileb' na' yidnale nad' kwenche len' sha'
lje'lawaab'.

9 Na' ka biyoll goll Heródeza' ka', na'ch wza'gake'.
Na' belja' daa ble'gakile' kana' zi' sa'gake', zejan
xan yabana' llialon lawe'ka', na' ka bllinan gana'
zoa bi'do'na', na' na'zə wzoan. 10 Na' ka bizle'i ben'
sin'ka' belja', le bibagakile'. 11 Na'ch ka wyoogake'
loo yoona' ble'gakile' bi'do'na' len xna'b' Maríana'.
Na'ch bchek' xibe'ka' na' be'la'ogake'b'. Na' wlej-
gake' or, na' yal zix, na' lekzka' len nill' che to yag
dii chla' zix daa le mirra, na' be'gake'n cheb'. 12 Ka
biyoll be'la'ogake'b', Chioza' bsi'nile' legake' lo yel
bishgal che'ka' kwenche bich yidegake' gana' zoa
Heródeza'. Daan, bikaagake' nez yoblə ziyajgake'
lalle'ka'.

Bxonjgake' wza'gake' Egíptona'

13 Ka wde biza' ben' sin'ka', to anjl che Xancho
Chioza' bli'lawe' Joséna' lo bishgal che'na' chi'ene':

—Wyas, na' bche' bdo'na' len xna'baa na' li
shaj gana' mbani Egíptona'. Na' na'z soale axt
kat'ch inia' li' yiza'le. La' Heródeza' yiyilje' bdo'na'
kwenche wite'b'.

14 Na'ch lii wyaste Joséna' na' bchi'e bdo'na' len xna'baa, na' wal-lə wza'gake' zejłengake'b' gana' mbani Egíptona'. 15 Na' wzoagake' na'zə axt ka bllin lla wit Heródeza'. Na' daa gok ka', gok ka goll Xancho Chioza' to ben' wdixjee daa golle'ne', kana' wne': “Nad' binia' bi' cha'na' kwenche biza'b' gana' mbani Egíptona'.”

Ben Heródeza' mandad witgake' bi'do'ka'

16 Na' ka gokbe'i Heródeza' bi ben ben' sin'ka' ka golle' legake', le blee. Na' bene' mandad witgake' yog'lol'bi' byodo'ka' lle' yell Belénna' len yellka' ndil nllagan, bdo' cheenka' axt bi' chop yizi, bsakee ka to yizka' ba gok ble'i ben' sin'ka' belja'. 17 Na' daa bengake' ka', gok daa wna dii Jeremíaza', beena' wdixjee daa goll Chioza' le', ka wne':

18 Kwe' wbell na' gakyeshii ben'ka' lle' yella' le Ramá.

Noolka' nak xiin dia che dii Raquela' ni to kono cheengakile' gonxenlall' legake', daa wit bi'do' che'ka'.

19 Na'ch ka wde wit Heródeza', to anjl che Xancho Chioza' bli'lawe' Joséna' lo yel bishgal che'na' shlak ni zoe' Egíptona', na' chi'ene':

20 —Wyas, biche' bi'do'na' len xna'baa na' li yiyaj gana' mbani Israela', la' ba wit ben'ka' cheengakile' witgake'b'.

21 Na'ch wyas Joséna' na' bichi'e bi'do'na' len xna'baa na' biyajgake' gana' mbani Israela'. 22 Na' ka wnezi Joséna' Arquelawa' ba chnabi'e lo laz dii xe' Heródeza', na' bllibe' yiyajgake' Judéana'. Na' Chioza' wdixje'ile'ne' lo yel bishgal che'na' yiyajgake' gana' mbani Galileana'. 23 Na' ka billingake'

Galileana' jazoagake' yell Nazareta'. Na' daa jazoagake' na', gok ka wna dii beṅ'ka' wdixjee daa goll Chioza' legake' kani'yi che Jesúsza', wngake' wsi'gake'ne' beṅ' Nazaret.

3

Juanna', beena' bchoa beṅ' nisa'

(Mr. 1:1-8; Lc. 3:1-9, 15-17; Jn. 1:19-28)

¹ Na' do kana', Juan, beena' bchoa beṅ' nisa', wyaje' to latj gana' bibi chashj chleb gana' mbani Judeana', na' wdixje'ile' beṅ'ka' chdi'a chllag na',
² chi'e:

—Li yiyaj yileni dii malka' chonle, la' ba bllin lla inabia' Chioza', beena' zoa yabana', loo yichjlall'do'lena'.

³ Na' dii Isaíaza', beena' wdixjee daa goll Chioza'ne', wne' che Juanna':

To beṅ' gosyee to lo latj ga bibi chashj chleb, na' ine':

“Li se kwas wzenagle che Xanchona' na' wsalj yichjlall'do'leka' kat' zee.”

⁴ Na' Juanna' bene' xe'na' de xa kamey, na' nchej lsineena' to yid. Na' wdawe' bish'zo len shin baser daa de lyixaa. ⁵ Na' beṅ'ka' lle' yell Jerusalénna', na' doxen gana' mbani Judeana' na' yellka' llia gaoz yao Jordánna' jazenaggake' dillaa cho'e. ⁶ Na' bixoadol'gake' saaxya che'ka', na' bchoa Juanna' legake' nisa' loo yao Jordánna'.

⁷ Na' ka ble'i Juanna' zan fariseoka' na' saduceoka' bllingake' lawe'na' kwenche wchoe' legake' nisa', na' golle' legake':

—¡Le' naklikzle ka bel znia! ¿Achakile wak wxonjile' yel' zak'zi' daa wsel' Chioza'? ⁸ Li gon

ka gakbe'i ben' nan dii li ba biyaj bilenile. ⁹ Na' bi gakkzile bibi yel' zak'zi' ile'ile daa inazle: “Neto' naknto' xiin dia che dii Abrahama.” Dii li nia' le', axt yajki wak gon Chioza' xiin dia che dii Abrahama'. ¹⁰ Yog'lol-le shi bi chonle ka chiyoolallii Chioza' na' gak chele ka chak che to yag dii chbia dii zix dii bi chak wen, na' lii chchogtegage' axt xanin na' chzal'gake'n lo yi'na'. ¹¹ Dii li nad' chchoa' le' nisa' daa chiyaj chilenile, per beena' zi' za' kol-laana' napche' yel' wak xench ka nad', na' ni bi zaka' gag' xmore' kwenche galj' xele'na'. Len' gone' ka yidsoa Espiritu Sántona' loo yichjlall'do'lena', ka le' chiyaj chilenile', na' ben'ka' bi chiyaj chileni wzalee legake' lo yi' gabila'. ¹² Na' gone' che ben' yell-lioni ka chon beena' nox' yag xozaa daa chpa'ile' trigona' na' kooshawee trigona' na' wzeye' beb cheyinna' lo yi'na' daa biga yiyolkzə.

Jesúza' wchoe' nisa'

(Mr. 1:9-11; Lc. 3:21-22; Jn 1:31-34)

¹³ Na'ch wza' Jesúza' gana' mbani Galileana' wyaje' cho'a yao Jordánna' kwenche wchoa Juanna'ne' nisa'. ¹⁴ Na' ka blline', bi nan cheeni Juanna' wchoe'ne' nisa', san chi'ene':

—Li'lan chiyal' wcho' nad' nisa', na' li'lə za'zo' kwenche wchoa' li' nisa'.

¹⁵ Per Jesúza' golle'ne':

—Ben goklen bchoa' nad' nisa' la' chiyal' goncho ka nak daa nllia Chioza' bia' goncho. Na'ch bchoe'ne' nisa'.

¹⁶ Na' kon ka biyoll bchoe'ne' nisa' lii bichejte Jesúza' loo nisa' na' lii byaljte yabana' na' ble'ile'

Espírítu che Chioza' chetje' ka to palom na' jsoa-lene' le'. ¹⁷ Na'ch bengakile' shii Chioza' zoa ya-bana' chi'e:

—Beenin nake' Xiin', beena' chakid', na' le chibaid' le'.

4

Goki dii xiwaa gonan ka wzenag Jesúza' cheyin
(Mr. 1:12-13; Lc. 4:1-13)

¹ Na'ch Espírítu che Chioza' bchi'e Jesúza' to latj ga bibi chashj chleb na' dii xiwaa goklalliin kooyela'n le' gone' ka cheenin.

² Na' ka wde choa lla choa yel bibi wdawe', na' wdone'. ³ Na'ch bllin dii xiwaa kwite'na' gollan le':

—Shi leilo' nako' Xiin' Chios, ben ka yiyak yajki yetxtil.

⁴ Na'ch goll Jesúza':

—Cho'a xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban.”

⁵ Na'ch dii xiwaa bche'n le' Jerusalénna' daa nak yell che Chioza' na' blepán le' yichj yoodo'na' gana' nak sib wal. ⁶ Na'ch gollan le':

—Shi leilo' nako' Xiin' Chios, lla bixit'shki ni. La' Cho'a Xtill' Chioza' nan:

Wselee anjl che'ka' gap wwiagake' li',

na' gox'gake' li' kwenche ki koo wchewo' yajka'.

⁷ Na' goll Jesúza' len:

—Lekzka' na Cho'a Xtill' Chioza': “Bi wzo' Chioza' gone' daa nazan cho' kwenchezə xenlalloo shi gone' ka ba wne'.”

⁸ Na'ch stokzə bizche' dii xiwaane' to lo yaa sib wal na' bliin le' yog' yellka' lle' yell-lioni na' yel' zakii cheyinka'. ⁹ Na' gollan le':

—Yog' diiki chle'ilo' gon' li' shi wchek' xibo'na' we'lawoo nad'.

¹⁰ Na'ch goll Jesúza' len:

—Biyaj, Satanás, la' Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

¹¹ Na'ch biza' dii xiwaa kwit Jesúza' na' bllin bal anjlka' be'gake'ne' kon bi byalljile'.

Wzolo Jesúza' choe' cho'a xtill' Chioza' gana' mbani Galileana'

(Mr. 1:14-15; Lc. 4:14-15; 5:1-11; 6:17-19)

¹² Ka beni Jesúza' wloogake' Juanna' lillyana', bizee biyaje' gana' mbani Galileana'. ¹³ Na' bizee yell Nazareta' na' jazoe' yell Capernaúma', to yell xen dii llia cho'a niso'na' gana' mbani yell-lío che dia che dii Zabulónna' na' dii Neftalína'. ¹⁴ Na' daa jazoe' na', gok ka wna dii Isaíaza', beena' wdixjee daa goll Chioza'ne', daa wne':

¹⁵ Ka nak yell-lío daa naki che dia che dii Zabulónna' na' dii Neftalína',

daa llia shlaa yao Jordánna',
gana' xoa nez daa zej cho'a niso'na'

daa llia gana' mbani Galileana',

gana' lle' zan ben'ka' bi nak ben' Israel,

¹⁶ ben'ka' lle' na' gok yichjlall'do'eka' shgasj shchol,
na' Chioza' ba bselee to beeni' xen lawe'ka'.

Lao ben'ka' lle' gana' chnabia' yel' wita'

ba chzeeni' beeni' che Chioza'.

¹⁷ Na' wzolo Jesúza' chyixje'ile' ben' cho'a xtill' Chioza', chi'e:

—Li yiyaj yileni dii malka' chonle, la' ba bllin lla Chioza', beena' zoa yabana', inabi'e loo yichjlall'do'lena'.

Wlej Jesúza' tap beṅ' wxen beḷ kwenche gongake'ne'txen

(Mr. 1:16-20; Lc. 5:1-11)

¹⁸ Na' ka zej Jesúza' cho'a nido' che Galileana' ble'ile' chop bish' beṅ' wxen beḷ chzal'gake' yixja' loo nisa' chzengake' beḷa'. Toe' le Simón na' lekzka' nsi'gake'ne' Pedro, na' beena' sto lie' Andrés. ¹⁹ Na'ch Jesúza' chi'e legake':

—Li da, dino nad', na' kon ka chonle naa chbejle beḷki loo nisi, ka'kzan gonle yibejle beṅ' lao dii mala'.

²⁰ Na' ka golle' legake' ka', lii bkwaan'tegake' yixj che'ka' na' zejlengake'ne'.

²¹ Na' zi lat'chga wza'gake' bizle'i Jesúza' zi chop bish' beṅ', beena' to lie' Jacobo na' beena' sto lie' Juan, beṅ'ka' nak xiin Zebedewa', lle'gake' to loo barkw chiyonshao'gake' yixja' daa chzengakile' beḷka'. Na' lekzka' goll Jesúza' Jacóbona' len Juanna' shajlengake'ne'. ²² Na' lii bkwaan'tegake' barkwa' len xe'ka' na' janogake' Jesúza'.

Jesúza' chli' chsedile' beṅ' zan

(Lc. 6:17-19)

²³ Na' wda Jesúza' yog' yellka' llia doxen gana' mbani Galileana', chli' chsedile' beṅ' Israelka' gana' chdop chllaggake' choe'lwillgake' Chioza', cho'e dill' wen dill' kob che yel' wṅabia' che Chioza', na' biyone' yog' beṅ' che'i wde wdeli yillwe'.

²⁴ Na' doxen gana' mbani Síriana' wze dill' daa chon Jesúza', na' jwa'gake' yog'lol beṅ'ka' che'i

wde wdeli yillwe', ben' chey chla, ben' yoo dii xiw', ben' chaz shon, na' ben' net ni'a nee. Na' Jesúza' biyone' legake'. ²⁵ Na' ben' zan inleeb jano le', ben'ka' lle' yellka' mbani Galileana' na' yellka' mbani Decápoliza', na' ben'ka' lle' yell Jerusalénna' na' yellka' sto mbani Judeana', na' ben'ka' lle' yellka' llia shlaa yao Jordánna'.

5

Dill'ka' be' Jesúza' lo yaana'

¹ Ka ble'i Jesúza' ben' zan ba nogake'ne', na'ch wyepe' to lo yaa, na' wchi'e. Na'ch ben'ka' nakgake'ne' txen jabig'gake' kwite'na'. ² Na' wzolo Jesúza' chli' chsedile' legake', chi'e:

Ben'ka' zoa mbalaz (Lc 6:20-23)

³—Chakomba ben'ka' chakbe'gakile' chyalljgake' ile' gaklen Chioza' legake', la' legaken' yillingake' yabana' gana' chñabia' Chioza'.

⁴ 'Chakomba ben'ka' chbellyesh', la' Chioza' yizoe' legake' mbalaz.

⁵ 'Chakomba ben'ka' nak ben' gaxjlall', la' wllin lla Chioza' wi'e legake' yell-lioni.

⁶ 'Chakomba ben'ka' chzelall' gake' ben' li ben' shao', la' Chioza' ine' nakgake' ben' wen lawe'na'.

⁷ 'Chakomba ben'ka' chiyeshii ben', la' ka'kzə yiyeshii Chioza' legake'.

⁸ 'Chakomba ben'ka' nxi nyech yichjlall'do'eka', la' legaken' ile'gakile' Chioza'.

⁹ 'Chakomba ben'ka' chon to dii byen soalen ljwellgake' mbalaz, la' ina ben' dii likzan nakgake' xiin Chios.

¹⁰ 'Chakomba ben'ka' chiya dii chen chle'i daa chongake' ka cheeni Chioza', la' legaken' yillingake' gana' chnabi'e.

¹¹ 'Chakomba le' kat' chiya dii na ben' chele na' chiya dii chongakile' le', na' kat'ka' chiyiljall'gake' bittezə dill' wxiye' chele daa chonlilall'le nad'. ¹² Li yiba yizaki, la' yabana' gaple to dii wen dii shao'. La' ka chongakile' le' naa, ka'kzan bchi' bsak'gake' kani'yi dii ben'ka' wdixjee daa goll Chioza' legake'.

Nakle ka zed' na' ka beeni'
(Mr. 9:50; Lc. 14:34-35)

¹³ 'Len' nakle ka zedaa ladj ben' yell-lioki. Zedaa, shi bich zxi'n, aga wakch yiyonchon zxi' ni bich gak wchinchon, na' chchoonchon gana' wlej wshoshj ben' len.

¹⁴ 'Len' nakle ka to beeni' ladj ben' yell-lioki. To yell dii llia to lo yaa, zit'lə nla'n, na' bi ngashaan.

¹⁵ Ni biga zoa to ben' chxene' kandila' na' chdose'n to dii wkwashaan len, san chzoe'n sibə kwenche wzeeni'n doxen loo yoon'. ¹⁶ Ka'kzan le', li gon to dii byen gonle daa nak wen kwenche ile'i ben' na' we'la'ogake' Xacho Chioza' zoa yabana'.

Jesúza' cho'e dill' che ley che dii Moiséza'

¹⁷ 'Bi gatzile bid' kwenche yikwas' ley daa bzej dii Moisézan' wa daa bli' bsemi dii ben'ka' wdixjee daa goll Chioza' legaken'. Bi nakan ka', san bid' kwenche yiyoll gak yog'lol ka na leya' na' daa bli' bsemi ben'ka' wdixjee daa goll Chioza' legake'. ¹⁸ Dii li nia' le', shlak bin' te che yabana' len yell-lioni,

bi init ni shcho'a dill' daa nllia ley che Chioza' bia' gak, axt ki gakch yog'lol daa bllie' bia' gak. ¹⁹ Daan, nottezə ben' chyishje' to daa nllia Chioza' bia' goncho, la'kzi dii bi llialotek, na' shi wliile' ben' yoblə gone' ka chone', bitek bi zakee yabana' gana' chnabia' Chioza'. San beena' gon daa nllia Chioza' bia' goncho na' wliile' ben' yoblə gone'n, beenan' gake' to ben' zakii yabana' gana' chnabia' Chioza'. ²⁰ Na' nia' le', aga wak yillinle gana' zoa Chioza' chnabi'e shi toz ka chonlenle fariseoka' na' ben'ka' chli' chsedi leya', chiya' wzenagchle che Chioza' aga ka legake'.

*Bi chiya' wito ben'
(Lc. 12:57-59)*

²¹ Na' lekzka' che' Jesúza' legake':

—Nezkzile goll dii Moiséza' dii xozxto'choka': “Bi chiya' wito ben'. La' beena' wit to ben' chiya' guete' daa bene' ka'.” ²² Per nad' nia' le', nottez beena' chllée bish' ljwelle'na' chidolee tie' lo yel' zak'zi'na'. Na' lekzka' beena' chzoazi'yee bish' ljwelle'na', ben'ka' chnabia' chiya' wwiagake' nak gongake' che'; na' beena' chnie' bish' ljwelle'na' dill' zibia', chidolee wzal' Chioza' le' lo yi' gabila'.

²³ 'Daan, shi ka zjoo daa chzanilo' wi'o Chioza' na' ka illino' gana' chzeygake'n lljadinilo' ngoolall' to bish' ljwello'na' li', ²⁴ na'z bkwaan daa noxoo, zigaate chiya' lljaye'xeno' bish' ljwello'na', na'tech wak wi'o Chioza' daa chzanilo' wi'one'.

²⁵ 'Shi no cheeni lljtao xya cho' lao joschiska', ben byen yiyoe'xeno'ne' shlak ni de xlatjin. La' shi ba bllino' lao beena' wchogbia' cho', na' gone' li' lo na' beena' wseje' li' lillyana'. ²⁶ Dii li nia' li', aga

wibeje' li' lillyana' axt ki chixjo' doxen daa chiyał' chixjo'.

Bi chiyał' inelen ljuwell beñ'

²⁷ 'Nezkzile wna dii Moiséza': "Bi chiyał' ineleno' nool bi nak nool cho'." ²⁸ San nad' nia' le', nottez beena' chwia to noolə na' chza'lalleene' loo yichjlall'do'ena', daa chone' ka' ba benkze' ka chon beena' zoate xoole'na' na' chnelene' nool yoblə.

²⁹ 'Shi jalawo' de shlina' chonan ka gono' dii mala', naklan wen wtołjo'n na' chooño'n. La' wenchan soa tlaaz jalawo'na' aga ka daa yiyaj doxentio' lo yi' gabiła'. ³⁰ Na' shi noo de shlina' chonan ka gono' dii mala', naklan wen wchogo'n na' chooño'n, la' wenchan soa tlaaz noona' aga ka daa yiyaj doxentio' lo yi' gabiła'.

*Bi nakan wen yilaa beñ'ka' nshagna'
(Mt. 19:9; Mr. 10:11-12; Lc. 16:18)*

³¹ 'Nezkzile wna dii Moiséza': "Nottez beena' yilaa nool che'na' chiyał' chas to yish we'n dill' nan bilaagake'." ³² San nad' nia' le' shi to beñ' byo yilee xoole'na' la'kzi xoole'na' bi chnelene' beñ' yoblə, daa yileene' chone' ka yikaa noola' beñ' yoblə na' gake' ka to noolə zoalentie' beñ' che'na' na' chnelene' beñ' yoblə. Na' beena' yikee noola' nlaa beñ' che'na', lekzka' chone' ka chon beena' chnelen xool beñ' yoblə.

Bibi wzoacho de taschiw kat' bin wchebcho

³³ 'Lekzka' nezkzile golle' dii xozxto'leka': "Bi wk-waanzo' ka'zə daa ba bchebo' lao Xancho Chioza' shi bzoatio' bi bzo' de taschiw." ³⁴ San nad' nia' le', bibi wzoale de taschiw kat' wcheble lao Chioza'. Bi wzoazle yabana' de taschiw, la' yabana' nakan

gana' zoa Chioza'. ³⁵ Na' ni bi wzoale yell-lioni de taschiw, la' nakan ka gana' nzoa ni'a Chioza'; na' ni Jerusalénna', la' lennan' yell che beena' chnabia' doxen. ³⁶ Na' ni bi wzoazle yichjléna' de taschiw, la' aga wak gonle ka yiyak ni to yish' yichjléna' yish' bez' shi nakan dii gasj wa gonle ka yiyakan dii gasj shi nakan yish' bez'. ³⁷ San kon inale “wakan” wa inale “bi gakan”, la' shi chzoale de taschiw bichlə wa nochlə, dii malan' chonan chonle ka'.

Chiyal' gakicho ben'

(Lc. 6:29-30)

³⁸ Lekzka' nezkzile' wna dii Moiséza': “Shi to ben' wshoshje' tlaa jalawo'na' lekzka' yiyono' che'. Na' shi to ben' wxope' leyo'na', lekzka' yixopo' leye'na'.” ³⁹ San nad' nia' le': Bi yizi'o wzon che ben' mala'. Shi no kap' xagoona' tlaa, bi'e daa zi shlaa. ⁴⁰ Shi to ben' chbagoo dii chbagoo che' na' cheenile' ikee xkamiso'na', be'shaze' lente daa nxa kolloona'. ⁴¹ Na' shi to ben' wwee li' yoa' che'na' na' gone' byen woon to kilómetro, wza'lentegan chop kilómetro. ⁴² Na' nottezə ben' shi bi inabe' cho', be'n. Na' shi no inabi li' wi'one' shloll bi de cho', bi wllonilo'ne'n.

Chiyal' gakicho ben'ka' chakzbangakile' cho'

(Lc. 6:27-28, 32-36)

⁴³ 'Na' lekzka' nezile' wnagake': “Goki bish' ljwello'na' na' bwiyi ben'ka' chakzi' chakzbangakile' li'.” ⁴⁴ San nad' nia' le': Li' gaki ben'ka' chakzbangakile' le', li' inabi Chioza' gak wen che ben'ka' chsak'zi'gake' le'. ⁴⁵ Shi gonle ka', na'ch inezi ben' nakle xiin Xacho Chioza', beena' zoa yabana'. La' le' chone' ka chla' wbillā' lao ben'

mal na' lao beṅ' wen, na' chone' ka chak yeja' lao beṅ' chon wen na' lao beṅ' chon mal. ⁴⁶ Na' shi to beṅ'ka' nllagzile chakile, aga bi zjanayin, la' ka'klen chon beṅ' wiḥixjka' beṅ'ka' chakile le beṅ' mal nakgake'. ⁴⁷ Na' shi to beṅ'ka' nllagzile chwaple chiox, ¿garan de dii wenna' chonle? La' ka'klen chon beṅ'ka' bi nombia'gake' Chioza'. ⁴⁸ Li gak dowalj beṅ' li beṅ' shao' ka nak Xacho Chioza' zoa yabana', nake' dowalj beṅ' li beṅ' shao'.

6

Chiyal' gakencho beṅ'

¹ 'Bi wli' wzez chele ladj beṅ' nan nakle beṅ' wen. La' shi kwenchezə ile'i beṅaan chonle daa nak wen, bibi laxjle gon Xacho Chioza', beena' zoa yabana'. ² Na' kat' chaklenle beṅ'ka' chyallj chḥini, bi wzelen dill', ka chon beṅ' wxiye'ka' gana' chdop chllagcho choe'lwillcho Chioza', wa do yawi nez. Choe'gake' dill' che daa chongake' kwenche we'la'o beṅ' legake'. Dii li nia' le', daa choe'la'o beṅ' legake', lennan' laxje'ka'. ³ San le', kat' choe'le beṅ' bi dii choe'lene', bi gonlen ka ile'i beṅ'. Na' ni to beṅ' bi ye'lene' bin chonle. ⁴ San li gaken beṅ' ka kono gakbe'i. Na' Xachona', beena' chen chle'i daa chonle, gone' laxjle.

Ka chiyal' we'lwillcho Chioza'

(Lc. 11:2-4)

⁵ Na' kat' choe'lwill-le Chioza', bi gonle ka beṅ' wxiye'ka'. Legake' chooll'gake' sechagake' we'lwillgake' Chioza' gana' chdop chllagcho choe'lwillchone' wa ga lle' lla' beṅ' kwenche ile'gakile' ka chongake'. Dii li nia' le', daa chle'i

ben' ka chongake', lezannan' laxje'ka'. ⁶ San le', kat' we'lwill-le Chioza', li yiyoo loo lill-lena' na' li wsej puerta', na' li we'lwill Xachona', beena' kono chle'i. Na'ch Xachona', beena' chen chle'i daa chonle, gone' laxjle.

⁷ 'Na' kat' choe'lwill-le Chioza' aga lilezi dill'ka' inale ka chon ben'ka' bi nombia'gake'ne', la' chakgakile' daa choe'gake' dill' zan na' wzenague' bin che'gake'ne'. ⁸ Bi gonle ka chongake', la' Xacho Chioza' ba nezkzile' bi daa chyalljile ka zi' inablalen.

⁹ Kat' we'lwill-le Chioza', kin inale:

Xanto' Chios, ben' zoa yaba,
we'la'oshga yog'lol ben' li'.

¹⁰ Na' inabia'gacho' loo yichjlall'do' yog'lol ben',
kwenche gak lo yell-lioni ka chaklalloo, ka chak yabana'.

¹¹ Ka nak daa chono' cheej chaonto' yog' lla,
bengachan naanlla.

¹² Wxi'xen chento', ka chon neto' chzi'xennto' bit-tezə dii choni ben' neto'.

¹³ Bi we'gacho' latj ibixnto' gonnto' daa bi nak wen,
san bislagach neto' lo ni'a na' dii mala'.

La' lin' napo' yel' wnabia', na' yel' wak, na' lin' chido_{oo} shoo balaan xen zejli kani. Kan' nakan.

¹⁴ 'La' shi le' chzi'xenle che ben' shi bi chongakile' le', ka'kzə Xacho Chioza' zoa yabana' si'xene' chele. ¹⁵ San shi le' bi chzi'xen che ljwell-le, ka'kzə Chioza', beena' nak Xale, bi si'xene' dii malka' chonle.

Daa chiyal' goncho kat' zoacho wbas'

¹⁶ 'Kat' zoale wbas', bi gonzle cho'alaolena' nyesh' ka chon ben' wxiye'ka', la' legake' chon

cho'alawe'ka' nyesh' kwenche gakbe'i ben' bi neej naogake'. Dii li nia' le', daa gakbe'i ben' daa chongake', lezannan' laxje'ka'. ¹⁷ San le', kat' soale wbas', li wpaa yichjlana' na' li chib li wxis cho'alaolena' ¹⁸ kwenche bi gakbe'i ben' nan zoale wbas'. San toz Xacho Chioza', beena' kono chle'i, ile'ile' daa chonle na' gone' laxjle.

Yel' shawaa daa de yabana'

(Lc. 12:33-34)

¹⁹ 'Bi wtop wshagle yel' wni'ana' yell-lioni, la' bal diika' chaljan baka' chliayi'gakban, na' balan chibia leyin na' chbiayi'gakan, wa choo wbanka' na' chkaagake'n. ²⁰ San li gon ka gat' yel' shao' chele yabana', la' daa de yabana' bi galjan bado' wliayi'ban, ni bi yibia leyin, ni bi gak sho' wbanna' ikeen. ²¹ La' gana' de yel' shao' chelena', na'kzan se yichjlall'do'lana' wneyi.

Jalaochoki nakgakan beeni' che kwerp chechoni

(Lc. 11:34-36)

²² 'Jalaochoki nakgakan beeni' che kwerp chechoni. Shi jalaochoki chle'gakin kwaslo', doxen kwerp chechoni zoan lo beeni'na'. ²³ Per shi bi chle'i jalaochoki, kwerp chechoni zoan lo yel chol'a'. Ka'kzan chak che yichjlall'do'choni. Shi bi chzenagcho che Chioza', ncholi yichjlall'do'choni.

Aga wak goncho yel' wni'ana' txen na' lezkka' gontecho Chioza' txen

(Lc. 16:13)

²⁴ 'Aga ga zoa to ben' wlane' xshin chop ben', la' wakzbanile' beena' to, na' gakchile' beena' sto, wa gone' xshin beena' to do yichj do lallee na' xshin beena' sto gone'n do ki do lallee. Na' ka'kzan chak

checho len Chioza', aga wak goncho ka cheenile' shi we'techo latj in_uabia' yel' wni'ana' cho'.

Bi kwek yichjcho diika' chyalljicho
(Lc. 12:22-31)

²⁵ 'Daan nia' le': Bitek kwek yichjle daa yeej gaole kwenche ibanle, ni xalaanle. La' zak'techle yel' mban chechona' aga ka daa cheej chaocho, na' zak'tech kwerp chechona' aga ka xalaanchona'.
²⁶ Li wwiakachi byindo'ka' chda xan yabana', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Xacho Chioza' zoa yabana' legakb. ¿Alechlin le', zak'techle aga ka bado'ka' ze lo llazə? ²⁷ Na' ni tole bi gak yischooch yel' mban chelena' zi shloll la'kzi nall inleeb zele wneyi cheyin.

²⁸ 'Na' ¿biche chi' yichjzle xalaanlena'? Wwiakachile ka chgol yejdo'ka' ze lyixaa, len aga bi llin chongakan ni bi cholgakan do. ²⁹ Per nia' le', ni dii Salomónna', beena' wdapchga yel' shao'ka', bi bllin gak xe'na' xochi ka yejdo'ka'.
³⁰ Na' shi Chioza' none' yejdo'ka' ze lyixaa xochi, la'kzi nakan de toldezə na'tech chtop ben' len na' chzeye'n, ¿alechla le', gontechle' wen chele gone' xalaanle la'kzi bitek chajle'le gaklene' le'? ³¹ Na' bi kwek yichjzle inazle: “¿Bin yeej gaocho?” wa “¿Nak goncho gat' xalaancho?” ³² La' ben'ka' bi nonlilall'gake' Chioza' to daazə chi' yichjgake'. Per Xachona', beena' zoa yabana', nezczile' chyalljile yog' diiki. ³³ Na' daa llialote chiya' wzenagle che Chioza' kwenche inabi'e le', na' gonle kon daa cheenile', na' gonkze' yog' daa chyalljile. ³⁴ Bitek

kwek yichjle shi wyaj wdele llaka' zi za' la' to to lla nsa' dii zed cheyin.

7

Bi chiyal' yiya yiyiljcho ben'

(Lc. 6:37-38, 41-42)

¹ 'Bi yiya yiyiljle ben', kwenche bi yiya yiyilj Chioza' le'. ² La' kon ka chiya chiyiljle ben', ka'kzan yiya yiyilj Chioza' le', na' kon ka gonile ben', ka'kzan goni Chioza' le'. ³ ¿Biche chwiazoo' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? ⁴ Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': "Ben'shki yibej' bicha' yoo loo jalawo'na'?" ⁵ ¡Ben' wxiye! Zigaate bwia cho'na' na'tech wwio' che bish' ljwello'na'.

⁶ 'Na' bi gonze byen we'lenle xtill' Chioza' ben'ka' bi chazlall'gake'n, kwenche ki gongakile' le' znia ka chon bekw'ka' chxoxj chtingakb kat' no chonlegakib. Ni bi we'lenle xtill' Chioza' ben'ka' bi cheengakile' wzenaggake'n kwenche ki wlej wshoshjgake' dillaa ka chon kushka' chlej chshoshjgakb daa bi choollall'gakb gaogakb.

Chiyal' inabicho Chioza' gaklene' cho'

(Lc. 11:9-13; 6:31)

⁷ 'Li inabi Chioza' bin cheenile na' gone'n. Li yiyilj daa cheenile na' yillelilen. Li ine cho'a puerta', na' wsalje'n. ⁸ La' beena' chnabile' ben' daa cheenile', we'kze'n; na' beena' chiyilje' daa cheenile', willekzile'n; na' beena' chne cho'a puerta', wsaljkgake' sho'e.

⁹ 'Le' zoa xiinle, shi inabib' le' to yetxtil aga we'leb' to yaj. ¹⁰ Wa shi inabib' le' to bel yaa, aga we'leb' to bel znia. ¹¹ Shi le' naktele ben' mal chak we'le xiinleka' daa nak dii wen, ¿alechli Xacho Chioza' zoa yabana' ki gone' le' dii wen dii shawaa shi inabilene'n?

¹² 'Kon ka cheenile goni ben' le', ka'kzan chiya' gonilene', la' kan' na leya' na' librka' bzej dii ben'ka' wdixjee daa goll Chioza' legake'.

Puert daa nak diido' yid
(Lc. 13:24)

¹³ 'Li gon byen sho'le cho'a puerta' daa nshop'. La' nlag' puerta' na' zlag' nak neza' daa zej gana' chbiayi' ben', na' ben' zan choogake'n. ¹⁴ Per ka nak neza' daa zej yabana' gana' lljazoalencho Chioza', nakan to nez les, na' to chopchga ben' chillelgakile'n.

Daa chbia lo yaga' chli'n bi yag daa
(Lc. 6:43-44)

¹⁵ 'Li wsak' kwenche bi shajle'le che ben'ka' chonz ka chyixjee daa che' Chioza' legake', na' chonz kwingake' ben' wen ben' gaxjlall', per ben' malzgakan na' chliayi'gake' ben', ka chon to ba znia. ¹⁶ Ka ile'ile ka nsa' chegake' na' gakbe'ile non nakgake'. La' nezkzile aga wishibcho uvana' to lo yag yesh' na' lekzka' aga wishibcho yixwewa' to lo yag yesh' yaa. ¹⁷ Ka'kzan yag wenna' chbian dii wen, na' yaga' daa bi nak wen chbian dii bi nak wen. ¹⁸ La' yaga' daa nak dii wen aga wbian dii bi nak wen, na' yaga' daa bi nak dii wen aga wbian dii nak wen. ¹⁹ Yog' yag dii chbia dii bi

nak wen, chchoggake'n na' chzeygake'n. ²⁰ Daan, wakbe'kzile ka nsa' che ben'ka'.

Aga yog' ben' yilline' yabana' gana' zoa Chioza' chnabi'e
(Lc. 13:25-27)

²¹ 'Aga yog' ben'ka' na nad': "Xan', Xan'", yillingake' yabana' gana' chnabia' Chioza', lete ben'ka' chongake' ka cheeni Xa' Chioza', beena' zoa yabana'. ²² Kat'ka' illin llana' yizia' kwent che ben', zangake' inagake' nad': "Xan', Xan', neto' wdixjeento' daa wno', na' kon yel' wak cho'na' bibejnto' dii xiw'ka' yoo ben' na' bennto' dii zan yel' wak." ²³ Na'ch yepgakee: "Biga bembia' le'. Li kwas ka'lə, le' ben' wen dii mal."

Chop ben' bengake' twejyoo
(Lc. 6:47-49; Mr. 1:22)

²⁴ 'Daan, nottez beena' chzenag cho'a xtilaani na' chone' ka nia', nake' ka to ben' sin', beena' ben lille'na' to lo yaj. ²⁵ Na' ka gok yejsiwaa, bgol yaoka', na' wzechga be'na' nan wllig'gakan yoonā', per bi billeen daa chi'cha leninna' lo yaja'. ²⁶ Per beena' cheni cho'a xtilaani na' bi chone' ka nia', nake' ka beena' bi chajni, beena' bxe lille'na' lo yoxa'. ²⁷ Na' ka gok yejsiwaa, bgol yaoka', na' wzechga be'na' na' bllig'gakan yoonā' na' wlliyi'tekzan.

²⁸ Na' ka biyoll be' Jesúsza' dillii, bibani ben'ka' ka chli' chsedile', ²⁹ daa bli' bsedile' legake' lega ben' za'len yel' wnabia', aga ka chli' chsedi ben'ka' chzajni legake' leya'.

8

Jesúza' biyone' to ben' che'i léprana'

(Mr. 1:40-45; Lc. 5:12-16)

¹ Na' ka biyetj Jesúza' lo yaana', ben' zan zino-gake'ne'. ² Na' kwite'na' bllin to ben' che'ile' lepra', na'ch b̄chek' xibe' lawe'na', chi'ene':

—X̄an', nezid' wak yikwaso' yillwe'ni chak' shel' gueenilo'.

³ Na'ch Jesúza' b̄xoā neena' yichje'na', chi'ene':

—Cheenid'x. Na' naate yikwasan'.

Na' kon ka golle' ka', lii biyakteyi beena'. ⁴ Na'ch che' Jesúza'ne':

—Ni to kono yoo ka nak daa ba ben' cho'. Lete wyaj lao b̄xoza' kwenche ile'ile' ba biyakilo', na' jwa' daa chiyal' lljoo lao Chioza' ka nllia dii Moiséza' bia' goncho kwenche inēzi ben' ba biyakilo'.

Biyon Jesúza' xmos x̄an soldadka'

(Lc. 7:1-10)

⁵ Ka billin Jesúza' yell Capernaúma' lii bllinte to x̄an soldad lawe'na', na' got'yoile'ne', ⁶ chi'ene':

—X̄an', xmosaa die' lillaa, na' net t̄laa kwerp che'na' na' le chey chle'.

⁷ Na'ch che' Jesúza'ne':

—Na' sa' yiyonee.

⁸ Na' che' x̄an soldadka'ne':

—X̄an', aga zakii nad' kwenche shoo loo yoo lillaa. Kon ben mandad yiyakile' na' wiyakkzile'.

⁹ Nia' ka' la' zoa ben' ch̄nabia' nad', na' nad' lekzka' ch̄nabia' soldad cha'ka'. Kat' chep' toe': “Wyaj ni”, na' chaje'; na' kat' chep' stoe': “Da ni”, na' chide'; na' kat' chizep' xmosaa: “Ben dga”, na' chone'n.

10 Ka beni Jesúza' cho'a xtilleena', bibanile' na' chi'e beṇ'ka' nogake' le':

—Dii li nia' le', bigaṇ' lltia' to beṇ' Israel beṇ' gonlilallee nad' ka chonlilall' beeni nad'. 11 Na' nad' nia' le', beṇ' zan beṇ' zaak doxen yellioni gonlilall'gake' nad' na' lljazoalengake' txen dii Abrahama', dii Isaaca' na' dii Jacoba' yabana' gana' chṇabia' Chioza'. 12 Na' ka nak beṇ'ka' wlej Chioza' nan lljazoagake' gana' chṇabi'e, zane' wzalee gana' shgasj shḥol, gana' kwellyesh'gake' na' gaoyaaxaxj leye'ka' daa le gakshejlall'gake', daa bi goongakile' inabi'e legake'.

13 Na'ch che' Jesúza' xan soldadka':

—Biyaj lillo'na', na' gak ka cheenilo' daa chajli'o cha'.

Na' lo lla lo gorzə biyaki xmose'na'.

Biyon Jesúza' tobiin che Pédrona'
(Mr. 1:29-31; Lc. 4:38-39)

14 Na'ch wyaj Jesúza' lill Pédrona', na' ble'ile' de tobiin che'na' yo'e dii lana'. 15 Na' beṇ' Jesúza' neena' na' bicheje' dii lana'. Na' lii wyastie' bene' dii wdaogake'.

Jesúza' biyone' zan beṇ'ka' bi shao'
(Mr. 1:32-34; Lc. 4:40-41)

16 Na'ch ka ba chxoa wbillā', jwa'gake' beṇ' zan gana' zoa Jesúza', beṇ' yoo dii xiw'ka', na' shcho'azə dillaa bi'e bichejgakan. Na' lekzka' biyone' yog' beṇ' bi shao'. 17 Gok ka' kwenche gok ka wna dii Isaíaza', beena' wdixjee daa goll Chioza'ne', daa wne': “Le' bikee yillwe'ka' che'icho na' bene' ka bigaa yel' chey chla chechona'.”

Ben'ka' cheengakile' ljanogake' Jesúza'
(Lc. 9:57-62)

¹⁸ Na' ka ble'i Jesúza' ben' zan inleeb ba nechjgake'ne', bene' mandad telene' ben'ka' nakgake'ne' txen shlaa nisdona'lə. ¹⁹ Na' wbig' to ben' chli' chsedi leya', chi'ene':

—Maestro, cheenid' sa'len' li' gattezə shajo'.

²⁰ Na'ch che' Jesúza'ne':

—Bez'ka' nongakb yech ga chiyoogakb, na' byindo'ka' non lilldo'gakb, san nad', Ben' Bsel' Chioza' Yell-lioni, bibi lill' de.

²¹ Na' bchej sto ben' nake' Jesúza' txen na' chi'ene':

—Xan', wza'len' li' gattezə shajo' ka yiyoll guet xa'na'.

²² Na'ch goll Jesúza'ne':

—Da, dino nad'. Wikwash'kzə ljwell ben' wetka'.

Jesúza' bkweze' be'na' lo nisdona'
(Mr. 4:35-41; Lc. 8:22-25)

²³ Na'ch wyoo Jesúza' loo barkwa' len ben'ka' ba nakgake'ne' txen. ²⁴ Na' shlak zej barkwa' wtese'. Na' wzolo wzechga be'na' lo nisdona', na' wzolo chas chataan na' biyoll nisa' loo barkwa'.

²⁵ Na'ch ben'ka' nak Jesúza' txen jasangake'ne', na' che'gake':

—¡Xan', bisla cho'! ¡Ba chbe'cho yel!

²⁶ Na'ch che' Jesúza':

—¿Berache chleblizle? ¿Biçe bi nxenilall'le nad' kwaslol?

Na'ch wyase' bsheshlene' be'na' len nisdona', na' wlezkakan. ²⁷ Na' ben'ka' lle'len Jesúza' loo barkwa' bibangakile' ka bene', na'ch che' ljwell-gake':

—¿Noran nak beeni, lla? Axt be'na' na' nido'na' chzenaggakan che'.

Chop ben' Gadara yoogake' dii xiwaa
(Mr. 5:1-20; Lc. 8:26-39)

²⁸ Na' ka bllin Jesúza' yell-liona' mbani Gadárana' daa llia shlaa nido'na', chop ben' yoogake' dii xiw'ka' bchejgake' loo kapsanta' jatilgake'ne'. Na' daa le zniagake' aga no chak te lo neza' chde gana' zoagake'. ²⁹ Na' besyaagakan che'gakan Jesúza':

—¿Biçhe za'zo' gani zoanto', Jesús, Xiin Chios? ¿Aba za'zelo' zidsak'zi'o neto' la'kzi bin' illin lla sak'zi'nto'?

³⁰ Na' gaoz lle' ba zan kush chaogakb. ³¹ Na'ch got'yoi dii xiw'ka' Jesúza', che'gakan le':

—Shi yibejo' neto' loo yichjlall'do' ben'ki, we'gacho' latj yiyoonto' kushka'.

³² Na'ch goll Jesúza' legakan:

—Wakkzan. Li yiyoo shka'.

Na'ch bichej dii xiw'ka' na' biyoogakan kushka', na' kushka' lii bxonjtegakb na' jabixgakb to cho'a yaa na' bxoptegakb loo nido'na' na' wche'gakb yel.

³³ Na'ch ben'ka' chap kushka' bixonjdogake', na' ka billingake' lalle'ka' gollgake' ben' yellka' doxen ka gok che ben'ka' yoo dii xiw'ka'. ³⁴ Na'ch wza' yog' ben' yellka' zjatilgake' Jesúza', na' ka ble'gakile'ne' got'yogakile'ne' yiyaje' gan yoblə.

9

Jesúza' biyone' to ben' net tlaa kwerp che'na'
(Mr. 2:1-12; Lc. 5:17-26)

¹ Na' biyoo Jesúza' to loo barkw, na'ch bilag'gake' shlaa nisdona' na' billine' yell che'na' gana' wzee.
² Na' bllinlengake' to beñ' net ñi'a neena' lawe'na', nxoagake'ne' to lo daa. Na' gokbe'i Jesúza' le nonlilall'gake'ne', na'ch golle' beñ' we'na':

—Btiplaloo, xiin', ba biyakxen xtołoona'.

³ Na'ch bal beñ'ka' chli' chsedi leya' che' ljjwell-gake': “Ba chonz kwin beeni ka Chioza' daa ne' ka'.” ⁴ Na' gokbe'i Jesúza' daa wza'lall'gake', na' chi'e legake':

—¿Biçhe chza'lall'zle ka'? ⁵ ¿Achakile chyalljchid' yel' wak xench yep' beeni: “Ba bizi'xen' saaxya cho'na'”, ka daa yepee: “Biyas na' bigoo nez”? ⁶ Na' wliid' le', nad', Beñ' Bsel' Chioza', nap' yel' wñabia' yell-lioni kwenche yizi'xen' saaxya che beñ'.

Na'ch golle' beena' net ñi'a neena':

—Biyas, bitob daa cho'na', na' biyaj lillo'na'.

⁷ Na'ch biyas beena' net ñi'a neena' na' ziyaje' lille'na'. ⁸ Na' ka ble'i beñ'ka' ka gok, bibangakile', na' be'la'ogake' Chioza' daa bi'e yel' wak xenna' to beñ' yell-lío.

*Wlej Jesúza' Matewa' kwenche gone'ne' txen
 (Mr. 2:13-17; Lc. 5:27-32)*

⁹ Ka biza' Jesúza' na', ble'ile' to beñ' wixixj, lie' Mateo, chi'e gana' chchixje'. Na' chi'ene':

—Da, dino nad'.

Na'ch lii wzolla'te Matewa' janoe'ne'.

¹⁰ Na' shlak chi' Jesúza' lill Matewa', bllin beñ' zan wixixjka' na' zan beñ' zeyi cheyi bi nsa' chegake' wen, wche'gake' cho'a mesa' wdaolengake' Jesúza' len beñ'ka' nakgake'ne' txen. ¹¹ Na'ch

ka ble'i fariseoka' chaolen Jesúza' ben'ka', na'ch wñabgakile' ben'ka' nakgake'ne' txen, che'gake':

—¿Biche chaolenz maestro cheleni ben' wíchixjki len ben'ki bi nsa' cheyin wen?

¹² Na' beni Jesúza' daa goll fariseoka', na'ch chi'e legake':

—Aga ben'ka' shawaan chyalljgakile' wen rmecha' san ben'ka' bi shawaan chyalljgakile'ne'.

¹³ Li yiyaj na' li lljased bin zeji Cho'a Xtill' Chioza' gana' nan: “Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'.” Aga bid' ni che ben'ka' nak ben' li ben' shao', san bid' ni che ben' saaxyaka'.

Wñabgakile' Jesúza' biche bi chzoa ben'ka' nakgake'ne' txen wbas'

(Mr. 2:18-22; Lc. 5:33-39)

¹⁴ Na'ch ben'ka' nak Juanna' txen jabig'gake' kwit Jesúza' na' wñabgakile'ne' che'gake':

—Neto' na' fariseoka' zeyi chento' chzoanto' wbas'. Na' ¿biche ben'ka' nakgake' li' txen bi chzoa-gake' wbas'?

¹⁵ Na'ch che' Jesúza' legake':

—Kat' chak to wishagna' ben'ka' chdi'a chllag lill ben' byona' aga chdagake' nyesh', san cheej chaogake'. Na' ka'kzan ben'ki nakgake' nad' txen, cheej chaogake' naa zoalen' legake', per wllin lla wkwas ben' nad' kwite'ka', kana'chan soagake' wbasaa.

¹⁶ Ni to kono chida' lat' lech' kob lee lech' gola', la' kat' shechan na' yibe' lech' koba' na' wsho'chan dii gola' na' gana' nlllo' gakchan dii xench. ¹⁷ Na' aga no chgaa vino daa zi' bchejte loo yid gola', la'

wchez' yid gola' na' laljə vinona', na' ka vinona' ka yida' kwiayi'gakan. San chiyal' sholl vino daa zi' bchejte loo yid koba' kwenche ni ton bi kwiayi'.

Jesúza' biyone' xiin Jairona' len noola' jexee xe'na' (Mr. 5:21-43; Lc. 8:40-56)

¹⁸ Na' ni choe'te Jesúza' dill', ka bllin to ben' wñabia' na' bchek' xibe'na' lao Jesúza', chi'ene':

—Shintg wit to bi' nool cha'; per shi li' sa'gacho' na' wxoə noona'b' na' yibam'.

¹⁹ Na'ch lii wzolla'te Jesúza' zejlene' ben'ka' nakgake'ne' txen lill ben' wñabia'na'. ²⁰ Na' ka zejgake' lill ben' wñabia'na' jano to noolə legake', na' ba gok shllin yiz chzoe' wbaa. Na'ch wbiguee koll' Jesúza' bexee xe'na', ²¹ la' chakile': “Kon shel' ba bexaa xe'na' wiyakkzid'.” ²² Na' biyechj Jesúza' na' ka ble'ile' noola' chi'ene':

—Btiplaloo, xiin', ba biyakilo' daa chonlilaloo nad'.

Na' lii biyakteyi noola'.

²³ Na' ka bllin Jesúza' lill ben' wñabia'na' ba lle' ben'ka' chkwel' bllaja' na' ben' zan ba chosyaagake' chbellgake'. ²⁴ Na'ch che' Jesúza' ben'ka':

—Li yillesh ni. Aga witba'n san cheszbaan.

Per bxill-ligake'ne'. ²⁵ Na' ben Jesúza' byen billeshgake', na' wyo'e na' bexee na' bi' nool weta' na' lii biyasteb'. ²⁶ Na' yog' yellka' llia gaoz wze dill' daa bene'.

Biyon Jesúza' chop ben' lchol

²⁷ Na' ka biza' Jesúza', chop ben' lchol janogake'ne'. Na' chosyaagake' zilljə che'gake':

—jBiyesh'lall'gachi neto', xiin dia che dii Daví!

28 Ka biyoo Jesúza' loo yoona', ben' l'cholka' jabig'gake' kwite'na'. Na'ch che' Jesúza' legake':

—¿Achajle'le wak gon' ka ile'ile?

Na'ch goll ben' l'cholka'ne':

—Awe, Xannto', wak gono' ka ile'into'.

29 Na'ch bex' Jesúza' jalawe'ka' na' golle' legake':

—Daa chonlilall'le nad' na' gak ka cheenile.

30 Na'ch bile'gakile'. Na' Jesúza' golle' legake':

—Li gon byen kono ye'le ka'.

31 Per ka biza'gake' kwite'na' lii wzolotegake' choe'gake' dill' doxen gana' mbani yella' daa ben Jesúza' chegake'.

Biyon Jesúza' to ben' bi chak ine

32 Shlak chiza' ben'ka' gok ben' l'chol, bllin ben' yoblə lao Jesúza' n'che'gake' to ben' bi chak ine daa yo'e dii xiwaa. 33 Na' kon ka bibej Jesúza' dii xiwaa yoo beena' na' binie'. Na' bibani ben'ka' lle' na', nagake':

—Ni shlin bin' ile'icho yell Israeli to yel' wak ka dga ba ben beeni.

34 Per fariseoka' che'gake':

—Beeni chibeje' dii xiw'ka' kon yel' wak che daa chnabia' legakan.

Chyallj ben' zan gongake' xshin Chioza'

35 Na' wda Jesúza' yog' yellka', ka yell xen ka yelldo', chli' chsedile' to to gana' chdop chllag ben' Israelka' choe'lwillgake' Chioza'. Wdixje'ile' legake' dill' wen dill' kob che yel' wñabia' che Chioza' na' biyone' ben' che'i bittezə yillwe'. 36 Na' ble'i Jesúza' ben' zan zejlengake'ne' na' biyeshile' legake', la' gokbe'ile' ka nyesh'lazan chak chegake', ka xil' ba

kono x̄anin zoa. ³⁷ Na'ch golle' beṅ'ka' nakgake'ne' t̄xen:

—Dii ḷi nia' le', beṅ'ka' zi' gonḷilall'gake' Chioza' zaklebgakile' to dii wlliachga to lo yell-lio, na' chyallj no yizi' yilapan, per to chopchga wen llinka' zoa. ³⁸ Na' ḷi iṅabi X̄ancho Chioza' wzanche' beṅ'ka' wtopgake' beṅ'ka' gonḷilall'gake'ne'.

10

Jesúza' wleje' shllin beṅ'ka' gakgake' postl che'
(Mr. 3:13-19; Lc. 6:12-16)

¹ Na'ch biti'a Jesúza' beṅ'ka' shllin wleje' na' bi'e ḷegake' yel' wṅabia' kwenche' gak yibejgake' dii x̄iw'ka' yoo beṅ', na' yiyongake' beṅ' che'i bittezə yillwe'.

² Na' kin le postlka' shllin: zigaate wleje' Simónna', beena' ḷekzka' che'gake' Pedro, len beṅ' bishee Andréza', na'tech Jacóbona' len beṅ' bishee Juanna', beṅ'ka' nak xiin Zebedewa', ³ na'ch Felípena', Bartoloména', Tomáza', Mateo, beṅ' wiḥixja', Jacobo xiin Alfewa', Tadewa', ⁴ Simón, beena' bsi'gake' Zelote, na' Jud Scariota', beena' bene' Jesúza' lo na' beṅ' malka'.

Bsel' Jesúza' postlka' shllin je'gake' cho'a xtill' Chioza'
(Mr. 6:7-13; Lc. 9:1-6)

⁵ Na'ch bsel' Jesúza' beṅ'ka' shllin je'gake' cho'a xtill' Chioza', na' chi'e ḷegake':

—Bi shajle yellka' gana' zoa beṅ'ka' bi nak beṅ' Israel, ni bi shajle yellka' llia gana' mbani Samáriana'. ⁶ San ḷi shaj gana' lle' beṅ' Israelka', beṅ'ka' nak ka xil' ba wnit. ⁷ ḷi shaj ḷi lljtixjee ba zoa gaoshosh iṅabia' Chioza' beena' zoa yabana'

loo yichjlall'do' beṅ'. ⁸ Li yiyon beṅ'ka' bi shao' na' beṅ'ka' che'i lepra, li yisban beṅ' ba wit, na' li yibej dii xiw'ka' yoo beṅ'. Na' ka beṅ Chioza', beṅe' le' yeḷ' waka' ka'z, ka'kzan le' bibi wchixjle yiyonle beṅ'.

⁹ 'Na' bi wa'le mech de or, de plat ni de cobre. ¹⁰ Na' ni bi gal'le no yixj les, ni bi gox'le zi shkwe' xale, ni zi shkwe' xel-le, ni bi gox'le yag bar, la' to wen llin chidoḷee yeej gawe'.

¹¹ 'Na' kat' illinle to to yell xen wa yelldo'zə, chijle to beṅ' nsa' che' wen, na' yigaanle lille'na' na' na'tezə soale ax̄t ka illinch lla yiza'le. ¹² Na' ka sho'le lille'na' ye'lene': "Chioza' wzoe' le' mbalaz."

¹³ Na' shi dii li beṅ'ka' lle' na' nakgake' beṅ' wen, wakkzə daa ye'le legake'; san shi bi nakgake' beṅ' wen, na' aga wakan. ¹⁴ Na' gattezə illinle shi kono wleb le' na' ni bi wzenaggake' chele, na' yiza'le lill beena' wa yella' gana' gongakile' le' ka' na' yishible bishtena' llia ni'aleka'. ¹⁵ Dii li nia' le', kat' illin lla wchoglo Chioza' che beṅ', yeḷ' zak'zi' xench ile'chi beṅ' yellka' gana' gongakile' le' ka' aga ka beṅ' yell Sodómana' na' yell Gomórrana'.

Yeḷ' zak'zi'ka' yen ile'i beṅ'ka' nak Jesucrístona' txen

¹⁶ 'Nad' chselaa le' ka xildo' ladj ba zniaka'. Na' chiyal' gakle beṅ' sin' na' beṅ' wen. ¹⁷ Wsak'gale, la' wchej beṅ' lljwee le' lao beṅ'ka' chñabia' na' wit chingake' le' gana' chdop chllagcho choe'lwilcho Chioza'. ¹⁸ Na' lljwa'gake' le' lao beṅ' wñabia' xenka' daa chonilall'le nad', na' ka' gak we'lenle legake' cho'a xtillaana' na' ka'kzə beṅ'ka' bi nakgake' beṅ' Israel. ¹⁹ Na' kat' gongake' le' lo na' beṅ'ka', bi sele wneyi naklə inale wa bi inale,

la' ka gal' inele, Chioza' w_xoe' dillaa cho'a lolll'leka'.
 20 La' aga len' inele, san Espíritu che Xacho Chiozan' gone' ka inele.

21 'Beena' zoa ben' bishee leteze' gone'ne' lo na' ben'ka' witgake'ne', na' beena' zoa xiine' gone'b' lo na' ben' wite'b'. Na' soa ben' yizoshi'e xaxneena' na' gone' legake' lo na' ben'ka' witgake' legake'.
 22 Yog'lol ben' gakzbangakile' le' daa nonlilall'le nad', per beena' so sakile' bittezə daa yen ile'ile' ax̄t kat' guete', beenan' gat' yel' mban che' zejli kan̄i. 23 Shi to yell yilaggake' le', li yiyaj yell yoblə. La' dii li nia' le' bilan' yiyoll tale yog'lol yellki mbani Israeli kat' illin lla yiyed' nad', Ben' Bsel' Chioza'.

24 'To ben' chsed aga zak'che' ka beena' chli' chsedi le', na' ka'kzə to wen llin aga zak'che' ka xane'na'. 25 Na' beena' ni chsed yibaile' gake' ka beena' chli' chsedi le', na' ka'kzə wen llinna', yibaile' gake' ka xane'na'. Nad' nak' xanle, na' shi nagake' cha' non' txen dii xiwaa daa le Bezlo, ¿alelə ki inagake' chele ka'?

*¿Non chiyal' illebcho?
 (Lc. 12:2-9)*

26 Bi illeble ben'ka' biya dii wchi' wsak'gake' le'. La' daa kono nezi naa, wllin lla ila'lawin, na' aga ga de to dii ngash' dii bi illin lla ila'lawin. 27 Diika' chli' chsedid' le' do ngash'zə, li we'n dill' ladj lkwe' ben'. Na' diika' nia' le' to le'zə, li wzenin yog'lol ben'. 28 Bi illeble ben'ka' cheengakile' witgake' le', la' kwerp chele na'zan witgake', aga bi gak gongakile' yichjlall'do'lena'. San Chiozan' chiyal'

illeble, la' len' wakə wlliyee kwerp chelena' len yichjlall'do'lena' lo yi' gabi_la'.

²⁹ 'La'kzi wak si'cho chop byi_{nd}o' kon to sintabdo', ni tob bi guet shi Xacho Chioza' bi wi'e latj. ³⁰ Na' ka nakle le', axt yish' yichjlana' n_labe'. ³¹ Daan bi chiya_l' illeble, la' zak'ch le' aga ka ba zan byi_{nd}o'ka'.

*Ben'ka' chchebgake' lao be_n' nan nombia'gake'
Jesúza'*

(Lc. 12:8-9)

³² 'Beena' we' dill' lao be_n' i_ne' nake' nad' txen, ka'kzə nad' yep' Xa'na' zoa yabana' nake' nad' txen. ³³ Na' beena' bi chcheb lao be_n' nan nake' nad' txen, ka'kzə nad' yep' Xa'na' zoa yabana' bi nake' nad' txen.

Ni che Jesúza' gak be_n' chop_l

(Lc. 12:51-53; 14:26-27)

³⁴ 'Bi gakzile bid' lo yell-lioni kwenche gon' ka soalen ljwell be_n' mbalaz. Aga daan bid', san bid' kwenche wxia' wdi_l. ³⁵ Daa bid' na' yidi_l-len be_n' byona' xe'na' na' noola' yidi_l-lene' xneena', na' beena' zoa xoolille' yidi_l-lene' le'. ³⁶ Na' be_n'ka' zoa toz yoo gakzbani ljwelle'.

³⁷ 'Beena' chakchile' xe'na' wa xneena' aga ka nad', bi chido_lee gake' nad' txen, na' ka'kzə shi chaktechile' xi_ne'na' ka nad', lekzka' bi chido_lee gake' nad' txen. ³⁸ Beena' bi chzani ye_l' mban che'na' yen ile'ile' bittezə kwenche gone' ka nia', bi chido_lee gake' nad' txen. ³⁹ Na' beena' chakile' shel' kono wchi' wsak' le', beenan' kwiayee. San beena' chzani ye_l' mban che'na' yen ile'ile' bittez

daa nonlilallee nad', beenan' gat' to yel' mban che' zejli kani.

Ben'ka' soagake' mbalaz yabana'

(Mr. 9:41)

⁴⁰ 'Beena' wlebe' le', nad'kzan chlebe'. Na' beena' wlebe' nad' lekzka' Chioza', beena' bsel' nadaan, chlebe'. ⁴¹ Beena' wlebe' to ben' chyixjee daa che' Chioza'ne', lenkzen' ikee ka laxj beena' chyixjee daa che' Chioza'ne'. Na' lekzka' beena' wlebe' to ben' chone' daa nak shli daa chibaile' nake' ben' li ben' shao', lekzka' lene'n ikee ka laxj beena' chon daa nak shli. ⁴² Na' beena' we' la'ch' lat' nis yeej ben'ki nakgake' nad' txen, dii li nia' le', de laxje'.

11

¹ Na' ka biyoll goll Jesúza' ben'ka' shllin bin chiyal' gongake', na'ch bizee na', na' jali' jasedile' ben' na' jtixje'ile' legake' cho'a xtil' Chioza' yellka' llia gana' mbani Galileana'.

Ben'ka' bsel' Juan wichoa nisa'

(Lc. 7:18-35)

² Na' Juanna' beena' chchoa ben' nisa', ba die' lillyana'. Ka wnezile' daa chon Crístona', na'ch bselee chop ben'ka' nakgake'ne' txen gana' zoe'.

³ Na' janabgakile'ne' che'gake':

—¿Alin' beena' ba llia bia' yid?, ¿anti chiyal' kweznto' sto ben' yoblə?

⁴ Na'ch che' Jesúza' legake':

—Li yiyaj na' li lljayell Juanna' daa chenile nia' na' daa chle'ile chon'. ⁵ Li lljayelle' chon' ka chle'i ben' lcholka', na' chiza' ben'ka' bi chak sa', na' chiyaki ben'ka' che'i lepra, na' chiyeni

ben' kwellka', na' chisban' ben'ka' ba wit, na' chyixje'id' ben' yesh'ka' dill' wen dill' kob che Chioza'. ⁶ Chakomba beena' chajle' cha' na' bi chakchoplallee.

⁷ Na' ka biza' ben'ka' bsel' Juanna', na'ch wzolo Jesúza' be'lene' ben'ka' lle' na' xtill' Juanna', chi'e legake':

—¿Nakran nsa' che beena' jawiale latja' gana' bibi chashj chleb? ¿Anake' to ben' chakchoplallii che dill'ka' cho'e? ⁸ Shi bi nakan ka', ¿nakran nak beena' jawiale? ¿Ato ben' nakw xalaane' dii le nakə? Bi nakan ka'. La' nezgzile ben'ka' nakw xalaangake' dii le nak zoagake' loo yoo lill ben' wñabia'ka'. ⁹ ¿Nakrakzan nak beena' jawiale? ¿Ato ben' chyixjee daa che' Chioza'ne'? Dii li kan' chone', na' chontechle' ka' ben'ka' chyixjee daa che' Chioza' legake'. ¹⁰ La' che beenin cho'e Cho'a Xtill' Chioza' dill' daa nan:

Wselaa beena' kwialo lawo'na', na' chixji'e xtilloona' kwenche soa ben' wzenagake' cho' kat' illino'.

¹¹ Dii li nia' le', ladj yog' ben' yell-lioki, ni toe' bin' ichej gake' ben' zak'chi' aga ka Juanna' beena' chchoa ben' nisa'. Per nottezə beena' choe' latj inabia' Chioza' yichjlall'do'ena', zak'teche' aga ka Juanna'.

¹² 'Kon ka wzolo Juanna' bchoe' ben' nisa' axt naanlla, zoa ben' chsej chllongake' kono wleb yel' wñabia' che Chioza'.* ¹³ Librka' daa bzej dii

* **11:12** Zoa ben' chsej chllongake' kono wleb yel' wñabia' che Chioza': dga nakan to dii lallj. Lekzka' bal' ben'ka' nsed nage' versículoni zejín: zoa ben' chongake' axt ga zeelo chakgake' kwenche inabia' Chioza' legake'.

ben'ka' wdixjee daa goll Chioza' legake' na' leya' bzej dii Moiséza' wdixjeegakan che yel' wñabia' che Chioza', na' lekzannan' cho'e Juanna' dill' naa blee. ¹⁴ Na' shi cheenile shajle'le dga nia' le', lekzen' Elíaza', beena' nagake' yid kwenche chixji'e cho'a xtill' Chioza'. ¹⁵ Ka le' chenile dga nia', li sen wñeyi.

¹⁶ ¿Bera ka wsaklebid' le' mbanle naa? Le' chonle ka bi'do'ka' lle' gana' chak yaana' na' chosyaagakb' che' ljwellb': ¹⁷ “Bkwellnto' bbleja' na' bi byaale, na' belnto' daa chon nyesh' na' ni bi wchellkzle.” ¹⁸ La' Juanna' bi weej wdawe' dii wen dii shao', na' wnagake' che': “Dii xiwaan yo'e.” ¹⁹ Na'ch wdena' bid' nad' nak' Ben' Bsel' Chioza' Yell-lioni, na' cheej chaw', na' nagake' nak' to ben' waoxat na' to weezo, na' lekzka' nagake' non' txen ben' wen dii malka' na' ben' wichixjka'. Per yel' sin' che Chioza' chli'lawin ka chsa' che ben'ka' chzenaggake' che'.

Yellka' gana' bi bzenaggake' che Jesúsza'

(Lc. 10:13-15)

²⁰ Na'ch wzolo Jesúsza' bsheshlene' ben' yellka' gana' bli'che' yel' waka', daa bi biyaj bilengakile' xtoleeka'. Na' wne':

²¹ —¡Nyesh'laz gak chele, le' ben' yell Corazín! ¡Nyesh'laz gak chele, le' ben' yell Betsaida! La' shel' ben'ka' lle' yell Tírona' na' yell Sidónna' ble'gakile' yel' wakka' ba ble'ile, lii biyaj bilentelja-gakile' xtoleeka', na' gokwljagake' lech' zeshaa na' bllaagake' dena' yichje'ka' daa le gokyesh'gakile', shel'ka'. ²² Na' daa bi biyaj bilenile, ba nia' le', llana' wchoglo Chioza' che ben', dii walch sak'zi'le aga ka ben' Tíroka' na' ben' Sidónka'. ²³ Na' le' ben' Capernaúm, ¿achakile willinle yabana? Aga

willinle na', san latj gana' sak'zi'len yillinle. La' shel' ben' Sodómaka' ble'gakile' yel' wakka' daa ba ble'ile, balja biyaj bilengakile' saaxya che'ka' na' ni ndia yella', shel'ka'. ²⁴ Daan nia' le', kat' illin lla wchoglo Chioza' che ben', dii walch sak'zi'le aga ka ben' Sodómaka'.

Mbalaz soa ben'ka' gonlilall'gake' Jesúza'

(Lc. 10:21-22)

²⁵ Na' lo gora' wne Jesúza', chi'e:

—Xa, li' nako' xan yabana' na' yell-lioni, choe'lawaa li' daa bkwashilo' ben' sin'ka' diika' ba bliilo' ben'ka' bibi chajni. ²⁶ Beno' ka', Xa, la' kan' wyazlalloo.

²⁷ Na'ch goll Jesúza' ben'ka':

—Xa'na' bene' lall' na' yog'lol' daa chon'. Na' ni to kono nombia'yen' nad' lete Xa'na', na' lekzka' kono nombia'yen' Xa'na' lete nad' nak' Xiine' len ben'ka' cheenid' gon' ka gombia'gake'ne'. ²⁸ Li gonlilall' nad', yog'le le' ba chjshiaile na' nakle ka ben' ntakw nchej to dii zii dii zshab, na' nad' gon' ka yizi'lall'le. ²⁹ Li gon ka nia', na' li wzenag daa chzajniid' le', la' nad' nak' ben' gaxjlall' na' gon' ka gat' yel' wixi'lall' chele. ³⁰ Daa nia' le' gonle aga nakan dii bi gak gonle, na' daa chli' chsedid' le' bi nakan dii bi so sakile.

12

Ben'ka' nak Jesúza' txen wdishjgake' trígona' llana' chombaangake'

(Mr. 2:23-28; Lc. 6:1-5)

¹ To lla sabd, llana' chombaang ben' Israelka', wdelen Jesúza' ben'ka' nakgake'ne' txen to ga naz to ben' trígona', na' ben'ka' zejlengake'ne' wzolo

wdishjgake' trígona' na' wdaogake'n. ² Na' ka ble'i fariseoka' daa chon beṇ'ka', na'ch che'gake'ne':

—Bwia ka chon beṇ'ki nakgake' li' txen, chongake' daa bi chiyal' goncho llani chombaanchō.

³ Na'ch che' Jesúza' legake':

—¿Abin' wlable ka ben dii Davina' len beṇ'ka' nakgake'ne' txen ka wdongake'? ⁴ Wyo'e loo lill xlatj Chioza' na' wdoyoe' yetxtilka' daa naki che Chioza' daa toz b̄xozka' de lsens gaogake'.

⁵ ¿Abin' wlable leya' gana' nan aga bi xya nakan che b̄xozka' la'kzi chongake' llinna' loo yoodo'na' llaka' chombaanchō?

⁶ Na' nia' le', ladjleni zoa to beṇ' zak'che' aga ka yoodo'na'. ⁷ Bilja wya-

jniile bi zeji Cho'a Xtil' Chioza' daa na: “Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'.” La' shel' le' wyajniilen, aga waole xya che beṇ' bi nap dol', shel'ka'. ⁸ Nad', Beṇ' Bsel' Chioza' Yell-lioni, chñabi'a lao llani chombaanchō.

Jesúza' biyone' to beṇ' llana' chombaanchō beṇ' Israelka'

(Mr. 3:1-6; Lc. 6:6-11)

⁹ Na'ch biza' Jesúza' latja', na' biyaje' gana' chdop chllag beṇ' Israelka' choe'lwillgake' Chioza'. ¹⁰ Na' ladj beṇ'ka' len to beṇ' net tlaa neena'. Na' fariseoka' chwiagake' naklā ka si' sengake' kwenche gaogake' xya che Jesúza', na'ch wñabgakile'ne', che'gake':

—¿Beran na leya'? ¿Ade lsens yiyoncho to beṇ' bi shao' llani chombaanchō?

¹¹ Na'ch che' Jesúza' legake':

—Shi nole zoa to xil' chele na' ixopb to loo yech llaki chombaanchō, ¿abi yibejleb? ¹² Na' jzak'techlā

ben_echa' aga ka xilaa! Daan de lsens goncho daa nak wen llaki chombaan_echo.

¹³ Na'ch golle' beena' net t_laa neena':

—Bli noona'.

Na' ka bli neena' lii biyakten ka nak daa zi sh_laa.

¹⁴ Na' ka biza' fariseoka' gana' chdop chllaggake', be'gake' dill' nak sho' x_nezi witgake' Jesúza'.

Daa wna dii Isaíaza' che Jesúza'

¹⁵ Ka gokbe'i Jesúza' daa cheengakile' gongake', na' bizee ziyaje' gan yoblə. Na' be_n' zan inlleb janoe'ne' na' biyone' yog' be_n'ka' bi shao'. ¹⁶ Na' golle' be_n'ka' biyone' bi we'gake' dill' daa chone'.

¹⁷ Daa bene' ka', billinin ka wna dii Isaíaza', beena' wdixjee daa goll Chioza'ne', kana' wne':

¹⁸ Beenin nake' wen llin cha', beena' ba wlej',

na' le chakidee na' chazlallaa ka chone'.

Na' wzoa' Espíritu cha'na' loo yichjlall'do'ena',

na' chixje'ile' be_n'ka' lle' yell-lioni ka cheenid' gongake'.

¹⁹ Bi gakdil-lene' be_n',

na' ni bi gosyee wi'e dill' yawi nez.

²⁰ Aga wisyoll wistoe' chishje' yaxtila' daa ba chashjə.

na' aga wisole' mesha' daa ba chiyol,

axt ki gone' gan wli'lao yel' li yel' shao' che'na'.

²¹ Na' be_n' lle' doxen yell-lioni gongake' lez len' gaklene' legake'.

Nagake' che Jesúza' chibeje' dii xiw'ka' kon yel' wak cheyinna'

(Mr. 3:19-30; Lc. 11:14-23; 12:10)

²² Jwa'gake' lao Jesúza' to be_n' yo'e dii xiw' na' bi chle'ile' ni bi chak inie'. Na' bibej Jesúza' dii xiwaa

yo'e, na' bile'ile' na' gokte biñie'. ²³ Yog'loł ben'ka' bibangakile' ka nak daa bene', na' chisne':

—¿Aga beenin xiin dia che dii Davina', beena' chbezcho, lla?

²⁴ Ka beni fariseoka' dillaa choe' ben'ka', na' che'gake':

—Aga bi yel' wak nap beeni. San yel' wak che Bezlona',* daa chñabia' dii xiw'ka'zan, chibejile' diika'.

²⁵ Na' gokbe'i Jesúza' daa chza'lall' fariseoka', na'ch chi'e legake':

—Shi gana' chñabia' to ben' na' tilgake' to lezgake' na' gagkake' choplə, na' kwiayi' gana' chñabi'e, na' ka'kzə shi to yell wa ben' lle' toz yoo gagkake' choplə aga wdiagake'. ²⁶ Ka'kzə Satanáza', shi yibej lɔjwell dii xiwiinka' yoo ben', aga wdia yel' wñabia' cheyinna', shel'ka', la' to lezgakannan' chidil-len kwingakin. ²⁷ Le' nale chibej' dii xiwaa yoo ben' kon yel' wak che Bezlona'† daa chñabia' legakan. ¿Shera ben'ka' nakle txen? ¿Alezkza' lennan' chibejlengake' dii xiw'ka' yoo ben'? Daa bi nakan ka', na' chli'n nakllejile. ²⁸ Na' shi nad' chibej' dii xiw'ka' kon yel' wak che Espíritu che Chioza' zejín ladjleni ba bla' yel' wñabia' che Chioza'.

²⁹ 'Aga no gak sho' lill to ben' wal na' kwane' dii de che' shi bi wcheje'ne' zigaate. Na'chan gak kwane' lille'na'.

³⁰ 'Beena' bi chone' nad' txen, len' chakzbanile' nad'; na' beena' bi chaklene' nad' kwenche

* **12:24** Bezlo: lezkannan' Beelzebú de xtil na' nakan sto le Satanáza'. † **12:27** Bezlo: lezkannan' Beelzebú de xtil na' nakan sto le Satanáza'.

wzenag ben' che Chioza', len' chsej chllone' wzenaggake'.

³¹ 'Na' nia' le', wizi'xen Chioza' yog' saaxya chelena' na' yog'te dii mala' daa chbell chnele, san shi inele zban che Espíritu Sántona' na' cheyi diika' chone', aga wizi'xen Chioza' chele. ³² Na' shi no ine cha', nad', Ben' Bsel' Chioza' Yell-lioni, lekzka' wizi'xen Chioza' che', san beena' ine che Espíritu Sántona', aga wizi'xene' che' naa zoe' yell-lioni ni kat' illin llana' wchogloe' che ben'.

Kon ka nak yaga', ka'te nak daa chbian

(Lc. 6:43-45)

³³ 'Nezicho yaga' daa nak wen chbian dii wen, na' yaga' daa bi nak wen aga bi dii wen chbian. Kon ka nak yaga', ka'te nak daa chbian. ³⁴ Le' ben' wen dii mal! ¿Nakra gonle inele daa nak dii wen daa nakle ben' mal? La' yog' dill' daa chchej cho'a loll'chona' za'n loo yichjlall'do'chona'. ³⁵ Beena' nak ben' wen cho'e dill' wen, daa yoo dii wenna' loo yichjlall'do'ena'; na' beena' nak ben' michian bi cho'e dill' yejni'alallii, daa yoo dii michianna' loo yichjlall'do'ena'. ³⁶ Na' nad' nia' le', kat' illin lla yizi' Chioza' kwent che yog' ben', kanan' yidele kwent che yog'te dill'ka' kontele wnele. ³⁷ La' shi le' choe'le dill' wen, na'ch ina Chioza' bibi dol' nable; per shi le' bi choe'le dill' wen, na' wchogloe' chele sak'zi'le.

Wnabi ben' malka' Jesúza' wli'e to ye! wak

(Mr. 8:12; Lc. 11:29-32)

³⁸ Na'ch bal fariseoka' na' ben'ka' chli' chsedi leya' che'gake' Jesúza':

—Maestro, cheeninto' ile'into' gono' to yel' wak kwenche gakbe'into' shi Chiozan' bselee li'.

³⁹ Na' che' Jesús'a' legake':

—Le' nakle ben' mal na' ben' bi chzenag che Chioza' chñable ile'ile' yel' waka' kwenche wli'n shi Chiozan' bselee nad', per aga wliid' le' daa cheenile. Lete ile'ile to dii nak ka yel' wak daa ben Chioza' che dii Jonáza'. ⁴⁰ La' Jonáza' wyo'e shonə lla shonə yel loo lee bel xenna', na' ka'kzə nad', Ben' Bsel' Chioza' Yell-lioni, shon lla shon yel igaana' loo bana'. ⁴¹ Kat' illin lla wchoglo Chioza' che ben' yell-lioni, kanan' dii ben' Níniveka' gaogake' xya chele, le' zoale naa, la' legake' biyaj bileni saaxya che'ka' kana' wdixje'i dii Jonáza' legake' cho'a xtil' Chioza'. Na' nad', zak'techid' aga ka dii Jonáza' na' bi chzenagle cha'. ⁴² Na' lekzka' llana' kat' wchoglo Chioza' che ben' yell-lioni, noola' wñabia' yellka' lle' do lli'lə gawe' xya chele, le' zoale naa, la' len' wzee zit' nleb bidzenague' dill' sin' daa wne dii Salomónna'. Na' nad', zak'techid' aga ka dii Salomónna' na' bi chzenagle cha'.

Dii xiwaa daa chiyoo ben'

(Lc. 11:24-26)

⁴³ 'Kat' chichej dii xiwaa yoo ben', na' chdan gana' bibi chashj chleb chyiljan gana' yizi'lalliin. Na' kat' bi chllelin gana' yizi'lalliin, ⁴⁴ na'ch chakin: “Yiyaach' dii yoblə gana' bichejkz'.” Na' kat' yillinan gana' bichejan, nakan ka to yoo desh dii nxi nloa. ⁴⁵ Na'ch lljaxi'n zi gall dii xiw'ka' nakch dii malch aga ka len, na' sho'gakan beena'. Na' gaktech mal che beena' aga ka gok che' dii nech. Ka'kzan gak che ben' malka' lle' naa.

*Bllin xna' Jesúza' len beṅ' bisheeka' gana' zoe'
(Mr. 3:31-35; Lc. 8:19-21)*

⁴⁶ Ni choe'lente Jesúza' beṅ'ka' dillaa ka bllin xṅeena' len beṅ' bisheeka' goklall'gake' wshaljlen-gake'ne' na' wzegake' lesh' chyoonā'. ⁴⁷ Na' goll to beṅ' Jesúza':

—Xṅoonā' len beṅ' bishooka' zegake' lesh' chyoonā' cheengakile' wshaljlengake' li'.

⁴⁸ Na' che' Jesúza' beena' golle'ne' ka':

—¿Noran xna'na' na' noran beṅ' bishaaka'?

⁴⁹ Na'ch bli'e beṅ'ka' nakgake'ne' txen na' chi'e:

—Beṅ'kin xna'na' na' beṅ' bishaaka'. ⁵⁰ La' not-tezə beena' chon ka cheeni Xa'na' zoa yabana', beenan' nake' beṅ' bishaa, beṅ' zan' na' xna'.

13

*Jempl che to beṅ' goz goon
(Mr. 4:1-9; Lc. 8:4-8)*

¹ Na' lo llana'tezə wza' Jesúza' yoona' gana' zoe' na' jchi'e cho'a nido'na'. ² Na' daa bdop beṅ' zan' gana' chi'e, na' wyepe' jshie' to loo barkw. Na' yog' beṅ'ka' bdop bllag wzegake' cho'a nido'na'zə. ³ Na'ch bseese zan' jemplka' kwenche bli' bsdile' legake', chi'e:

—To beṅ' goz goon wzee zeje' goza'. ⁴ Na' ka zej chzalee biṅna', bxop balan cho'a neza' na' bllin byiṅka' wdaogakban. ⁵ Na' zi balan bxop ladj yajka' gana' bitek chi' yona', na' lobe' bilaan daa bi wyazan zitj. ⁶ Na' ka wṅa'n wbillā', bkwedan na' wbillten daa bitek bde loinna'. ⁷ Na' zi balan bxop ladj yag yesh'ka', na' bgol yag yesh'ka' na' bi be'gakan latj igolgakan. ⁸ Na' zi balan bxop lo yo wenna', na' wllia chgan. Balan wllia to guiyoa,

na' zi ba_{lan} wllia guiyon na' zi ba_{lan} wllia shichoa.
 9 Ka le' chenile dga nia', li sen w_{neyi}.

Jesúza' bzajniile' biche chzoe' jemplka'

(Mr. 4:10-12; Lc. 8:9-10)

10 Na' be_n'ka' nak Jesúza' txen jabig'gake'
 kwite'na', w_nabgakile'ne':

—¿Bi_{che} chseesoo jemplka' kat' chli' chsedilo'
 be_n'?

11 Na' che' Jesúza' le_gake':

—Chioza' cho'e latj inezile ka nak ye_l' w_nabia'
 che'na' daa kono nezi. Na' be_n'ka' bi nak nad' txen,
 bi cho'e latj inezgakile'n. 12 La' beena' ze w_{neyi}
 shajniile' Cho'a Xtill' Chioza', zizikli shajni'chile'n.
 Na' beena' bi se w_{neyi} shajniile'n, na' ga_l-lallee daa
 ba wyajniile' lat'. 13 Daan chseesaa jemplka' kat'
 chzajniid' le_gake'. La' be_n'ka' chwiategake' na' bi
 chakbe'gakile' bin zeji daa chon', na' chengakile'
 daa ch_nia' na' bi chajni'gakile' bin zejin, daa bi
 chajle'gake' cha'. 14 Na' daa chongake' ka', chillinin
 ka wna dii Isaíaza' ka wdixji'e daa goll Chioza'ne',
 daa na:

La'kzi yengakile', aga wyajni'gakile' bi zeji daa
 yengakile'.

Na' la'kzi ile'gakile', aga wakbe'gakile' bi zeji daa
 ile'gakile'.

15 La' yichjlall'do'eka' ncho_l nntin,
 na' chongake' ka be_n' ndap naguin
 na' ka be_n' nshod' jalawin.

Shel' bi chongake' ka', na' shajni'gakile' daa chza-
 jniid' le_gake'

na' chazan loo yichjlall'do'eka'

na' yiyaj yilengakile' dii malka' chongake',

na' yiyongakee sto be_n' wen.

16 'Per chakomba le' chakbe'ile bi zeji diika' chle'ile chon' na' chajniile diika' chli' chsedid'.
 17 Dii li nia' le', zan dii ben'ka' wdixjee daa goll Chioza' legake' na' zan dii ben'ka' bsa' cheyin wen lao Chioza' goklall'gake' ile'gakile' ka dga chle'ile naa, na' bi ble'gakile'n. Na' goklall'gake' yengakile' ka dga chenile naa na' bi bengakile'n.

Bizajonii Jesúza' legake' bi zeji jempl che ben' goz goona'

(Mr. 4:13-20; Lc. 8:11-15)

18 'Li wzenag bin zeji jempl che ben' goz goona'.
 19 Beena' cheni cho'a xtill' Chioza' daa chzajniin le' che yel' wñabia' che'na', na' bi chajniile'n, nake' ka cho'a neza' gana' bxop binna' daa wdao byindo'ka', la' dii xiwaa chikwasan cho'a xtill' Chioza' daa wyoo loo yichjall'do'ena'. 20 Na' beena' cheni cho'a xtill' Chioza' na' le chibaile' chlebe'n, nake' ka ladj yajka' gana' bxop binna' 21 daa bitek bi loin bde na' bi bdian. La' kat' bi chak che' wa chchi' chsak' ben' le' ni che cho'a xtill' Chioza', na' lii chbejte yichje'n. 22 Na' beena' cheni cho'a xtill' Chioza' per chi' yichje' diika' chak che' na' chzelall'tie' yel' wni'ana', na' chsej chllongakan gon xshin cho'a xtill' Chioza' lo yel' mban che'na'. Beenan' nake' ka daa bla' ladj yag yesh'ka' daa bi be'gakan latj igolan. 23 Per beena' cheni cho'a xtill' Chioza' na' chajniile'n na' chone' ka nan, nake' ka yo wenna' gana' bxop binna', na' balan wllian to guiyoa, balan do guiyon, na' zi balan wllian shichoa.

Jempl che yixaa daa bla' ladj trígona'

24 Na' bsees' Jesúza' sto jempl, chi'e legake':

—Yel' wñabia' che Chioza' nakan ka to beñ' goze' biñ wenna' lo yell-lio che'na'. ²⁵ Per wał chela' shlak chese', wyaj to beñ' chakzbanile'ne' jeze' ladj trígona' daa nak xenin, na' ka biyoll bene' ka' bizee. ²⁶ Na' ka bgol trígona' na' wllian, na' lekzka' bgolte xeninna' ladjinna'. ²⁷ Na' wyaj wen llinka' jellgake' xaninna': “Beñ'do', ¿aaga biñ wenna' jezo' lo cho'na'? ¿Gara wza' xeninna' lenzan ladjinna', lla?” ²⁸ Na' che' xaninna' legake': “Nochod' beñ' chakzbanile' nad' jene' ka'.” Na' goll wen llinka' le': “¿Acheenilo' shajnto' lljalall'nto'n?” ²⁹ Na' chi'e legake': “Bi lljalall'len, la' nxoll lente trígona' wllall'le. ³⁰ San igol-lenchan trígona', na' kat' illin lla yichoggake'n, na' yep' beñ'ka' zigaaate yilall'gake' xeninna' na' gongake'n shlen wej kwenche sheyan, na'tech yitopgake' trígona' na' yigooshaogake'n loo lillinna'.”

Jempl che sa mostásana'

(Mr. 4:30-32; Lc. 13:18-19)

³¹ Na' lekzka' bzoa Jesúza' sto jempl, chi'e:

—Yel' wñabia' che Chioza' nakan ka sa mostásana' daa goz to beñ' lo yell-lio che'na'. ³² La'kzi sa mostásana' nakan liizelozi diido' yid lao bichlæ sa yix' kwan, kat' chlæ'n na' chgolan na' chakan dii xench aga ka yix' kwanka' sto, na' axt byiñdo'ka' chon lillbka' lo xoziiinna'.

Jempl che levadúrana'

(Lc. 13:20-21)

³³ Na' lekzka' bzoe' sto jempl, chi'e:

—Yel' wñabia' che Chioza' nakan ka levadúrana' daa chchix to noolæ shona rob yezja' kwenche yisgolan kwa che yetxtila'.

*Jesúza' b̄chine' jemplka'**(Mr. 4:33-34)*

³⁴ Jesúza' toshiizi b̄chine' jemplka' ka bi'e dill' ladj lao lkwe' beṅ'. ³⁵ Na' daa ben Jesúza' ka', billinin daa wdixjee to beṅ' daa goll Chioza'ne', ka wne':

Wchin' jemplka' ka we'len' beṅ' dill'.

We'len' beṅ' dill' cheyi daa konon' inēzi dezd kana' b̄xe bsilte Chioza' yell-lioni.

Bizajonii Jesúza' bi zeji jempl che yixaa daa bla' ladj trígona'

³⁶ Na' bisa' Jesúza' beṅ'ka' lle' na', na' biyo'e loo yoona'. Na' beṅ'ka' nakgake'ne' txen jabig'gake' kwite'na' che'gake'ne':

—Bizajonii neto' bi zeji jempl che x̄en trígona'

³⁷ Na' goll Jesúza' legake':

—Kin zejín: Nad', Beṅ' Bsel' Chioza' Yell-lioni, zaklebid' beena' goz trígona'. ³⁸ Na' doxen yell-lioni zaklebin gana' goz beena' trígona'. Na' beṅ'ka' choe'gake' latj ch̄n̄abia' Chioza' yich̄jlall'do'eka' zaklebgakile' trígona'. Na' beṅ'ka' choe'gake' latj ch̄n̄abia' dii x̄iwaa yich̄jlall'do'eka' zaklebgakile' x̄en trígona'. ³⁹ Na' dii x̄iwaa zaklebin beṅ' mala', beena' jez ladj trígona' daa nak x̄enin. Na' llana' chilapgake', zaklebin llana' kwiayi' yell-lioni. Na' anjka' zaklebgakile' beṅ'ka' chizi' chilap trígona'.

⁴⁰ Na' ka chitopgake' daa nak x̄en trígona' kwenche wzeygake'n, ka'kzan gak che beṅ'ka' ch̄n̄abia' dii x̄iwaa yich̄jlall'do'eka' ka illin lla kwiayi' yell-lioni.

⁴¹ Nad', Beṅ' Bsel' Chioza' Yell-lioni, wselaa anj ch̄a'ka' kwenche yitopgake' beṅ' wen dii malka' na' beṅ'ka' chzechgake' beṅ' yoblə gongake' dii

mala'. ⁴² Na' wzal'gake' legake' lo yi' gabila' gana' kwellyesh'gake' na' gaoxaxj leye'ka' daa le gakshejlall'gake'. ⁴³ Na' beñ' li beñ' shao'ka' sho'gake' balaan choo balaan xen yabana' gana' chñabia' Xacho Chioza'. Ka le' chenile dga nia', li sen wñeyi.

Jempl che mecha' ngash'

⁴⁴ 'Yeł' wñabia' che Chioza' nakan ka to mech xen dii ngash' to lo yell-lío che beñ' gana' to beñ' jadi'en. Na' na'tezə bikwasheen, na' chibaile' jayet' jadie' yog' dii de che' kwenche bizi'e yell-liona' gana' ngash' mecha'.

Jempl che to perla dii zak'chga

⁴⁵ 'Yeł' wñabia' che Chioza' zaklebin to beñ' chone' delgens che perla dii zak'chga. ⁴⁶ Na' ka bllelile' to dii liizelozi zakii, na'ch jayet' jadie' yog' dii de che' kwenche wxi'en.

Jempl che yixj che bela'

⁴⁷ 'Yeł' wñabia' che Chioza' zaklebin to yixj che bel'. Beñ'ka' chzen bela' chzal'gake' yixja' loo nido'na' na' chzenan zan kwen bel'. ⁴⁸ Na' kat' chilla' yixja' na' chibegake'n cho'a nido'na' na' chbe'gake' chibegake' bel'ka' nak wen na' chgooshao'gake'b to loo llom, na' baka' bi nak wen, chchoongake'b. ⁴⁹ Kan' gak che beñecha' ka illin lla kwiayi' yell-lioni. Anjlka' yibegake' beñ' wenka' ladj beñ' malka', ⁵⁰ na' wzal'gake' beñ' malka' lo yi' gabila' na' kwellyesh'gake' na' gaoxaxj leye'ka' daa le gakshejlall'gake'.

Dii koba' na' dii gola'

⁵¹ Na'ch che' Jesúsza' beñ'ka' nakgake'ne' txen:
—¿Azajniile yog' daa ba bli' bsedid' le'?

Na'ch che'gake'ne':

—Awe, zajniinto'n.

⁵² Na' chi'e legake':

—Beena' chli' chsedi leya' na' nzedile' che yel' wñabia' che Chios, beena' zoa yabana', zaklebile' to xan yoo beñ' ngooshawee dii zan dii zakii, ka dii kob na' ka dii gol, na' chbeje'gakan chchine'gakan.

Jesúza' biyaje' Nazareta'

(Mr. 6:1-6; Lc. 4:16-30)

⁵³ Ka biyoll bsees' Jesúza' jemplka', na' bizee.

⁵⁴ Na' ka billine' yell Nazareta' gana' bgole', na' bli' bsedile' beñ' Israelka' chdop chllag gana' choe'lwillgake' Chioza'. Na' bibani beñ'ka', che'gake':

—¿Gara jxi' beeni yel' sin' che'na', na' nak chak chone' yel' wakka'? ⁵⁵ ¿Aaga xiñ karpintera'zan na' xneena' lie' María? Na' ¿aaga beñ' bishee Jacóbona', Joséna', Simónna' na' Júdaza'? ⁵⁶ Na' beñ' zane'ka' zoagake' lallchoni. ¿Gara jasede' yog'lol diiki chli' chsedile', lla?

⁵⁷ Na' daa bi wyajle'gake' che Jesúza', na' golle' legake':

—To beñ' chyixjee daa che' Chioza'ne', gattez chgoogake'ne' balaan san lall lille'na' aga no chgoo le' balaan.

⁵⁸ Na' aga bitek yel' wak ben Jesúza' yell Nazareta' daa bi wyajle'gake' che'.

14

Betgake' Juanna', beena' bchoa beñ' nisa'

(Mr. 6:14-29; Lc. 9:7-9)

¹ Na' do kana', Heródeza', beena' chñabia' gana' mbani Galileana', benile' ka nak daa chon Jesúza'.

² Na' golle' beñ'ka' chon xshine'na':

—Beenan' dii Juanna', beena' bchoa beñ' nisa'. Ba bibane' ladj beñ' wetka', daan chak chone' yel' wakka'.

³ La' kana' ni mban dii Juanna', Heródeza' bselee beñ' beḡ'gake'ne' na' wloogake'ne' lillyana' ni che Herodíaza' xool beñ' bisheena', beena' le Felipe.

⁴ La' dii Juanna' golle' Heródeza':

—Bi nakan wen nkoo xool beñ' bishoona'.

⁵ Na' daa golle'ne' ka' goklall' Heródeza' wite'ne', per bi biyaxjile' daa bblebe' beñ'ka' chajle' daa nak Juanna' to beñ' chyixjee daa che' Chioza'ne'.

⁶ Per ka wya'i Heródeza' yiz, bi' nool wew' che Herodíaza' byaab' lao beñ'ka' lle' lnina'. Na' daa le biyoolallii Heródeza' ka byaab' ⁷ axt bzoe' Chioza' de taschiw bchebe' wi'eb' bittezə dii inabib' le'. ⁸ Na' kon ka bzajnii xña'baab' bem', na' che'b' Heródeza':

—Yichj Juanna', beena' chchoa beñ' nisa', cheenid' goño'n nad' to lo plat lilij.

⁹ Na' gokyeshii Heródeza', per daa ba bcheble' lao yog' beñ'ka' goxe' lnina' wi'eb' kon daa inabib' le', benshaze' byen we'gake'b' daa wñabb'. ¹⁰ Na' bselee beñ' jachoggake' yichj Juanna' loo lillyana'.

¹¹ Na' bliiagake'n to lo plat lilij na' be'gake'n bi' nool wewaa na' be'baan xña'baa.

¹² Na'ch beñ'ka' wdalen Juanna' txen wyajgake' jaxi'gake' kwerp che'na' na' bkwash'gake'n. Na' wdena' jellgake' Jesúza' ka gok.

Jesúza' bwawe' gayaa mil beñ'
(Mr. 6:30-44; Lc. 9:10-17; Jn. 6:1-14)

¹³ Na' ka wnezi Jesúza' daa gok che Juanna', bizee gana' zoe' na' biyo'e to loo barkw ziyaje' gana' kono beñ' lle'. Na' ka wnezi beñ'ka' lle' yellka' llia gaozə cho'a nido'na' galan zej Jesúza', na'ch wloogake' nez janogake'ne'. ¹⁴ Na' ka bichej Jesúza' loo barkwa', ble'ile' beñ' zan inleeb ba lle' na', na' biyeshile' legake' na' biyone' beñ'ka' bi shao'. ¹⁵ Na' ka ba wlle', na'ch beñ'ka' nak Jesúza' txen jabig'gake' kwite'na', che'gake'ne':

—Ba wlle' naa, na' gani lle'cho kono zoa wit' dii gaocho. Goll beñ'ki yiyajgake' yellka' llia gaozə kwenche lljxi'gake' dii gaogake'.

¹⁶ Na' che' Jesúza' legake':

—Bi chonan byen yiyajgake'. Len', li we' dii gaogake'.

¹⁷ Na' che'gake'ne':

—Gay'chga yetxtil na' zi chopchga beñ' noa'nto' ni.

¹⁸ Na' che' Jesúza' legake':

—Li gonshkin ni.

¹⁹ Na'ch golle' beñ'ka' kwe'gake' lo yixa'. Na' bexee yetxtilka' gay' na' beñ'ka' chop na' blis lawe'na' yabana' na' bi'e Chioza' yel' choxken. Na'ch bxoxje' yetxtilka' na' bi'en beñ'ka' nakgake'ne' txen kwenche be'gake' che che beñ'ka'. ²⁰ Na' wdao yog'lol beñ'ka' axt ka beljgakile'. Na' ka bidaogake', na'ch bitopgake' diika' bgaan, na' biyakan shllin xet'. ²¹ Na' beñ' byoka' wdao gokgake' ka do gayaa mil, na' bi blabgake' noolka' na' bi'do'ka' wdao.

Jesúza' wzee lo nido'na'
(Mr. 6:45-52; Jn. 6:16-21)

22 Ka wde dga bigoo Jesúza' ben'ka' nakgake'ne' txen to loo barkw kwenche yilag'gake' shlaa nido'na' to lezgake', na' le' bigaane' kwenche bisee ben'ka' bdop bllag. 23 Na' wde bisee ben'ka', na'ch wyepe' to lo yaa kwenche jelwille' Chioza' toze'. Na' ni zetie' lo yaana' ka gol. 24 Na' barkwa' gana' ziyoo ben'ka' nakgake'ne' txen ba zejan gchol nido'na'. Chakan to ki to ka'lə daa chas chat' nisa', na' be'na' bi cho'en latj yiyajan shlichha. 25 Na' zbalz biyetj Jesúza' lo yaana' na' bizee tlo nido'na' zeje' gana' zejlögake'. 26 Na' ka ble'i ben'ka' non Jesúza' txen zeje' tlo nisa', le bllébgake' na' axt besyaagake', nagake':

—jBa za' to yel bxen!

27 Na' lii wneté Jesúza' legake', chi'e:

—Bi illeble. Nad'kzan'.

28 Na'ch wne Pédróna' chi'e:

—Xan', shi lin', ben ka gak saa lo nisi kwenche yid' kwito'na'.

29 Na' che' Jesúza'ne':

—Dashka'.

Na'ch bchej Pédróna' loo barkwa' na' wzoloe' chzee tlo nisa' nan shaje' kwit Jesúza'. 30 Per ka gokbe'ile' zechga be'na', na' bllébe' na' lii wzolote chbi'e yel, na'ch besyee chi'e:

—jXan', bisla nad'!

31 Na' lii biyox'te Jesúza' neena', chi'ene':

—¿Berache gokchopzilo? ¿Biche bi nxenilalloo nad' kwaslol'?

32 Na' kon ka biyoogake' loo barkwa' na' bgan be'na'. 33 Na' ben'ka' bgaan loo barkwa', be'la'ogake' Jesúza' na' gollgake':

—Dii li, lin' Xiin Chioza'.

Jesúza' biyone' beṅ'ka' bi shao' gana' mbani Genesareta'

(Mr. 6:53-56)

³⁴ Na' ka bḷag'gake' shḷaa nisdona' na' bllingake' gana' mbani Genesareta'. ³⁵ Na' beṅ' Genesaretká' biyombia'gake' Jesúza' na'ch bzungakile' beṅ' yel-lka' lle' gao nan ba bllin Jesúza'. Na' jwa'gake' yog' beṅ'ka' bi shao' lawe'na', ³⁶ na' got'yogakile'ne' wi'e latj ḷa'ch' goḡ' beṅ' we'ka' xe'na', na' yog' beṅ'ka' beḡ'gake'n biyagakile'.

15

Daa chxinj yichjlall'do' benecha'

(Mr. 7:1-23)

¹ Bal fariseoka' na' beṅ'ka' chli' chsedi leya', wza'gake' Jerusalénna' na' wyajgake' lao Jesúza', wṅabgakile'ne':

² —¿Biḡhe beṅ'ki nakgake' li' txen bi chongake' ka wyoolo dii ḡozxto'choka'? ḷa' bi chixis chiyib neeka' ka zi' gaogake'.

³ Na' wṅabi Jesúza' ḷegake' chi'e:

—¿Biḡhe chyishjle daa nllia Chioza' bia' gonle na' zechle wṅeyi chonle ka ben dii ḡozxto'choka'?

⁴ ḷa' kin wna Chioza': “ḷi gap ḡaxṅa'le balaan”, na' “Beena' iṅe zban che xe'na' wa xṅeena', chiyaḷ' guete'.” ⁵ Per le', nale wak ye' beṅ' ḡaxṅeena':

“Bi gak gaken' le', ḷa' yog' daa nap' ba nḡheb' wi'an Chioza'.” ⁶ Na' beena' yee ḡaxṅeena' ka', cho'allalene' daa nale bi chonan byen gaklene' ḷegake'. Na' daa chonle ka', chonile daa nllia Chioza' bia' goncho ka to dii bibi zakii kwenḡhe nole diika' wyoolo dii ḡozxto'choka'. ⁷ ¡Le' beṅ'

wxiye', le' wen gan! Kwasloḷ inlebb be' dii Isaíaza' xtill'le, ka wne':

⁸ Ben'ki choe'la'ogake' nad' de cho'a loll'zgake', la' aga do yichj do lall'gaken' choe'la'ogake' nad'.

⁹ Bibi zjanayin chonzgake' ka ben' choe'la'o nad'; na' diika' chli' chsedgakile' nakgakan che ben' yellioz.

¹⁰ Na' wne Jesús'a' ben'ka' lle' na', golle' legake':

—Li wzenag dga inia' le' na' li shajniin.

¹¹ Aga daa cheej chao beṇaan chxinj chlenan yichjlall'do'ena', san dill'ka' chchej cho'enan', lennan' chxinj chlenan yichjlall'do'ena'.

¹² Na'ch ben'ka' nak Jesús'a' txen wbig'gake' kwite'na', gollgake'ne':

—¿Azakbe'ilo' gokzi'chgayi fariseoka' ka bengakile' wno' ka'?

¹³ Na'ch goll Jesús'a' legake':

—Nottezə ben' bi chzenague' che Xa'na' zoa yabana', yiyol yinite', na' gak che' ka chak che to yag dii chlall' ben' do loyin. ¹⁴ Jwayishazi fariseoka', la' nnit nchoḷgakilen'. Na' nezicho shi to ben' lchoḷ wchi'e sto ljwell lchoḷe', choptie' ljabix.

¹⁵ Na'ch Pédrona' golle' Jesús'a':

—Bizajnii neto' bi zejin jempla' daa ba bseesoo.

¹⁶ Na'ch goll Jesús'a' legake':

—¿Alezkza' lenle bin' shajniile bi zejin daa ba wnia'? ¹⁷ ¿Abi nezile nan daa cheej chaocho chjche'n loo leechona' na'tech chiden? ¹⁸ Per ka nak daa chnecho, lennan' chalj chxen loo yichjlall'do'chona'. Na' shi chnecho dii bi nak wen, lennan' chxinj chlenan cho'. ¹⁹ La' loo yichjlall'do' benechan' chalj chxe diiki bi nak wen: yel' chon xya, yel' chnelen ljwellin, yel' wban, yel' chyiljlall'

che ben', na' yel' chbell chne che ben'. ²⁰ Diikin chxinjan yichjlall'do' ben', aga daa bi chixis chiyib neena' ka zi' gawen'.

To noolə bi nak ben' Israel benlilallee Jesúza'
(Mr. 7:24-30)

²¹ Na' biza' Jesúza' wyaje' gana' mbani yell Tírona' len yell Sidónna'. ²² Na' to noolə cananea zoe' gana' mbani yellka' wbigue' kwite'na' na' wnie' zillja, chi'ene':

—Xan', Xiin dia che dii Daví, biyesh'lall'gachi nad', la' bi' nool cha'na' yoob' dii xiwaa na' le chsak'zi'n leb'.

²³ Per Jesúza' bikzə bi golle' noola'. Na'ch ben'ka' nakgake'ne' txen wbig'gake' kwite'na' goll-gake'ne':

—Goll nooli yiyaje', la' kon chosyee zidnoe' cho'.

²⁴ Na'ch goll Jesúza':

—Bsel' Chioza' nad' kwenche gaklen' to ben' Israelka'zə, ben'ka' nak ka xil'ka' wnit.

²⁵ Na'ch noola' jabiguae kwit Jesúza' na' bchek' xibe'na' lawe'na' chi'ene':

—jXan', goklengach nad'!

²⁶ Na'ch che' Jesúza'ne':

—Bi nakan wen yikaacho yel' wawa' chao bi'do' chechoka' na' we'chon bekw'ka'.

²⁷ Na'ch noola' chi'ene':

—Lekzilo', Xan', per chak chao xikw'choka' di-ika' chxop lo yona'.

²⁸ Na'ch goll Jesúza'ne':

—jNoolə, nonlilall'likzo' nad'! Na' gak ka chee-nilo'.

Na' katena' lii biyakteyi bi' nool che'na'.

Jesúza' biyone' beṇ' zan

²⁹ Na' biza' Jesúza' na', na' billine' cho'a nido' che Galileana' na' wyepe' to lo yaa jchi'e. ³⁰ Na' beṇ' zan bllin lawe'na' nche'gake' no beṇ' bi chak sa', no beṇ' lchol, no beṇ' bi chak ine, no beṇ' nxinj, no beṇ' chak bichlə yillwe'. Na' bzoagake' legake' lao Jesúza' na' biyone' legake'. ³¹ Na' bibani beṇ'ka' ka gok, la' beṇ'ka' bi chak ine wnegake', na' beṇ'ka' nxinj biyakgakile', na' beṇ'ka' bi chak sa' wza'gake', na' beṇ' lcholka' ble'gakile'. Na'ch yog'lol beṇ'ka' be'la'ogake' Chios, beena' choe'la'o beṇ' Israelka'.

Jesúza' bwawe' tapa mil beṇ'

(Mr. 8:1-10)

³² Na'ch gox Jesúza' beṇ'ka' nakgake'ne' txen, na' golle' legake':

—Le chiyeshid' beṇ'ki, la' ba gok shon lla zoalengake' cho' ni, na' aga bi de dii gaogake'. Na' bi cheenid' yisangakee daa biṇ' gaogake', la' nxoll ikwidgakile' tneza'.

³³ Na' che' beṇ'ka' nakgake'ne' txen:

—Per ¿ga lljxi'cho dii gao yog'lol beṇ'ki?, la' gani lle'cho kono zoa wit' dii gaocho.

³⁴ Na'ch wṇabi Jesúza' legake', chi'e:

—¿Zi balchga yetxtil chechoka' de?

Na' che'gake'ne':

—De gall yetxtilka' na' sto chop bel.

³⁵ Na'ch goll Jesúza' beṇ'ka' kwe'gake' lo yona'.

³⁶ Na' beṇ'ee yetxtilka' gall na' belka' na' bi'e Chioza' yel' choxken, na' bxoxje'n bi'en beṇ'ka' nakgake'ne' txen kwenche be'gake' che che beṇ'ka'. ³⁷ Na' yoguee wdao axt ka beljakile'. Na'

wdena' bitopgake' dii lao'ka' bichoonan, gokten zi gall xet'. ³⁸ Na' ben' byoka' wdao nakgake' tapa mil, na' bi blabgake' noolka' ni bi'do'ka' wdao. ³⁹ Na' biyoll bisa' Jesúza' legake', biyo'e to loo barkw len ben'ka' nakgake'ne' txen na' biyajgake' gana' mbani yell Magdálana'.

16

Fariseoka' na' saduceoka' wñabgakile' Jesúza' gone' to yel' wak

(Mr. 8:11-13; Lc. 12:54-56)

¹ Fariseoka' len saduceoka' jawiagake' Jesúza' na' wñabgakile'ne' gone' to yel' wak dii ile'gakile' kwenche wli'n shi Chiozan' bseleene'. ² Na' goll Jesúza' legake':

—Shlle'na' chwiale xan yabana' na' nale: “Le yillaa wx̄e, la' le nlatjcha.” ³ Na' shi chibe'cha shzila' na' nale: “Wak yeja' la' ba bibe'cha.” Le' chakbe'ile shi gak zey' wa gak yej daa chwiale ka nak xan yabana', per aga chakbe'ile bin zeji diika' chon Chioza' llaki zoacho naa. ⁴ Le' nakle ben' mal na' ben' bi chzenag che Chioza', chñable ile'ile' to yel' wak kwenche wli'n shi Chioza' bselee nad', per bi wliid' le' daa chñable. Lete ile'ile' sto yel' wak ka daa ben Chioza' che dii Jonáza'.

Na' wde goll Jesúza' legake' ka', na' bizee kwite'ka' ziyaje'.

Dill' wxiye' che fariseoka' zaklebin levadúrana'

(Mr. 8:14-21)

⁵ Na' ka bllingake' shlaa nisdona', ben'ka' nakgake'ne' txen gol-lall'gake' wa'gake' yetxtila'.

⁶ Na' goll Jesúza' legake':

—Wsak'gale bi shajle'le dill' wxiye' che fariseoka' na' saduceoka', daa zaklebi levadúrana'.

⁷ Na' che' l'jwellgake':

—Daa gol-lall'cho wa'cho yetxtilan' ne' cho' ka'.

⁸ Na' gokbe'i Jesúza' daa che' l'jwellgake' na' golle' legake':

—¿Biçhe nazle bibi yetxtila' bia'le? ¿Biçhe bi n̄xenilall'le nad' kwasl̄ol? ⁹ ¿Abikzan' shajniile ka nak diika' chon'? ¿Abi chjadinile kana' wdao gayaa mil beñ' kon gay'zə yetxtilka' na' bal̄ xet' dii bixjka' bitople? ¹⁰ Na' ¿shera kana' wdao tapa mil beñ' kon gallzə yetxtilka'? ¿Abi chjadinile bal̄ xet' dii bixjka' bitople? ¹¹ ¿Biçhe che yetxtila'lə wyajnzile ka wnia' wsak'gale che levadura che fariseoka' len saduceoka'?

¹² Na' kana'ch wyajni'gakile' nan aga che levadura che yetxtilan' chi'e legake' wsak'gake' san diika' chli' chsedi fariseoka' len saduceoka'lan.

Pédrona' chi'e Jesúza'n nake' Crístona'

(Mr. 8:27-30; Lc. 9:18-21)

¹³ Na' ka bllin Jesúza' len beñ'ka' nakgake'ne' txen gana' mbani yell Cesarea che Filípona', na'ch chi'e legake':

—¿Non na beñ' yell-liona' nak', nad', Beñ' Bsel' Chioza' Yell-lioni?

¹⁴ Na' che'gake'ne':

—Bale' nagake' nako' dii Juanna', beena' bchoa beñ' nisa', na' zi bale' nagake' nako' Elíaza', na' zi bale' nagake' nako' dii Jeremíaza', na' bale' nagake' nako' sto beñ' chyixjee daa che' Chioza'ne'.

¹⁵ Na'ch chi'e legake':

—¿Shera le'? ¿Nora nale nak'?

¹⁶ Na' Simón Pédróna' chi'ene':

—Lin' Crístona', Xiin Chios yaa Chios banna'.

¹⁷ Na' Jesúza' chi'ene':

—Chakomba li' Simón, xiin Jonás, la' aga nochlan bzajni li' daa ba wno'. Xa'na' zoa yabanan' ba bzajniile'n li'. ¹⁸ Na' nad' nia' li', lin' lio' Pedro, daa zeji yaj, na' gako' ka to yaj wal na' lin' wchin' kwenche gono' ka shanch ben'ka' gonlilall'gake' nad', na' ni yel' wita' bi yizoin williayi'n ben'ka' ba wlej' kwenche nakgake' lall' na'. ¹⁹ Na' gon' li' yel' wñabia' daa zaklebi to xiinya dii chsaljan yabana' gana' chñabia' Chioza'. Na' diika' ino' bi chiya' gon ben' yell-lioni, lezkza' ina Chioza' zoa yabana', na' diika' ino' wak gongake', lezkza' ina Chioza' zoa yabana'.

²⁰ Na' goll Jesúza' ben'ka' nakgake'ne' txen ni to kono ye'gake' len' Crístona', beena' bsel' Chioza' inabi'e.

Jesúza' bi'e dill' witgake'ne'

(Mr. 8:31–9:1; Lc. 9:22-27)

²¹ Na' lo llana' wzolo Jesúza' bzajniile' ben'ka' nakgake'ne' txen daa lia bia' gak che'. Golle' legake' chonan byen yiyaje' Jerusalénna' kwenche gake' lo na' ben' golka' chñabia' na' lo na' bñozka' chñabia' na' lo na' ben'ka' chli' chsedi leya', na' le wsak'zi'gake'ne', na' chonan byen witgake'ne' na' ka gak shon lla yibane' ladj ben' wetka'. ²² Na'ch Pédrona' wleje' Jesúza' ladj ben'ka' chi'ene':

—Xan', jbat gak cho' ka ba wno'!

²³ Na' biyechj Jesúza' chi'e Pédrona':

—Kwas ka'lə, Satanás. Cheenzilo' bi gon' daa lia bia' gon' daa bi yoo yichjo' daa cheeni Chioza', san daa nak che yell-liozan yoo yichjo'.

24 Na' che' Jesúza' beṅ'ka' nakgake'ne' txen:

—Shi no cheeni gon nad' txen, chiyaḷ' wsanlall' kwine', na' izani yeḷ' mban che'na' yen ile'ile' bittez ni cha', na' gone' ka chazlallaa. 25 La' beena' bi chzani yeḷ' mban che'na', beenan' kwiayi', san beena' chzani yeḷ' mban che'na' yen ile'ile' bittez ni cha', beenan' gat' to yeḷ' mban che' zejli kaṅi. 26 ¿Bera zjanayin gap beṅ' yog'te dii de yell-lioni, shi le' kwiayee? Aga bi de wi'e lo laz yeḷ' mban che'na' kwenche bi kwiayee. 27 La' nad', Beṅ' Bsel' Chioza' Yell-lioni, yiyed' len anjl cha'ka' zinsa' balaan xen che Xa' Chioza'. Kana'chan chixj' to to beṅ' kon ka dii bene'. 28 Dii li nia' le', bal-le lle'le ni, ni mbanle ile'ile yeḷ' wnabia' cha'na', nad', Beṅ' Bsel' Chioza' Yell-lioni.

17

Biyak Jesúza' nlla'lə

(Mr. 9:2-13; Lc. 9:28-36)

1 Ka wde xop lla, bche' Jesúza' Pédrona', na' Jacóbona' len beṅ' bishee Juanna', na' to lezgake' wyajlene' to lo yaa xen. 2 Na' ka lle'gake' lo yaana', gok Jesúza' nlla'lə lawe'ka'. Wyep wyeeni' cho'alawe'na' kakzə wbillá', na' xe'na' nakwe' gokan xtil llyish axt chey cheeni'n. 3 Na' beṅ'ka' lle'lengake'ne' ble'gakile' dii Moiséza' na' Elíaza' chshaljengake' Jesúza'. 4 Na'ch Pédrona' golle' Jesúza':

—Xan', le mbalaz zoacho ni. Shi cheenilo', gon' shon ransh, ton cho', ston che Moiséza' na' ston che Elíaza'.

⁵ Na' ka golle' ka', betj to bej dii chey cheeni' na' bkwashaan legake', na' loo beja' bengakile' che' Chioza':

—Beenin Xiinaa, beena' chakid', na' chazlall'chga' ka chone'. Li wzenag che'.

⁶ Na' ben'ka' nak Jesúza' txen, ka bengakile' wne Chioza', le bblebchgagake' na' to bdoszgake' lo yona'. ⁷ Na' wbig' Jesúza' kwite'ka' bexee legake', chi'e:

—Li yiyas. Bi illeble.

⁸ Na' ka bilis yichje'ka', koch no ben'ka' ble'gakile', stochga Jesúza'.

⁹ Na' ka biza'gake' lo yaana' goll Jesúza' legake':

—Ni to kono ye'le ka nak dga ba ble'ile axt kat'ch nad', Ben' Bsel' Chioza' Yell-lioni, ba biban' ladj ben' wetka'.

¹⁰ Na'ch ben'ka' nak Jesúza' txen che'gake'ne':

—¿Berache naz ben'ka' chli' chsedi leya' zigaate Elíazan' yiyed?

¹¹ Na' goll Jesúza' legake':

—Dii li ka nakannan', zigaate Elíazan' yiyede' yigwee xnezi yog'lolte. ¹² Per nad' nia' le', ba biyed Elíaza', na' bi gokbe'gakile' shi len'. Na' bengakile'ne' kon ka wnazan chegake'. Na' ka'kzan gongakile' nad', Ben' Bsel' Chioza' Yell-lioni.

¹³ Na' gokbe'gakile' nan che Juanna', beena' bchoa ben' nisan' cho'e dill'.

Jesúza' biyone' to bi' chaz shon

(Mr. 9:14-29; Lc. 9:37-43)

¹⁴ Na' ka billingake' gana' lle' lla' ben', na'ch bchej to ben' jabiguee kwit Jesúza' na' bchek' xibe'na' lawe'na', chi'ene':

15 —Maestro, biyesh'gachi bi' cha'ni. Chazb' shon na' le chzak'zi'b'. Zan shii ba bzala'n leb' lo yi'na'na' lekzka'loo nisa'. 16 Na' ba jwa'b' lao ben'ka' nakgake' li' txen na' bi gok yiyongake'b'.

17 Na' goll Jesúza':

—¿Zi'tegalə chelena', le' ben' mal na' ben' bi chajle'! ¿Zi ka'k'tek chiya'l' soalen' le'? Na' ¿zi ka'k'tek chiya'l' soid' le'? Li da diwa' bi' xkwidaa ni.

18 Na'ch bsheshlen Jesúza' dii xiwaa yoob' na' bichejan. Na' katena' biyakib'.

19 Na' ka biyoll gok ka', ben'ka' nak Jesúza' txen bshaljengake'ne' to lezgake', gollgake':

—¿Biçhe bi gok yibejnto' dii xiwaa yoo bi' xkwidaa?

20 Na' goll Jesúza' legake':

—Bi gok yibejen, la' bi chajle'le Chioza' gone' ka yichejan. Dii li nia' le', shel'ka' yel' chajle' chelena' nakan la'ch' ka sa mostásana' daa nak diido'zə, wakte ye'le yaani: “Bkwas ni na' jsoa gan yoblə”, na' wkwasan ka'lə. Aga ga de to dii bi gak gonle shel'ka' chajle'le che Chioza'. 21 Kwenche gak yibeje dii xiwaa ka daa bibej' bi' xkwidaa, chiya'l' soale wbas' na' soachechle we'lwill-le Chioza'.

Sto shii wdixjee Jesúza' witgake'ne'

(Mr. 9:30-32; Lc. 9:43-45)

22 Na' shlak chdalen Jesúza' ben'ka' nakgake'ne' txen gana' mbani Galileana', golle' legake':

—Nad', Ben' Bsel' Chioza' Yell-lioni, gak' lo na' ben' malka'. 23 Na' witgake' nad', na' ka gak shon lla yiban' ladj ben' wetka'.

Na' ka golle' legake' ka', le gokyesh'gakile'.

Jesúza' wdixje' daa chiyal' gaxj che yoodo'na'

²⁴ Na' ka billin Jesúza' len beṇ'ka' nakgake'ne' txen Capernaúma', beṇ' Israelka' beṇ'ka' chchixj che yoodo'na' jawiagake' Pédróna', na' wṇabgakile'ne':

—¿Achyixj maestro chelena' daa chidol'cho we'cho che yoodo'na'?

²⁵ Na' goll Pédróna' legake':

—Awe, chyixje'n.

Na' ka biyoo Pédróna' loo yoona' gana' zoagake', Jesúza' bkwialoe' dillaa chi'e:

—¿Nak ka chakilo', Simón? Beṇ'ka' chṇabia' yellioni, ¿aben' wlall che'kan' chchixjgake'?, ¿awa beṇ' zit'kan'?

²⁶ Na' billii Pédróna' xtilleena':

—Beṇ' zit'kan' chchixjgake'.

Na' goll Jesúza'ne':

—Zejin beṇ' wlall che'ka' bi chonan byen chixjgake'. ²⁷ Per kwenche bi wshaachogake', wyaj cho'a nido'na' na' wzaḷoo daa chzenilo' beḷa'. Na' beḷ necha' seno' wxoo cho'aba' na' loo cho'aba' yillelilo' to mech. Waktekzin ljtixjo' che choptecho.

18

Beṇ'ka' nak Jesúza' txen gokdilgake' nogaken' nak beṇ' zak'chi

(Mr. 9:33-37; Lc. 9:46-48)

¹ Na' do kana'kzə, beṇ'ka' nak Jesúza' txen jabig'gake' kwite'na' che'gake'ne':

—¿Noran nak beṇ' zak'chi ladj beṇ'ka' chṇabia' Chioza'?

² Na' wne Jesúza' to bi'do' na' bzie'b' ladje'ka'.

³ Na'ch chi'e legake':

—Dii li nia' le', beena' bi yiyak yichjlall'do'ena' ka che bi'do'ni kwenche inabia' Chioza' le', bi lene' ben'ka' chnabia' Chioza'. ⁴ Daan beena' wlexj yichje' wzenague' che Chioza' ka chlexj yichj bi'do'ni chzenagb' che xaxna'baa, beenan' zak'chi ladj ben'ka' chnabia' Chioza'. ⁵ Na' beena' wlebe' to bi'do' ka bi'do'ni daa chonlilallee nad', nad'kzan chlebe'.

Xoll ibixcho lao dii mala'

(Mr. 9:42-48; Lc. 17:1-2)

⁶ 'Nottez beena' wchixe' to ben' zi' chzolo chonlilallee nad' gone' dii mala', naklan wen wwal'gake' yene'na' to yaj che molin na' lljlekgake'ne' yel loo nisdona' aga ka daa wchixe' ben' lao dii mala'. ⁷ ¡Nyesh'laz che ben' yell-lioki!, la' biga iyallji daa gonan ka wxinj wlengake'. Per ¡nyesh'lazch gak che beena' gon ka wxinj wlen ben' yoblə!

⁸ 'Na' shi noona' wa ni'ona' gonan ka ibixo' lao dii mala', naklan wen wchogo'n na' choono'n, la' wenchlan bi de noona' tlaa wa ni'ona' tlaa yillino' kwit Chioza' aga ka daa yiyaj doxentio' lo yi' gabila' daa biga yiyol. ⁹ Na' shi daa ile'ilo' kon jalawo'na' gonan ka ibixo' lao dii mala', naklan wen wlechjo'n na' choono'n, la' wenchlan yillinleno' tlaaz jalawo'na' kwit Chioza' aga ka daa yiyaj doxentio' lo yi' gabila'.

Jempl che xilaa wnit

(Lc. 15:3-7)

¹⁰ 'Bi gonile nakzi ni to ben'ki zi' wzolo chonlilall' nad'. La' nia' le', anjl che'ka' toshiizi zoagake' lao

Xa'na', beena' zoa yabana'. ¹¹ La' nad', Ben' Bsel' Chioza' Yell-lioni, bid' kwenche yisla' ben'ka' yoo nez daa wlliyi'n legake'.

¹² ¿Nak chakile? Shi to ben' lle' to guiyoa xil' che' na' nit tob, ¿abi wkwaane' baka' taplalj twalj na' shaje lljadilje' bana' wnit? ¹³ Na' shi yillelile'b, lech yibaile' cheb aga ka che baka' taplalj twalj baka' lle' tozga. ¹⁴ Ka'kzan Xacho Chioza' zoa yabana' cheenile' ni to ben'ki zi' wzolo chonlilall' nad' bi kwiayi' shel'ka'.

Chiyal' si'xencho che ben'ka' nakcho txen chonlilall'cho Chioza'
(Lc. 17:3)

¹⁵ Shi to ben' nakle txen nonlilall'le Chioza' gone' to dii mal cho', je'lene' dill' to li' to le' daa bene' cho'. Shi ba bzenague' cho', ba beno' gan bizoaleno'ne' wen. ¹⁶ Per shi bi wzenague' bin yoone', na'ch wchi'o sto chop ben' kwenche gakgake' taschiw che daa yoone'. ¹⁷ Na' shi ni ka' bi wzenague' chele, wak ye'le yog' ben'ka' nakle txen nonlilall'le Chioza' ka nak daa ba bene' kwenche we'lengake'ne' dill'. Na' shi ni che ben'ka' bi wzenague', na'chan goni-lene' ka to ben' bi nonlilall' Chioza' wa ka to ben' wichixj.

¹⁸ Na' dii li nia' le', diika' inale bi gon ben' yell-lioni, lekzka' ina Chioza' zoa yabana', na' diika' inale wak gon ben' yell-lioni, lekzka' ina Chioza' zoa yabana'.

¹⁹ Na' lekzka' nia' le', shi chople idili xtill'lena' yell-lioni kat' bi inable lao Xa' Chioza', beena' zoa yabana', na' gone' daa inabilene'. ²⁰ La' gana' chdop chope' wa shone' choe'la'ogake' nad', na'kz zoa' ladje'ka'.

21 Na' wbig' Pédróna' kwit Jesúza', chi'ene':

—Xan', ¿bal shii chiyal' yizi'xen' che bish' ljjwellaa shi bi dii mal chone' cha'? ¿Azeelo gall shii?

22 Na' che' Jesúza'ne':

—Aga nia' li' zeelo gall shii yizi'xeno' che bish' ljjwello'na', san nia' li' chiyal' yizi'xeno' guiyon shin'chopə shii.*

Jempl che beena' bi bizi'xen che bish' ljjwelle'na'

23 'Yel' wñabia' che Chioza' zaklebin to ben' wñabia' beena' bizi' kwent che mecha' daa chal' wen llin che'ka'. 24 Na' ka wzoloe' chizi'e kwent che to toe', jwa'gake' to wen llin che'na' beena' chal' dii xen inleeb. 25 Per aga bi mech nap beena' kwenche yiyixje' daa chbaguee, na' xane'na' bene' mandad wit' wdegake'ne' do xiin do xoolé' na' yog'lol dii de che' kwenche yiyaxj xyana' daa llie'. 26 Na' beena' chbag' mecha' bçhek' xibe'na' lao xane'na', chonyeshee, chi'e: “Xan', wdapgach yel' chxenlall' cha', wiyixjkz' doxen daa chbagaa cho'.” 27 Na' xane'na' biyeshile'ne', na' bene' ka'z doxen daa chalee che', na' bisane'ne'. 28 Per le', ka bicheje' lill xane'na', billague' sto wen llin ben' chal' lat'do' xmeche', na' lii bniztie' yene'na' chi'ene': “jBiyon xmechaa daa chaloo!” 29 Na' bçhek' xib beena' lawe'na' na' chonyeshee, chi'ene': “Wdapgach yel' chxenlall' cha', wiyixjkz' doxen daa chbagaa cho'.” 30 Na' bi goonile', san lii wyajtíe' ji'ene'

* 18:22 Guiyon shin'chopə shii: bal yishka' nyoj de dill' griegona' nan gall shii de guiyonshin'. Per chopten zejín toshiizi chiyal' yizi'xecho che ben'.

part kwenche wloogake'ne' lillyana' axt ki yiyixjche' doxen daa chalee che'. ³¹ Na' ka ble'i wen llinka' sto ka bene', na' gokyesh'gakile' na' jayellgake' xane'ka' doxen ka bene'. ³² Na' wizax xane'na' le', chi'ene': "Ben' mal inleeb nako'. Nad' ben' ka'z doxen daa chaloo cha' daa benyeshoo lawa'. ³³ Ka'kzan nan chiya' yiyeshilo' bish' ljwello'na' chal' cho', ka biyeshid' li'." ³⁴ Na' daa le bllaachga xane'na', bene'ne' lo na' ben'ka' wdixjgake'ne' lillyana' na' wit chingake'ne' axt ki yiyixjche' doxen daa chalee.

³⁵ Na'ch goll Jesúza' legake':

—Ka'kzan goni Xa'na' beena' zoa yabana' le' shi bi si'xen che ljwell-le do yichj do lall'le.

19

Bi chiya' yilaa ljwell ben'ka' nkaa cheyin
(Mr. 10:1-12; Lc. 16:18)

¹ Na' ka biyoll be' Jesúza' dill'ki, bizee Galileana' na' biyaje' gana' mbani Judeana' daa lliá shlaa yao Jordánna'. ² Na' ben' zan zjanogake'ne', na' na' biyone' ben'ka' bi shao'.

³ Na' wbig' bal' fariseoka' lao Jesúza' daa gok-lall'gake' wi'e dill' dii wchixa'n le', na' che'gake'ne':
—¿Ade lsens yilaa xool ben' ni che bizə diido' chone' dii bi chiyoollalee?

⁴ Na'ch che' Jesúza' legake':

—¿Abin' wlable gana' nan ka wxé wzil yell-lioni Chioza' bene' benecha', ben' byo na' noolə? ⁵ Na' wne': "Daan, wlaa ben' byona' xaxneena' kat' ikaa che', na' soalene' xoolé'na' gakgake' toz." ⁶ Na' bich

nakgake' chop, san ba nakgake' toz. Na' daan bi chiyal' yilaa xool ben', la' Chiozan' ba btile' legake'.

⁷ Na' gollgake'ne':

—Na' ꞑbiꞑhe ben dii Moiséza' mandad kat' to ben' yilaa xoolena' chiyal' wlise' to yish dii we'n dill' bich nake' xoolena' wak yichoonene'?

⁸ Na' goll Jesúza' legake':

—Yel' widenag chelenan' be' dii Moiséza' latj yilaa xool-lena'. Per ka ben Chioza' ben' nechka', bi gokan ka'. ⁹ Nad' nia' le', shi nool chelena' bi chdalene' ben' yoblə, bi chiyal' yilaalene' na' yikaale nool yoblə, la' shi ka' gonle, na' chonle ka beena' zoalente xoolena' na' chdalene' noolə yoblə.

¹⁰ Na' ben'ka' nakgake'ne' txen gollgake'ne':

—Shi ka' nak che beena' chshagna', naklan wen kono wshagna'.

¹¹ Na' goll Jesúza' legake':

—Aga yog' ben' chajni'gakile' dga, lete ben'ka' chon Chioza' ka shajni'gakile'n. ¹² La' de dii chllonan wshagna' ben'. Bal ben' bi chshagna'gake' daa bi nak kwerp che'ka' wen ka chaljtegake', na' zi bale' bi chshagna'gake' daa bxinj benecha' kwerp che'ka'. Na' zi bale' bi chshagna'gake' daa cheenchgakile' gongake' xshin Chioza'. Beena' wlebe' dga, na' gonin che'.

Jwa'gake' bi'do'ka' lao Jesúza'
(Mr. 10:13-16; Lc. 18:15-17)

¹³ Na' wyaj ben' jwa' bi'do' che'ka' lao Jesúza' kwenche wxoa neena' yichjb'ka' na' we'lwille' Chioza' ni chegakb'. Per ben'ka' nakgake'ne' txen

bsheshlengake' beṅ'ka' zjwa' bi'do'ka'. 14 Na' goll Jesúza' legake':

—Li we' latj yid bi'do'ki lawa'ni, bi wllonle, la' Chioza' chṅabi'e loo yichjlall'do' beṅ'ka' nak ka legakb'.

15 Na' ka biyoll bṅoa na' Jesúza' yichj bi'do'ka', na'ch bizee ziyaje' gan yoblə.

To bi' wew', bi' wni'a, bshaljlem' Jesúza'

(Mr. 10:17-31; Lc. 18:18-30)

16 Na' bllin to bi' wew' lao Jesúza' che'b' le':

—Maestro, ¿bi dii wennan' chiyaḷ' gon' kwenḅe gat' to yel' mban ḅha' zejli kaṅi?

17 Na'ch goll Jesúza' leb':

—¿Biḅe chṅabzilo' nad' ḅe daa nak wen? Toz Chioza' nake' beṅ' wen. Na' shi cheenilo' gat' to yel' mban ḅho' zejli kaṅi, chiyaḷ' gono' diika' bllia Chioza' bia' goncho.

18 Na' goll bi' wewaane':

—¿Bera diika' chiyaḷ' gon', lla?

Na' che' Jesúza':

—Bi wito' beṅ', bi soaleno' nool bi nak nool ḅho', bi kwano' bi de ḅe beṅ', bi ḅhiljlalloo bizə gon iṅo' ḅe beṅ'. 19 Wdap balaan ṅaxṅoona' na' goki bish' ljwello'na' ka chaki kwino'.

20 Na' che' bi' wewaane':

—Yog' diika' chon' kana' naktia' bi'do'. ¿Berachan ni chyallj gon'?

21 Na' goll Jesúza' leb':

—Shi lekzilo' cheenilo' gako' dowalj beṅ' li beṅ' shao', biyaj jayet' yog' dii de ḅho' na' xmechinna' wyoon beṅ' yesh'ka', na' yido' gono' nad' txen. Na' kat' yillino' yabana' na' gon Chioza' li' yel' shawaa.

²² Na' ka beni bi' wewaa dga, nyesh' inleeb gokib' na' biza'b', la' bi' wni'a nleban nakb'.

²³ Na' goll Jesúza' beñ'ka' nakgake'ne' txen:

—Dii li nia' le', lallj inleeb chonan che beñ' wni'ana' yilline' yabana' gana' chñabia' Chioza'.

²⁴ Sto shii nia' le', lobe'ch te to kamey to xan yesh' aga ka to beñ' wni'a yilline' yabana' gana' chñabia' Chioza'.

²⁵ Na' bibangakile' ka wne', na' che' ljwellgake':

—¿Notg gak yillin lao Chioza', shka'?

²⁶ Na' bwia Jesúza' legake', na' golle':

—Ni to beñ' yell-liona' bi gak gone' dga, san Chioza' yog'lolte chak gone'.

²⁷ Na' che' Pédrona'ne':

—Neto' ba wlej yichjnto' yog' dii de chento' kwenche naknto' li' txen. ¿Bin gonnto' gan?

²⁸ Na' che' Jesúza' legake':

—Dii li nia' le', kat' illin lla yikob yog'lol dii de, nad', Beñ' Bsel' Chioza' Yell-lioni, kwi'a inabi'a gana' sho'a balaan xen wal, na' le', shllintele, nakle nad' txen kwe'le kwitaa kwenche inabia'lenle nad'. Na' yizi'le kwent shllin kwente yell che beñ' Israelka'. ²⁹ Na' nottez beena' ba wlej yichje' lille'na', beñ' bisheeka', beñ' zane'ka', xaxneeka', wa xiin xoole', wa yell-lio che' ni cha', Chioza'kzə wi'ene' dii zak' dii xen inleebch aga ka daa wlej yichje', na' lekzka' wi'ene' to yel' mban zejli kani. ³⁰ Per beñ' zan nakgake' beñ' zakii, wllin lla bich bi sak'gake', na' beñ' zan bi nakgake' beñ' zakii, wllin lla gagkake' beñ' zakii.

20

Jempl che wen llinka'

1 Na' wna Jesúza':

—Yel' wñabia' che Chioza' chzaklebin daa gok che to xan yell-lio beena' naz' yag uvana'. Na' shzildo' wzee zeje' zjtilje' wen llinka' kwenche lljengake' llinna' gana' naze' yag uvaka'. ² Na' bgaangake' dill' chixje' legake' che lla, na'ch bselee legake' gana' lljengake' llinna'. ³ Na' ba gok shon gor chon beñ' nechka' llinna' ka wyaje' dii yoblə gana' chak yaana', na' ble'ile' lle' beñ' bibi llin de gongake'. ⁴ Na'ch chi'e legake': “Li shaj li lljen llinna' gana' naz' yag uvana' na' chixj' le' daa chidol'le.” Na' wza'gake' zejgake' llinna'. ⁵ Na' do ka gobill wizaje' dii yoblə, na' lekzka' chida shonə, bizllelile' beñ' yoblə lljengake' llin che'na'. ⁶ Na' do ka chida gay', wizaje' dii yoblə na' bizle'ile' beñ' lle'z'gake'. Na'ch chi'e legake': “¿Bi'che bi benle llinna' ñaanlla?” ⁷ Na' goll beñ'ka'ne': “La' ni to kono b'che' neto' llinna'.” Na' golle' legake': “Li shaj, lla, li lljen llinna' gana' naz' yag uvana'.” ⁸ Na' ka wzeles yela' na' che' xan yag uvana' beena' ngoo lo nee llinna': “Biyax wen llinka' na' wdixjgake'. Zigaate beñ'ka' zi' wyoo llinna' chixjo', na' yiyoll-lin beñ'ka' wzolo nech.” ⁹ Na' bene' kon ka goll xane'na', na' wdixje' zigaate beñ'ka' wyoo llinna' do ka chida gay'. Na' wdixje' to toe' che llakzə. ¹⁰ Na' ka gol' chixje' beñ'ka' wyoogake' llinna' shzildo', gokgak-ile' wxoache' laxje'ka'. Per bich bi bxoe' san che llachokzə wdixje' legake'. ¹¹ Na' ka ba nox'gake' laxje'ka', wzologake' biz chon chnagake' che xan llinna', ¹² na' gollgake'ne': “Do lla wzento' lo bana' bennto' xshino'na' na' toz ka wdixjo' neto' len beñ'ka' zi' wyoo, na' zi' tgorchga bengake' llinna'.”

13 Na' che' xan llinna' toe': "Bish'dawaa, aga bi laxjo' chzeshaa. ¿Aaga bgaancho dill' che llan chixj' li'? 14 Wkaa laxjo'na', na' biyaj. Nad' cheenid' chixj' ben'ka' wyoo llinna' ba wlle'ch ka to daa ba wkoo. 15 Jwayishaz nad' bi gonid' xmechaa. ¿Anti chakziilo' daa chonid' ben' wen?"

16 Na' ka wde bzoa Jesúza' jempli, na' chi'e ben'ka':

—Ka'kzan ben' zan nakgake' ben' zakii, wllin lla bich bi sak'gake', na' ben' zan bi nakgake' ben' zakii, wllin lla gagkake' ben' zakii.

Sto shii wdixjee Jesúza' witgake'ne'

(Mr. 10:32-34; Lc. 18:31-34)

17 Ka ziyaj Jesúza' Jerusalénna' wnie' to ben'ka' shllinzə, chi'e:

18 —Naa ba ziyajcho Jerusalénna', gana' gongake' nad', Ben' Bsel' Chioza' yell-lioni, lo na' bxozka' chñabia' na' lo na' ben'ka' chli' chsedi leya', na' wchoglogake' witgake' nad'. 19 Na' gongake' nad' lo na' ben'ka' bi nak ben' Israel kwenche wtitgakile' nad' na' wit chingake' nad', na'tech wda'gake' nad' lee yag cruza', per ka gak shon lla yiban' ladj ben' wetka'.

Daa wñab xña' Jacóbona' len Juanna' lao Jesúza'

(Mr. 10:35-45)

20 Na' Jacóbona' len Juanna', ben'ka' nak xiin Zebedewa', wbig'lengake' xneeka' kwit Jesúza', na' xneeka' bchek' xibe'na' lawe'na' wñabile'ne' to goklen. 21 Na' goll Jesúza'ne':

—¿Bera goklenan cheenilo' gon' cho'?

Na' golle'ne':

—Cheenid' gongacho' goklen kweko' bi' cha'ki sh_laa wej kwito'na' kat'ka' illin lla inabi'o.

²² Na' goll Jesúza'ne':

—Ni bi nezile bin ch_nable. ¿Awizoile wtil-le yel' zak'zi'na' ka daa wtil' na' gak chele ka daa gak cha'?

Na' gollgake'ne':

—Wizokzinto'n.

²³ Na' goll Jesúza' legake':

—Lekzile wtil-le ka daa wtil', na' gak chele ka daa gak cha', per daa nale kwe'le sh_laa wej kwitaa bi nak lo na' gon' ka nale, san Xa'nan' ba mbeje' ben'ka' wi'en.

²⁴ Na' ben'ka' zi shi, bllaagake' Juanna' len Jacóbona' daa w_nabgake' kwe'gake' kwit Jesúza'.

²⁵ Na' bitop Jesúza' legake', na' chi'e:

—Nezkzile zoa ben' w_nabia' na' ben' zakii che to to yell na' chongakile' kon daa nazan chegake' ben' yell che'ka'. ²⁶ Per aga kan' chiya_l' gonle. Shi nole cheenile gakle ben' mbejlawin chiya_l' gakle ka to ben' chon xshin ben'. ²⁷ Na' shi nole cheenile gakle ben' zakii, chiya_l' gakle ka ben' ndoo lla yel chone' xshin ben'. ²⁸ Ka nak nad', Ben' Bsel' Chioza' Yell-lioni, aga bid' kwenche gaklen ben' nad', san bid' kwenche gaklen' ben' na' wi'a yel' mban cha'ni kwenche yisla' ben' zan lao saaxya che'ka'.

Jesúza' biyone' chop ben' lchol

(Mr. 10:46-52; Lc. 18:35-43)

²⁹ Na' ka biza' Jesúza' yell Jericóna' len ben'ka' nakgake'ne' txen, ben' zan inleeb janogake'ne'.

³⁰ Na' cho'a neza' chi' chop ben' lchol, na' ka ben-gakile' bide Jesúza' kwite'ka' na'ch besyaagake', che'gake':

—iXan', xiin dia che dii Daví, biyesh'lall'gachi neto'!

³¹ Na' ben'ka' zejlen Jesúza' bsheshlengake' legake' kwenche nan kwe'gake' lliz, per zizikla besyaachgake', che'gake':

—iXan', xiin dia che dii Daví, biyesh'lall'gachi neto'!

³² Na'ch wlez Jesúza' na' wnie' ben' lcholka', na' chi'e legake':

—¿Beran cheenile gon' chele?

³³ Na'ch che' ben' lcholka'ne':

—Xan', bengach ka ile'into'.

³⁴ Na' biyesh'lallii Jesúza' legake' na' bexee jalawe'ka'. Na' katena' gok ble'gakile' na' janogake' Jesúza'.

21

Bllin Jesúza' Jerusalénna'

(Mr. 11:1-11; Lc. 19:28-40; Jn. 12:12-19)

¹ Na' ka ba zoa yillingake' Jerusalénna', bllingake' cho'a yell Betfagéna' daa llia kwit Yaa Olívoza'. Na' wlej Jesúza' chop ben'ka' nakgake'ne' txen na' bselee legake' yella'. ² Na' chi'e legake':

—Li shaj yella' daa llia shlaana'. Na' ile'ile to burr ba noolə da'b yag na' nche' to xiindo'b. Na' wsell-leb wche'legakb nilə. ³ Na' shi no bi ina le', na' ye'lene': “Xannto'nan' chyalljile' legakb, na' lii yidsantento'gakb.”

⁴ Na' daa gok ka', billinin ka bzej dii beena' wdixjee daa goll Chioza'ne' daa wne':

⁵ Li ye' beṇ'ka' lle' yell Siónna':
 “Li wwia, ba za' beṇ' wṇabia' chelena',
 nake' beṇ' gaṁjlall' na' llie' to burrdo';
 xiin to ba choa' yoa'.”

⁶ Na' wza' beṇ'ka' nakgake'ne' txen zejgake' yelldo'na' gana' bsel' Jesúza' legake' na' bengake' kon ka golle' legake'. ⁷ Na' jxi'gake' burra' len xiinba' na' bche'gake' legakb kwit Jesúza'. Na'ch bxoagake' xe'ka' koll'bka', na'ch wllia Jesúza'b zeje' Jerusalénna'. ⁸ Na' beṇ' zan wdixjgake' xe'ka' tneza', na' zi bale' bchoggake' no zin na' wdixjgake'n tneza' gana' zeje'. ⁹ Na' beṇ'ka' llialo lao Jesúza', na' ka'kzə beṇ'ka' nogake'ne', wzologake' chosyaagake', nagake':

—¡We'la'ocho beeni nak xiin dia che dii Davina!
 ¡Gonleeyshga Xancho Chioza' beeni ba bselee! ¡Li da we'la'ocho Chioza' zoa yabana'!

¹⁰ Na' ka wyoo Jesúza' yell Jerusalénna', na' yog' beṇ'ka' lle' na' bllesh bcheengake', nagake':

—¿Noraz beeni bla' ni, lla?

¹¹ Na' beṇ'ka' che'gake':

—Beenin Jesúza' beṇ' Nazareta' yell daa mbani Galileana', beena' chyixjee daa che' Chioza'ne'.

Bishesh Jesúza' beṇ'ka' chit' chde lesh' chyoodo'na'

(Mr. 11:15-19; Lc. 19:45-48; Jn. 2:13-22)

¹² Na' wyoo Jesúza' lesh' chyoodo'na' na' bisheshe' yog' beṇ'ka' chit' chde na'. Na'ch bishi'e mes che beṇ'ka' chsha' mecha' na' bzoles bzolline' gana' chi' beṇ'ka' chit'gake' palomka'. ¹³ Na' ka wde bene' ka' chi'e legake':

—Cho'a xtill' Chioza' nan: “Lillaa nakan ga choe'lwill ben' nad'”, na' le', ba nonzlen ka to ga chdop chllag wban.

14 Na' shlak zoa Jesúza' yoodo'na', baḷ ben' l̄chol̄ na' ben' bi chak sa'gake' wen bllingake' lawe'na', na' biyone' l̄egake'. 15 Na' b̄xozka' ch̄n̄abia' na' ben'ka' chli' chsedi leya' l̄e bllaagake' ka ble'gakile' yel' wakka' chon Jesúza', na' bengakile' chosyaa bi'do'ka' lesh' chyoodo'na', che'gakb': “iWe'la'ocho beeni nak xiin̄ dia che dii Davina!” 16 Na' gollgake' Jesúza':

—¿Achenilo' ka na bi'do'ka'?

Na' chi'e l̄egake':

—Awe, chenzid'. ¿Abin' wlable Cho'a Xtill' Chioza' gana' na:

Ch̄chino' cho'a loll' bi' xkwid'do'ka' na' bdo'ka' ni chall' chxop kwenche chol̄ ch̄negakb' li' ka chiyaḷ' we'la'o ben' li'?

17 Na'ch bicheje' ladj ben'ka', na' bizee yell Jerusalénna' ziyaje' yell Betániana' gana' wdie' yel.

Jesúza' bene' ka wbill to yag yixwew

(Mr. 11:12-14, 20-26)

18 Na' betiyo biza'gake' shzildo' yell Betániana' kwenche biyajgake' yell Jerusalénna' dii yoblə, na' tneza' wzolo chdon Jesúza'. 19 Na' ble'ile' to yag yixwew dii zoa cho'a neza', na' jawie' shi llían. Per zeelo xlaguinna'z llía. Na' golle'n:

—¡Batch kwio' yixwewa'!

Na' katena' lii wbillte yaga'. 20 Na' ka ble'i ben'ka' nakgake'ne' txen ka gok, l̄e bibangakile', na' che'gake'ne':

—¿Berache lii wbilltelikazə yag yixwewa'?

21 Na'ch che' Jesúza' legake':

—Dii li nia' le', shi nonlilall'le Chioza' na' bi gakhoplall'le, aga daazan gak gonle, san wakte ye'le yaani: “Bkwas, na' jsoa loo niso'da'na'”, na' gak ka ye'len. 22 Na' yog' daa inabile Chioza' ka we'lwill-lene' gonkze'n kon shi nonlilall'lene'.

Yel' wnabia' che Jesúza'

(Mr. 11:27-33; Lc. 20:1-8)

23 Na' wyaj Jesúza' dii yoblə yoodo'na' kwenche jali' jasedile' ben'ka'. Na' shlak chli' chsedile' legake', bxozka' chnabia' na' ben' golka' chnabia' ben' Israelka' bllingake', na' che'gake'ne':

—¿Nora lsens cheyi chono' diiki? ¿No ben li' yel' wnabia'na'?

24 Na' goll Jesúza' legake':

—Lekzka' de to dii cheenid' inabid' le'. Na' shi le' inale nad' daa inabid' le', na' inia' le' no lsens cheyi chon' yog' diiki. 25 Li inashki nad', ¿noran bsel' Juanna' kwenche bidchoe' ben' nisa'? ¿AChioza' anti ben' yell-lioni?

Na' wzologake' chakguedgake' to lezgake', na-gake':

—Shi ye'chone' Chioza' bseleene' na'ch ine' cho': “¿Bi'che bi wyajle'le che', lla?” 26 Na' shi ye'chone' ben' yell-liona' bselee Juanna', le xoll bi goni ben'ki cho', la' yog'lóle' chajle'gake' Chioza' bselee Juanna' kwenche bidtixji'e daa golle'ne'.

27 Na'ch che'gake' Jesúza':

—Bi nezinto' non bsel' dii Juanna'.

Na' goll Jesúza' legake':

—Lekzka' nad', aga wnia' le' nora lsens cheyin chon' diiki.

Jempl che chop xiin ben'

²⁸ Na' goll Jesúza' legake':

—¿Bi ka inale cheyi dga wseesaa? To ben' zoa chop xiine', na'ch golle' bi'na' to: “Xiindawaa, wyaj-gach jen llinna' gana' nazcho yag uvana'.” ²⁹ Na' che' xiine'na'ne': “¿Bi sha'!” Per na'tech biyajib' na' wyajkzb' jem' llinna'. ³⁰ Na' wyaj xabaa jelle' bi'na' sto ka golle' bi' bish'baa, na'ch goll bi'na'ne': “Wakkzə xa, na' sha'.” Per bi wyajb'. ³¹ Li inashki, ¿nora bi'ka' chop ben ka cheeni xab'ka'?

Na' goll ben'ka'ne':

—Bi'na' golle' ka' dii nech.

Na'ch che' Jesúza' legake':

—Dii li nia' le', ben' wichixjka' na' noolə wdaka', lelgaken' zigaate we'gake' latj inabia' Chioza' legake' aga ka le'. ³² La' ka bid Juanna' bchoe' ben' nisa', bidzajniile' le' ka chiyal' soa kwezle, per le' aga wyajle'le che', lete ben' wichixjka' na' nool wdaka'chgan wyajle'gake' che'. Na' le' naalla, la'kzi gokbe'ile ba chajle'gake' che', aga biyaj bileni saaxya cheleka' na' shajle'le che'.

Jempl che wen linka' nak ben' mal

(Mr. 12:1-12; Lc. 20:9-19)

³³ 'Li wzenag jempli sto. Wzoa to ben' biyaze' yag uva lo yell-lío che'na' na'ch wlo'en leej, na'tech beshawee to ga wsigake' uvaka'. Na' lekzka' bene' to yoo sibə gana' kwia beena' gap wwie'n.

'Na'tech bene'n lo na' to chop ben' na' wzee zeje' zit'. ³⁴ Na' ka gol' yishibgake' uvaka', na'ch bselee to chop wen llin che'na' gana' lle' ben'ka' chapgake' yag uvaka' kwenche lljaxi'gake' uvaka' daa chidolee. ³⁵ Per ka bllingake' gana' lle' ben'ka'

chapgake' yag uvaka', na'ch bex'gake' ben'ka' bllin, toe' bet wdingake'ne', na' stoe' bettekgake'ne' na' beena' sto btakwgake'ne' yaja'. ³⁶ Na'ch bsel' xan yag uvaka' zanch wen llin che'ka' aga ka to ben'ka' bselee dii nech, per ben'ka' chap yag uvaka' bengakile' legake' ka bengakile' ben' nechka' bllin.

³⁷ 'Na'ch xan yag uvaka' bselee kwinkz xiine'na', chakile': "Wapgake' balaan bi' cha'ni na' we'gake'b' daa chido_laa." ³⁸ Per ben'ka' chap yag uvaka' ka ble'gakile' xiine'na', na'ch che' ljwelle': "Bi'nin xiin xan yag uvaki na' leban' yigaanlem' yog' dii nape'. Li da witchob' kwenche yigaanlencho daa gaki cheb'." ³⁹ Na'ch bex'gake'b' bibejgake'b' gana' lle' yag uvaka' na' betgake'b'.

⁴⁰ Na' Jesúza' chi'e ben'ka' lle' na':

—¿Nakra ka chakile gon xan yag uvaka' che ben'ka' chapgake'n ka illine' kwine'?

⁴¹ Na' che' ben'ka':

—Ba nakten wite' legake' na' bi yiyeshile' legake' daa nakgake' ben' mal. Na' yiyone' yell-lío che'na' lo na' ben' yoblə, ben' yiyoe'gake'ne' daa chido_lee kat' yishibgake'n.

⁴² Na' goll Jesúza' legake':

—¿Abigan' wlable Cho'a Xtill' Chioza' gana' na: Yaja' daa bi wyoolall' wen yooka', leyen'lannan' yaja' daa ba nchejcha yooná'. Dgan ben Xancho Chioza' na' nakan to dii yibanicho?

⁴³ Daan nia' le', kon ka gon xan yag uvaka' yiyone' yell-lío che'na' lall' na' ben' yoblə, ben' gongake' ka cheenile', ka'kzan gon Chioza' chele. Kwej yichje' le', na' ben'ka' wzenaggake' che', si'gake' banez yel' wñabia' che'na'. ⁴⁴ Na' ka nak yaja', nottezə ben'

lljchaze' lawinna' kwiayee, na' shi idakwan beṅ',
ax̄t wshoshjan le'.

⁴⁵ Na' ka biyoll bzenag b̄xozka' chṅabia'
na' fariseoka' jemplki bzoa Jesúza', na'ch
gokbe'gakile' ch̄egake'n chṅie'. ⁴⁶ Na'ch
goklall'gake' gox̄'gake'ne', per bi biyaxjgakile',
la' blleb̄gake' beṅ'ka' lle' na' daa chajle'gake' Jesúza'
nake' to beṅ' chyix̄jee daa che' Chioza'ne'.

22

Jempl che to wishagna'

¹ Na' Jesúza' bseesile' legake' sto jempl, chi'e:

² —Yel' wṅabia' che Chioza' chzaklebin to
beṅ' wṅabia', beṅ' bene' to lṅi che xiine'na' ka
bshagna'b'. ³ Na' bselee wen llin che'ka' lljanegake'
beṅ'ka' ba bye', per beṅ'ka' bye' bi goongakile'
shajgake'. ⁴ Na'ch bizselee zi shkwen wen llin
che'ka' chi'e legake': “Li lljell beṅ'ka' ba bya' yid lṅi
che bi' cha'na' ba de daa gaocho. Ba betgake'
goon̄ cha'ka' na' nochl̄ə baka' le nak, na' ba
de yel' wawa'. Li lljellgake' yidgake' kwenche
yeej gaocho.” ⁵ Per beṅ'ka' ba bye' bi bengake'
kwent daa goll wen linka'. Toe' wyaj jawia' yell-
lio che'na' na' stoe' wzee zeje' delgens che'na'.
⁶ Na' beṅ'ka' sto beṅ'gake' wen linka' na' biya
dii bengakile' legake' ax̄t ka witgake'. ⁷ Na' le
bllaachga beṅ' wṅabia'na', na'ch bselee soldad
che'ka' kwenche jetgake' legake' na' bzeygake' yell
che'ka'. ⁸ Na'ch chi'e wen llin che'ka' sto: “Ba gok
daa yeej gaocho, na' wentelan bi wlen beṅ'ka' bya'.
⁹ Na' li shaj lyell na' li wche' kon no beṅ' yillagle
tneza' kwenche yidgake' yeej gaogake'.” ¹⁰ Na'ch

wza' wen linka' zejgake', na' jxi'gake' kon no ben' billaggake', ka ben' wen ka ben' mal. Na' billa'cha lill ben' wñabia'na'.

¹¹ Na' ka wyoo ben' wñabia'na' chwie' ben'ka' ba ndop nllag, na' ladj ben'ka' len to ben' bi nakw xe'na' daa chiyal' gakwe' gana' chak wishagna'na'.

¹² Na' goll ben' wñabia'na'ne': "Bish'dawaa, ¿nakra gok wyoozo' na' bi nakw xo'na' daa chiyal' gako' kwenche leno' gani chak wishagna'ni?" Na' beena' bikzə bi billet-lallee yeene'.

¹³ Na'ch che' ben' wñabia'na' ben'ka' chde yel' wawa': "Li wchej ni'a na' beeni na' li yibeje' na' li wzalee gana' shgasj shchol, gana' kwellyeshee na' gaoxaxj leye'na' daa le gakshejlallee." ¹⁴ La' ben' zan nak ben'ka' chax chñab Chioza', per balchagagake' kweje' gakgake' lall' nee.

Wñabgakile' Jesúza' shi chiyal' chixjgake' daa chñab ben' wñabia'na'

(Mr. 12:13-17; Lc. 20:19-26)

¹⁵ Na' biza' fariseoka', na' wloogake' xnezi naklə gongake' kwenche we' Jesúza' dill' dii wchixa'n le'.

¹⁶ Na'ch bsel'gake' bal' ben'ka' nakgake'ne' txen na' zi bal' ben'ka' nak Heródeza' txen kwenche wyaj-gake' lao Jesúza' na' jellgake'ne':

—Maestro, nezinto' nako' ben' li ben' shao' na' chli' chsedilo' ben' che nez li che Chioza' kon ka nakan, na' bi chshoo cho'a xtilloona' lao nottezə ben', la' bi chwio' no nakgake'. ¹⁷ Daan cheeninto' inagacho' neto' nak ka chakilo': ¿Achiyal' chixjcho daa chñab ben' wñabia' Césara', anti bi chiyal' chixjchon?

¹⁸ Na' gokbe'i Jesúza' aga do lall'gaken' goll-gake'ne' ka', na'ch chi'e legake':

—Le' ben' wxiye', aga dii leilen nale ka'. ¹⁹ Li wli'shki nad' to mech daa chyixjile ben' wñabia'na'.

Na' be'gake'ne' to mech. ²⁰ Na' goll Jesúza' legake':

—¿Nora cho'alawin na' no leyin da' lee mechi?

²¹ Na'ch che'gake'ne':

—Che ben' wñabia', Césaran'.

Na' che' Jesúza' legake':

—Na'len, li we' Césara' daa naki che', na' lekzka' li we' Chioza' daa naki che'.

²² Na'ch bibangakile' daa goll Jesúza' ka'. Na' biza'gake' kwite'na' ziyajgake'.

Saduceoka' wñabgake' nak gak kat' yiban ben' wetka'

(Mr. 12:18-27; Lc. 20:27-40)

²³ Na' lo llana'kzə saduceoka', ben'ka' bi chajle'gake' yiban ben' wetka', wyajgake' lao Jesúza', na' wñabgakile'ne':

²⁴ —Maestro, dii Moiséza' wne' shi to ben' byo guete' na' kono xiine' wzoa, ben' bisheena' chiyal' yikee xool dii ben' bisheena' kwenche soa xiin dia che dii ben' weta'. ²⁵ Na' ki gok che gall bish' ben' nakgake' neto' txen. Ben' necha' bshagnee, na' wite' na' kono xiine' wzoa, na' ben' bishee, ben' wchopina', bikee xoolena'. ²⁶ Na' lekzka' wit ben' wchopina' na' kono xiine' wzoa. Na' ka'kzə wit ben' wyonina' na' axt biyate ben'ka' gall wit. Na' ni togake' bi wzoa xiingake'. ²⁷ Na' ka wde wit yog'lolē' na'ch lekzka' wit noola'. ²⁸ Na' kat' yiban ben' wetka', naa, ¿nora ben'ka' gall bish' gaki xoolē' noola'? la' yog'lolen' wkaagake'ne'.

²⁹ Na'ch che' Jesúza' legake':

—Naklejzilen daa bi nezile ka na Cho'a Xtill' Chioza', na' ka nak yel' wak che'na'. ³⁰ La' kat'

yiban beṅ' wetka', koch no yikaa ljwellin, ni koch no wit' wde xiṅin, san yiyakgake' ka anjlka' lle' yabana'. ³¹ Na' ka nak daa yiban beṅ' wetka', naa, ḡabin' wlable daa wna kwin Chioza', gana' nan: ³² “Nad nak' Chios che Abrahama', Isaaca' na' Jacoba'”? Na' bi nake' Chios che beṅ' wet, san nake' Chios che beṅ' ban, la' lao Chioza' mban beṅ'ki.

³³ Na' ka beni beṅ'ka' lle' na' daa wna Jesúza', le bibangakile' ka chli' chsedile'.

Daa llialote daa bllia Chioza' bia' goncho
(Mr. 12:28-34)

³⁴ Ka wṅezi fariseoka' ba wleklli Jesúza' saduceoka', na'ch wyajgake' kwite'na'. ³⁵ Na' to beena' chli' chsedí leya' wṅabile' Jesúza' kwenchezə wchixeene', chi'e:

³⁶ —Maestro, ḡberan llialote nllia leya' bia' goncho?

³⁷ Na' Jesúza' golle'ne':

—“Chiyal' gakilo' Xancho Chioza' do yichj do lalloo na' axt ga zeelo chajniilo'.” ³⁸ Dgan liizelozi chonte na' llialon lawi yog' diika' nllia leya' bia'. ³⁹ Na' de wchopina' nakan katekzə dii necha', na' nan: “Chiyal' gakilo' bish' ljwello'ka' ka chaki kwino'.” ⁴⁰ Na' diiki chop chejin doxen ka na leya' len diika' bzej dii beṅ'ka' wdixjee daa goll Chioza' legake'.

Crístona' nake' xiṅ dia che dii Davina'
(Mr. 12:35-37; Lc. 20:41-44)

⁴¹ Na' shlak ndop nllag fariseoka' kwit Jesúza'
⁴² wṅabile' legake':

—¿Nak ka chakile che Crístona', beena' in̄abia'?
¿No xiin̄ dia cheyin nake'?

Na' che'gake'ne':

—Xiin̄ dia che dii Davinan'.

⁴³ Na' che' Jesúza' legake':

—Na' ¿berache ben Espíritu Sántona' ka goll dii Davina'ne': “X̄an”’? La' kin na daa bzeje':

⁴⁴ X̄ancho Chioza' golle' X̄an'na':

“Wche' kwit' de sh̄lini,

shlak wzoa' x̄ni'ona' ben'ka' chakzbani li'.”

⁴⁵ Na' shi kwín dii Davina' golle' Crístona': “X̄an”’,
¿berache nazle nake' xiin̄ dia che', shka'?

⁴⁶ Na' ni toe' bi gok yilliigake' x̄tilleena'. Na' zeelo kana' koch no biyaxji bi in̄abgakile'ne'.

23

Jesúza' chawe' xya che fariseoka' na' ben'ka' chli' chsedi leya'

(Mr. 12:38-40; Lc. 11:37-54; 20:45-47)

¹ Na'ch Jesúza' golle' ben'ka' nakgake'ne' txen len ben'ka' lle' na', chi'e:

² —Ben'ka' chli' chsedi leya' na' fariseoka' nak lo na'gake' wzajni'gakile' ben' daa bzej dii Moiséza'.

³ Na' chiyal' wzenagle chegake' kat' chzajni'gakile' le' leya' na' gonle ka nan. Per bi gonle ka chongake', la' legake' bi chongake' ka nagake' chiyal' gonle. ⁴ Dii zan dii che'gake' ben' chiyal' gongake',

na' nakan ka to yoa' xen dii chwa'gake' ben' dii kono so saki, na' legake' bikz bi chda na'gake' kwenche gaklengake'. ⁵ Na' yog' diika' chongake' chongake'n kwenchezə ile'i ben' ka chongake' na' we'la'ogake' legake'. Na' kajdo'ka' nak de yid daa yoo lat' Cho'a X̄till' Chioza' daa chda' loxgue'ka'

na' daa ch̄chel neeka' chongake'n dii xench aga ka ch̄e beṅ' yoblə, na' chton̄chgage' lox xe'ka' aga ka ch̄e beṅ' yoblə. ⁶ Na' kat' chajgake' l̄nika', le chibagakile' kwe'gake' gana' chbe' beṅ'ka' zakii, na' lekzka'yen' chjengake' gana' chdop chllaggake' choe'lwillgake' Chioza'. ⁷ Na' le chibagakile' gap beṅ' legake' balaan̄ kat' chillaggake' legake' ga lle' lla' beṅ' na' ye'gake' legake': “maestro”.

⁸ 'San le', bi we'le latj ina beṅ' le' “maestro”, la' toz nadaan nak' Maestro chele na' yog'le nakle ka bish' l̄jwellin. ⁹ Na' kono ye'le “xa” lo yell-lioni, la' toz Chioza', beena' zoa yabana', nake' X̄ale. ¹⁰ Ni bi we'le latj in̄agake' le' “maestro”, la' toz nad', Cristo, nak' Maestro chele. ¹¹ La' beena' nak beṅ' gax̄jlall' na' chaklene', beenan' nake' beṅ' zak'chi lad̄jena'. ¹² Na' beena' chon kwine' beṅ' zakii, Chioza' gone'ne' beṅ' bibi zakii. Na' beena' chon kwine' ka beṅ' bibi zakii, Chioza' gone'ne' beṅ' zakii.

¹³ 'iNyesh'laz gak ch̄ele, le' chli' chsedile' leya' na' le' fariseo, daa nakle beṅ' wxiye'! La' chsej chllonle gombia' beṅ' yel' w̄nabia' ch̄e Chioza', na' ni bi choe'le latj in̄abi'e le', ni bi choe'le latj ch̄e beṅ'ka' cheengakile' in̄abi'e legake'.

¹⁴ 'iNyesh'laz gak ch̄ele, le' chli' chsedile' leya' na' le' fariseo, daa nakle beṅ' wxiye'! La' chkaale lill nool wizebka' na' choe'lwill-le Chioza' ssha n̄leb kwen̄che gaki beṅ' nakle beṅ' wen. Na' daa chonle ka', Chioza' wsak'zi'che' le' aga ka beṅ' yoblə.

¹⁵ 'iNyesh'laz gak ch̄ele, le' chli' chsedile' leya' na' le' fariseo, daa nakle beṅ' wxiye'! Chdale to ni to na' chyil̄je beṅ' wsede' daa chli' chsedile. Na'

kat' chllelilene' chónlene' ben' malch aga ka le' na' chlliayi'chlene' axt choplə ka to ba mbiayi'le.

¹⁶ ;iNyesh'laz gak chele, le' nakle ka ben' lchol, ben' chakile' wak wchi'e sto ben' lchol! La' nale: "Shi to ben' wchebe' to dii gone' na' wzoe' yoodo'na' de taschiw kwenche gone' daa bchebe', bi chonan byen gone'n." Na' chiznale: "Shi wzoe' de taschiw ora' daa de loo yoodo'na', na'chan chiya! gone' daa bchebe'." ¹⁷ ;Le' nakle ka ben' lchol daa bi nteyile! ;Abi chakbe'ile zak'ch yoodo'na' aga ka ora'? La' yoodo'nan' chonan kwenche ora' de lo'inna' nakan che Chios. ¹⁸ Na' lekzka' chiznale: "Shi to ben' wchebe' to dii gone' na' wzoe' de taschiw gana' chzeygake' bayix'ka' chitgake' kwenche choe'la'ogake' Chioza', bi chonan byen gone' daa bchebe'. Per shi wzoe' de taschiw bayixaa chxoagake' lawinna', na'chan chiya! gone' daa bchebe'." ¹⁹ ;Le' nakle ka ben' lchol daa bi chajniile! ;Abi chakbe'ile' gana' chzeygake' bayixaa chzanile we'le Chioza' zak'chan aga ka bayixaa chzeygake' lawinna'?, la' gana' chzeygake'b chonan leb ba che Chios. ²⁰ La' beena' chcheb wi'e to dii wi'e na' chzoe' de taschiw gana' chzeygake'b, aga toz lennan' chzoe' de taschiw, san lekzka' len yog' daa xoa lawinnan'. ²¹ Na' beena' chcheb wi'e to dii wi'e na' chzoe' de taschiw yoodo'na', aga toz yoodo'nan' chzoe' de taschiw, san lekzka' len Chiozan' daa nakan lill xlatje'. ²² Na' lekzka' beena' chcheb wi'e to dii wi'e na' chzoe' de taschiw yabana', aga toz yabanan' chzoe' de taschiw, san len Chiozan' daa nakan gana' chnabi'e.

²³ ;iNyesh'laz gak chele, le' chli' chsedile leya' na'

le' fariseo, daa nakle beṅ' wxiye'! Choe'le Chioza' diézmona' axt len yixweja', aníza', na' cominna', per bi chonle daa lliálotech daa nllia Chioza' bia' goncho. Dii lliálotech goncho daa nak shli, yiyesh'lallichó beṅ', na' gonlilall'cho Chioza' do yichj do lall'cho. Diikin chiyaḷ' gonle, per lekzka' bi chiyaḷ' wsanle gonle diika' sto. ²⁴ ¡Le' nakle ka to beṅ' lchol beṅ' chakile' wak wchi'e sto beṅ' lchol! Na' chonle ka to beṅ' chone' byen chibeje' to bi'a lesdo' loo yel' wao che'na' na' bi chakbe'ile' chebe' to kamey.

²⁵ ¡Nyesh'laz gak chele, le' chli' chsedile leya' na' le' fariseo, daa nakle beṅ' wxiye'! Nakle ka xig' yeen dii nxi nyech kolliinna' per lo'inna' bi nxe bi nzak' nakan, daa chonle ka chaki beṅ' nakle beṅ' wen per le chzelall'le bi dii de che beṅ' na' chbanlen. ²⁶ Na' le' fariseo, ¡nakle ka beṅ' lchol daa bi chajniile! Li yiyaj yileni daa chonle kwenche gakle beṅ' wen ka chaki beṅ' nakle, na'ch gakle ka xig' yeen dii nxi nyech ka loolə ka koll'lin.

²⁷ ¡Nyesh'laz gak chele, le' chli' chsedile leya' na' le' fariseo, daa nakle beṅ' wxiye'! La' nakle ka to lill beṅ' wet dii nyebgake' yiw' na' nla' lawinna' xochi, per lo'inna' lle' lla'n llit wetka' na' bichlə dii zban. ²⁸ Kan' nakle le' daa chonle ka chaki beṅ' nakle beṅ' li beṅ' shao' per loo yichjlall'do'lena' lle' lla'n de wxiye' na' dii mal.

²⁹ ¡Nyesh'laz gak chele, le' chli' chsedile leya' na' le' fariseo, daa nakle beṅ' wxiye'! Chon-shao'zle gana' bkwash'gake' dii beṅ'ka' wdxjee daa goll Chioza' legake' kani'yi, na' chonle xochi gana' bkwash'gake' nochlə beṅ'ka' gok beṅ' li beṅ' shao'. ³⁰ Na' nale: “Sheḷ'ka' neto' ba zoanto' kana'

wzoa dii xozxto'nto'ka' aga bennto' legake' txen ka betgake' dii ben'ka' wdixjee daa goll Chioza' legake'." ³¹ Per kwinkzlen chli'le nakle toz ben'ka' betgake' dii ben'ka' wdixjee daa goll Chioza' legake' kani'yi, la' toz ka chonlenle legake'. ³² iNa' li yisyoll li yisto li gon dii mala' daa bi biyoll gon dii xozxto'leka'!

³³ 'iLe' nakle ka bel znia! Bi gakile shi wilale lo yi' gabila'. ³⁴ Daan wselaa ben' chixje'gakile' le' daa yepgakee. Wselaa ben' sin' ben' chajni kwenche wli' wsedgakile' le' cho'a xtilaana'. Per balgake' witle, na' balgake' wda'le lee yag cruza', na' balgake' wit chinle gana' chdop chllagle choe'lwillle Chioza', na' zi balgake' lljalagle to to yellka' gana' illingake'. ³⁵ Na' daa gonle ka', yidobile yel' wit che yog'lol ben' li ben' shao'ka' bet dii xozxto'leka', wzolozin dii Abela' beena' gok ben' li ben' shao', axt dii Zacariaza', xiin Berequiaza', beena' betgake' latja' daa de cho'a yoodo'na', kwit gana' chzeygake' bayix'ka'. ³⁶ Dii li nia' le', ka le' zoale naa chidol'le sak'zi'le che yog' daa ben dii xozxto'leka'.

Jesúza' gokyeshile' che ben' Jerusalénka'
(Lc. 13:34-35)

³⁷ 'iLe' ben' Jerusalén, le' chitle ben'ka' chyixjee daa che' Chioza' legake', na' chlliale yaj ben'ka' chselee chixje'gakile' le' cho'a xtilleena! iZan shii goklallaa gon' chele ka chon jeda' chiyellb xiindo'bka' xan xilba', na' bi goklall'le! ³⁸ Na' naa ba wlej yichj Chioza' le', na' gani lle'le idesh iloan. ³⁹ Na' nia' le', bich ile'ile nad' axt kat'ch illin lla inale: "iGaklenshga Xancho Chioza' beeni ba bselee!"

24

Jesúza' bi'e dill' yiyinj yoodo'na'

(Mr. 13:1-2; Lc. 21:5-6)

¹ Na' ka bichej Jesúza' loo yoodo'na' kwenche yiyaje' gan yoblə, beŋ'ka' nakgake'ne' txen jabig'gake' kwite'na' na' wzologake' choe'lengake'ne' dill' ka xochi nak yoodo'na'.

² Na'ch che' Jesúza' legake':

—Yog' dga chle'ile naa, dii li nia' le' wllin lla kat' yiyinj doxenan, ni to yaj bich igaan koll' ljwellin.

Diika' gak kat' ba zoa te che yell-lioni

(Mr. 13:3-23; Lc. 21:7-24; 17:22-24)

³ Na'ch biyajgake' lo Yaa Olívoza', na' ka chi' Jesúza' lo yaana' na'ch wbig' beŋ'ka' nakgake'ne' txen na' xochitezə wŋabgakile'ne', che'gake':

—Cheeninto' ino' neto' batran gak daa ba wno'. ¿Nakran gak kat' ba zoa yiyedo' dii yoblə na' kat' ba zoa te che yell-lioni?

⁴ Na'ch che' Jesúza' legake':

—Wsak'yen'gale kwenche kono siye'z le'. ⁵ La' beŋ' zan ichej inazgake': “Nadaan Crístona'.” Na' beŋ' zan shajle'. ⁶ Na' yenile chak wdil to ni to na', per bi gakshejlall'le. La' dii chiyal'kz gakan, per aga ba bllin lla te che yell-lionin kat' ba chak ka'. ⁷ La' yidil'-len ljwell yellka' na' beŋ' wŋabia'ka' yidil'-len ljwellgake', na' kwe' yillwe', kwe' wbin, na' zan yell gak bedxo' wal. ⁸ Kat' ba chak diiki, shinz chzolo ka nak daa yen ile'i beŋ' yell-lioki.

⁹ Na'ch gongake' le' lo na' beŋ'ka' wchi' wsak' le', na' witgake' le', na' yog' beŋ' yell-lioki gakzban-gakile' le' daa nonlilall'le nad'. ¹⁰ Na' kat' ba chak diiki beŋ' zan bich gonlilall'gake' nad', na' gakzbani

ljwelle' na' gon ljwellgake' lo na' ben' malka'. ¹¹ Na' ichej zan ben' gonzgake' ka ben' chyixjee daa che' Chioza' legake', na' ben' zan shajle'. ¹² Na' daa kwe'chachga dii mala', ben' zan bich gакgakile' Chioza' ni bish' ljwelle'ka'. ¹³ Per beena' soachech gonlilallee nad' axt ka yiyoll diika' yen ile'ile', beenan' gat' to yel' mban che' zejli kani. ¹⁴ Na' ka nak dill' wen dill' kob che yel' wñabia' che Chioza', chonan byen ljtixjeegake'n doxen yell-lioni kwenche yog'lol ben' yengakile'n, na' kana'chan te che yell-lioni.

¹⁵ 'Dii Daniela', beena' wdixjee daa goll Chioza'ne', bzeje' cheyi daa soa loo yoodo'na' daa wñitan balaan cheyinna', na' chiya! sele wñeyi bin zejlin. Na' kat' ile'ile'n loo yoodo'na' ¹⁶ kanan' ben'ka' zoa Judeana' chiya! wxonjgake' shajgake' yaa yaoka'. ¹⁷ Na' beena' llia koll' lille'na' ni bich gal' yiyetje' ljaleje' dii de loo yoo lille'na'. ¹⁸ Na' beena' chda lyixaa ni bich gal' yiyaje' lille'na' ljaxi'e xe'na'. ¹⁹ ¡Nyesh'laz gak che noolka' noa' na' noolka' chwall' chxop llana' gak ka! ²⁰ Li inabi Chioza' kwenche llana' wxonjile dga bi gakan kat'ka' chbe' dii zaga' wa to lla sabd, llana' chombaancha. ²¹ La' yel' zak'zi' wal inlleban nak daa yen ile'ile, daa konon' yen ile'kzi dezd ka wxe wzil yell-lioni axt naa, na' kat' ba wde gokan kochno yen ile'i ka len. ²² Na' shi Chioza' bi wzeshee llaka' gak ka', kono yila, shel'ka'. Per wzesheen daa chakile' ben'ka' ba wleje' kwenche nakgake' lall' nee.

²³ 'Na' llaka' chak ka' shi no ina le': "Li wwia, ni ze Crístona", wa ine' le': "Na' zie", bi shajle'le.

24 La' wchej beṇ' siye'gake', inazgake': "Nadaan Crístona", wa "Nadaan chyixji'a daa na Chioza". Na' lekzka' gongake' dii gonan ka yibani beṇ', na' gongake' yeḷ' wak xen kwenche siye'gake' beṇ', axt shel' wxegakile' siye'gake' beṇ'ka' ba wlej Chioza' nakgake' lo nee. 25 Na' naa ba bzenid' le' ka nak daa zi' gak. 26 Daan shi no inaz le': "Crístona' zoe' latja' gana' bibi chashj chleb", bi shajle; wa shi no inaz le': "Loo yoona' zoe'", bi shajle'le. 27 La' kat' nad', Beṇ' Bsel' Chioza' Yell-lioni, zizaa dii yoblə, gak ka chak kat' chep yes na' chzeeni'n doxen xan yabana'. 28 La' gana' de ba weta' nan' chllag llodka'.

Kat'yiyed Jesucrístona'

(Mr. 13:24-37; Lc. 21:25-33; 17:26-30, 34-36)

29 'Na' kate yiyoll yeḷ' zak'zi'ka', lii gakte shgasj shchol' lao wbillā' na' bewaa bich wzeeni'n na' beḷjka' ixopgakan, na' yog' diika' lia xan yabana' inibgakan. 30 Na'ch yog' beṇ' lle' yell-lioni ile'gakile' nad', Beṇ' Bsel' Chioza' Yell-lioni, zizaa ladj bejka' kon yeḷ' wak na' balaan xen. Na' yog' beṇ'ka' lle' doxen yell-lioni kwellyesh'gake'. 31 Na' ka kwell trompeta' zillj wselaa anjl cha'ka' zbii zkaan yell-lioni kwenche yitopgake' beṇ'ka' wlej Chioza' nak lall' nee.

32 'Na' li wwia ka chak che yag yixwewa': kat' ba chzolo chibia xlaguinna', na' chakbe'ile ba zoa yiyoo la'o linna'. 33 Ka'kzan, kat' ile'ile ba chak yog' diika' ba wnia' le' gakə, na' gakbe'ile ba zoa gaoshosh te che yell-lioni. 34 Dii li nia' le', aga ba wit beṇ'ki zoa naa kat' gak yog' diiki lia bia'

gakə. ³⁵ Yabana' na' yell-lioni te chegakin, san cho'a xtillaana' biga te cheyin na' gak ka nan.

³⁶ 'Kono nezi bi lla bi gor te che yell-lioni, ni anjlka' lle' yabana', ni nad' nak' Xiin Chioza'. Toz Xa' Chioza' nezile'n.

³⁷ 'Na' ka gok kana' wzoa dii Noéna', ka'kzan chak kat' nad', Ben' Bsel' Chioza' Yell-lioni, yiyed' dii yoblə. ³⁸ La' ben'ka' wzoa kana' zi' gak yej ziw' wala', cheej chaogake', na' chshagna'gake' na' no choe'gake' yel' wishagna' che xiine'ka' axt llana' wyoolen dii Noéna' xiin xoolə'na' loo barkwa'.

³⁹ Na' ben'ka' bi wyoo bi gokbe'gakile' bin gak axt ka wzolo chak yejsiwaa na' bia' nisa' yog'gake'. Na' ka'kzan ni to kono gakbe'i kat' nad', Ben' Bsel' Chioza' Yell-lioni, zizaa. ⁴⁰ Kana'n, gana' lle' chop ben' lyixaa, toe' yichi'a na' beena' sto yigaane'. ⁴¹ Na' gana' lle' chop noolə chotgake', toe' yichi'a na' stoe' yigaane'.

⁴² 'Daan li se kwas kwezle nad' nak' Xanle, la' bi nezile bi lla bi gor zizaa. ⁴³ Li shajni'kachi dga, shel' xan yoona' nezile' bi gor illin ben' wbanna' lille'na', aga wes yele' kwenche bi wi'e latj sho' wbanna' lille'na'. ⁴⁴ Na' daan, li soatezi soa kwezle nad', Ben' Bsel' Chioza' Yell-lioni, la' kat' bilə nonle lez, tokonganzi zizaa.

Jempl che wen llinka', beena' chon wen na' beena' bi chon wen

(Lc. 12:41-48)

⁴⁵ 'Na' li gak ka to wen llin ben' chajonii na' chone' daa chiya' gone' na' kat' chza' xane'na' chone' lall' nee lille'na' kwenche wi'e dii yeej gao wen llinka' sto gor cheyin. ⁴⁶ Chakomba wen llinna' daa chila'ile' chone' daa chidolee gone' kat' yillin

xane'na'. ⁴⁷ La' dii li nia' le', xane'na' gone' lall' nee yog' dii de che'. ⁴⁸ Per shi wen llinna' nake' ben' mal na' gakile': "Wllaljachkzi xan'na' yilee." ⁴⁹ Na' soloe' wit chine' wen llinka' nak lall' nee na' yeej gaolene' weezoka'. ⁵⁰ Na' llana' bi nonyen'le' lez, tokonganz yillin xane'na'. ⁵¹ Na' daa bi chone' wen, na' wsak'zi'ene' ka sak'zi' ben' wxiye'ka' gana' kwellyesh'gake' na' gaoxaxj leye'ka' daa le gakshejlall'gake'.

25

Jempl che shi bi' nool wew'ka'

¹ 'Yel' wñabia' che Chioza' chzaklebin daa gok che shi bi' nool wew' wyaj to wishagna', na' bex'gakb' kandil cheb'ka' jlezgakb' bi' byona' lill noola'. ² Na' gay'gakb' nteyi na' zi gay'gakb' bi nteyi. ³ Bi'ka' bi nteyi kontele wza'len kandil cheb'ka', per bich bex'gakb' seta' yigaagakba'n. ⁴ Na' bi'ka' nteyi, bex'gakb' kandil cheb'ka' na' bex'tegakb' seta' yigaagakba'n. ⁵ Na' bi' wishagna'na' wlle'ib' na' bi' nool wew'ka' chbez gokxwesgakb' na' wtesgakb'. ⁶ Na' do ka chel besyaa to ben', chi'e: "jBa za' bi' wishagna'na', li sho' llatilchob'!" ⁷ Na' wyas bi' nool wew'ka' wzologakb' chiyonshao' kandil cheb'ka'. ⁸ Na' bi' nool wew'ka' bi nteyi gollgakb' bi'ka' zi gay': "Li gongach neto' lat' set chelena' la' ba chibill chento'ni." ⁹ Per bi'ka' nox' seta' che'gakb': "Bi gonnto'n, kwenche ki iyalljichon ganga. Wenla li shaj li lljxi' chelena' gana' chiteen." ¹⁰ Na' shlak zejgakb' zjxi'gakb' seta', bllin bi' wishagna'na' na' bi'ka' nox' seta' wyoolengakb' ben'ka' loo yoona'

gana' chak wishagna'na', na'ch wyej puerta'. ¹¹ Na' ka billin bi' nool wew'ka' jxi' seta', wnegakb' xan yoona' che'gakb': "¡Ben'do', bsaljgach shoonto!"
¹² Per xan yoona' chi'e legakb': "Bi wsalj', la' bi nombi'a le'."

¹³ Na'ch che' Jesúza' ben'ka':

—Ka'kzə le', chiyal' se kwasle, la' aga nezile bi lla bi gor zizaa.

Jempl che ben'ka' bgaanlen xmech xane'ka'

¹⁴ 'Yel' wñabia' che Chioza' zaklebin dga wseesaa. To ben' wzee zeje' zit', na' ka ba zoa see, goxe' wen llin che'ka' na' bene' lall' na'gake' xmeche'na' kwenche gonlengake'n delgens.

¹⁵ 'Na' toe' bi'e gayaa mil mech de or, na' stoe' chopo milan, na' beena' sto bi'e to milan. Bi'e to toe' kon ka dii chakile' wak gonlengake' llinna'. Na'ch wzee zeje'. ¹⁶ Na' beena' bi'e gayaa milan, benlene'n llin na' bene' gan zi gayaa milan. ¹⁷ Na' lekzka' beena' bi'e chopo milan, benlene'n llin na' bene' gan zi chopo milan. ¹⁸ San beena' bi'e to milan, jtene' to yech na' bkwashen.

¹⁹ 'Na' ka ba gok ssha na' billin xane'ka', na' goxe' to togake' kwenche bidegake' kwent lawe'na'.
²⁰ Na'ch zigaate beena' bi'e gayaa mil mech de or blline' lawe'na', chi'ene': "Xan', ni de de gayaa mila' beno' nad', na' ni de zi gayaa mil daa benlana'n gan."
²¹ Na' che' xane'na'ne': "Le wen beno', to wen llin wen inleeb nako', beno' ka chiyal' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'."
²² Na'ch wdena' bllin wen llinna' bkwaanlene' chopo mil, chi'ene': "Xan', ni de de chopo mila'

beno' nad', na' ni de zi chopa mil daa benlena'n gan.” ²³ Na'ch che' xane'na'ne': “Le wen beno', to wen llin inleeb wen nako', beno' ka chiyal' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'.” ²⁴ Per ka bllin wen llinna' bkwaanlene' to mil, na' golle' xane'na': “Xan', nezid' nako' ben' znia, na' to chizi'zo' banez daa chon ben' yoblə. ²⁵ Na'chan blleb' gonditj' xmecho'na', daan wden' to yech na' bkwashaan. Ni de xmecho'na', bikaagachan, la' chekzo'n.” ²⁶ Na'ch che' xane'na'ne': “Ben' lia, bikz bi llin yejni'alallii chono'. Nezteilo' to chizi'z' banez daa chon ben' yoblə. ²⁷ Na' daa nezilo' kan' chon', çberache ki joo xmechaa gana' chon yichjin shlak bi wzoa? Shel' beno' ka', na' naa ba biyed' yiyono'n lente yichjinna', shel'ka'.” ²⁸ Na'ch golle' ben'ka' lle' na': “Li yikaa mecha' daa bkwaanlene' na' li we'n beena' nap shi milan. ²⁹ La' kan' nakan, beena' chgone' llin daa yoo lo nee, gonche' lall' nee dii xench axt gat' kwe'chile'; san beena' bi chgone' llin daa yoo lo nee, axt daa ngoo lo nee lat' yidoyo. ³⁰ Na' wen llinni bi yejni'alallii, li wzalee gana' shgasj shchol, gana' kwellyeshee na' gaoxaxj leye'na' daa le gakshejlallee.”

Ka gak kat' wçhoglo Jesúza' che ben'

³¹ 'Kat' ziza' nad', Ben' Bsel' Chioza' Yell-lioni, len balaan xen cha'na' na' yog' anjl cha'ka', na' wli'a yel' wñabia' choo yel' wñabia' xen cha'na'. ³² Na' yog' ben' lle' doxen yell-lioni yidopgake' lawa'na', na' gon' che cheləgake' ka chon to ben' chape' bayix' chone' chelə xil'ka' na' chelə shibka'. ³³ Na' wzoa' shlaa de shli cha'ni ben'ka' zaklebi

xil'ka' daa chonlilall'gake' nad', na' ben'ka' zaklebi shibka' daa bi benlilall'gake' nad', wzoagakee shlaa de robes cha'ni. ³⁴ Na' nad', ben' wñabia', yep' ben'ka' lle' shlaa de shli cha'ni: “Li da, ka le' ba ben Xa' Chioza' ka gak wen chele, na' si'le banez daa ba nonshawee chele ka bxe bsiltie' yelliona'. ³⁵ La' ka wdon', bwaole nad'; na' ka wbilid', benle dii weej'; na' ka wda' ka ben' zit', bleble nad' lill-lena'. ³⁶ Na' ka byallj xalaana', benle dii gokw', na' ka bi shawaa, bidwiale nad'; na' ka gotaa lillyana', bidwiale nad'.” ³⁷ Na' yog' ben' li ben' shao'ka' inagake' nad': “Xan', ¿batran ble'into' li' chdono' na' bwaonto' li'? ¿Batran ble'into' li' chbililo' na' bennto' daa weejo'? ³⁸ ¿Batran ble'into' li' chdo' ka ben' zit' na' blebnto' li' loo yoo lillnto'na'? ¿Batran ble'into' li' chdo' bibi xalaano' de na' bennto'n? ³⁹ Na' ¿batran gokbe'into' bi shawoo wa gotoo lillyana' na' bidwianto' li'?” ⁴⁰ Na' nad', ben' wñabia', yepgakee: “Dii li nia' le', yog' daa benle che ben'ka' byallj bchini, ben'ka' nak ben' bishaa na' ben' zan', la'kzi bi nakgake' ben' zakii, nad'kzan benile ka'.”

⁴¹ Na'ch yep' ben'ka' lle' shlaa de robesi: “Li kwas ka'la, le' wen dii mal. Lo yi' gabila' daa chal' zejli kan' chido'le yiyajle gana' ba non Chioza' sak'zi' dii xiwaa len anjl cheyinka'. ⁴² La' ka wdon' bi benle dii gaw'; na' ka wbilid' bi benle dii yeej'. ⁴³ Na' ka wda' ka ben' zit', aga bleble nad' loo yoo lillle. Na' ka byallj xalaana', aga bi benle; na' ka bi shawaa wa gotaa lillyana', aga bidwiale nad'.” ⁴⁴ Na' inagake' nad': “Xan', ¿batran wdono', wa wbililo', wa wdoo ka ben' zit', wa bibi xalaano' got', wa bi shawoo, wa gotoo lillyana' na' bi goklennto'

li?" ⁴⁵ Na' yepgakee: "Dii li nia' le', daa bi goklenle beṅ'ka' byallj bḥini, beṅ'ka' nak beṅ' bishaa na' beṅ' zan', la'kzi bi nakgake' beṅ' zakii, nad'kzan bi goklenle." ⁴⁶ Na' beṅ' malkan' yiyajgake' gana' tegake' yel' sak'zi'na' zejli kaṅi, na' beṅ'ka' nak beṅ' li beṅ' shao' soalengake' nad' zejli kaṅi.

26

Wloogake' xnezin gox'gake' Jesúza'
(Mr. 14:1-2; Lc. 22:1-2; Jn. 11:45-53)

¹ Na' ka biyoll be' Jesúza' yog' dill'ka', na'ch golle' beṅ'ka' nakgake'ne' txen:

² —Ba nezkzile zi chop llazan chyallj gal' lni Paskwa', na' nad', Beṅ' Bsel' Chioza' Yell-lioni, gak' lo na' beṅ'ka' witgake' nad' lee yag cruza'.

³ Na'ch bḥozka' chṅabia' na' beṅ'ka' chli' chsedi leya' na' beṅ' golka' chṅabia' beṅ' Israelka' bdop-gake' lill bḥoz choo bḥoz xenna', beena' le Caifás.

⁴ Na' wloogake' xnezin gox'gake' Jesúza' xochizi, ka ki gakbe'i beṅ', na' witgake'ne'. ⁵ Na' che' ljwelle':

—Bi gox'chone' shlak chal' lṅina' kwenche bi wta wṅecho beṅ'.

To noolə bwazje' set zix'a' yichj Jesúza'
(Mr. 14:3-9; Jn. 12:1-8)

⁶ Na' ka zoa Jesúza' Betániana' len beṅ'ka' nakgake'ne' txen, wyajgake' lill to beṅ' le' Simón, beena' gok yillwe' daa le lepra. ⁷ Na' shlak chi' Jesúza' cho'a mesa', bllin to noolə noxee to lmet de yaj xochi na' yollan set dii chla' zix' dii zak' mech xen, na'ch bwazje'n yichj Jesúza'. ⁸ Na' ka ble'i beṅ'ka' nak Jesúza' txen daa ben noola', le bllaagake' na' che' ljwelle':

—¿Biçhe benditjz beeni seta? ⁹ Shel' bet'chokle'n, la' dii xen zakaan, na' bi'e xmechinna' ben' yesh'ka', shel'ka'.

¹⁰ Na' beni Jesúza' ka choe'gake' dill', na' golle' legake':

—¿Biçhe chnezle che nooli? La' daa ba bene' cha' nakan dii wen. ¹¹ Ka nak ben' yesh'ka', toshiizi soagake' ladjlena', san nad', aga toshiizi soalen' le'. ¹² Daa ba bwazj nooli nad' set zixa', bene' ka' kwenche gakshao'zega kwerp cha'ni kat' wkwash'gake' nad'. ¹³ Na' dii li nia' le', gattezə we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingakile'ne'.

Juda' bdie' Jesúza' lo na' bxozka' chñabia'

(Mr. 14:10-11; Lc 22:3-6)

¹⁴ Na'ch beena' le Jud Scariot, beena' nak txen ben'ka' shllin, wyaje' lao bxozka' chñabia'. ¹⁵ Na' golle' legake':

—¿Ka'k' chixjle nad' shi gon' Jesúza' lo na'le?

Na'ch wdixjgake'ne' shichoa mech plat. ¹⁶ Na'ch lo llana'tez wzolo Juda' chioe' nakan gone' kwenche gone' Jesúza' lo na' ben'ka'.

Xancho Jesúza' wdaolene' ben'ka' nakgake'ne' txen xshe'na'

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Lla nech che lni Paskwa', llana' chaogake' yetxtila' daa bi nchix levadúrana', ben'ka' nak Jesúza' txen wyajgake' kwite'na' che'gake'ne':

—¿Ga cheenilo' lljasini'anto' xshe' che lni Paskwi?

18 Na'ch che' Jesúza' legake':

—Li shaj yell Jerusalénna', na' beena' yillagle ye'lene': “Maestrona' ne' ba zoa gak daa lia bia' gak che', na' lillo'na' cheenile' wsini'anto' daa gaolennto'ne' xshe' che lni Paskwi.”

19 Na'ch beñ'ka' nakgake'ne' txen bengake' kon ka golle' legake', na' jasini'agake' xshe' che lni Paskwa'.

20 Na'ka gol, wche'len Jesúza' beñ'ka' shllin cho'a mesa'. 21 Na' shlak chaogake' che' Jesúza' legake':

—Dii li nia' le', tole gonle nad' lo na' beñ'ka' chakzi' chakzbani nad'.

22 Na'ka golle' legake' ka' le gokyesh'gakile' na' to toe' che'gake'ne':

—Xan', ¿anadaan gon' ka', lla?

23 Na'ch che' Jesúza' legake':

—Beena' ba bleejlene' nad' yetxtil che'na' loo yeena', beena'kzan' gone' nad' lo na' beñ'ka' chakzi' chakzbani nad'. 24 Ka nak nad', Beñ' Bsel' Chioza' Yell-lioni, wit beñ' nad' kon ka na Cho'a Xtill' Chioza', per inyesh'laz gak che beena' gone' nad' lo na' beñ'ka'! ¡Naklan wen shel'ka' bi golje'!

25 Na'ch Juda', beena' wdie' Jesúza' lo na' beñ'ka', chi'ene':

—Maestro, ¿anadaan gon' ka'?

Na'ch che' Jesúza'ne':

—Kan' ba wno'z.

26 Na' shlak chaogake', beñ' Jesúza' yetxtila' na' bi'e Chioza' yel' choxken, na' bxoxje'n na'ch bi'en beñ'ka' nakgake'ne' txen, chi'e:

—Li gao dga. Lennan' kwerp cha'ni.

27 Na'tech beñee to kop dii yoll vino, na' bi'e Chioza' yel' choxken na' bi'en legake', na' golle':

—Yog'le li yeej dga yoll loo kopi, ²⁸ la' lennan' xchen'na' daa gon ka gak li dii koba' bcheb Chioza' gone'. Na' laljan kwenche yiyakxen saaxya che beṅ' zan. ²⁹ Na' nia' le', ni zeelo cheejlen' le' nis uvani. Aga weejcha'n axt kat'ch illin lla soacho txen gana' chṅabia' Xa' Chioza', kana'chan yeejlena'n le' dii yoblə.

Jesúza' chi'e bi wcheb Pédrona' shi nombi'ene'
(Mr. 14:26-31; Lc. 22:31-34; Jn. 13:36-38)

³⁰ Na' ka bidaogake', beḷgake' be'la'ogake' Chioza' na'ch biyajgake' lo yaa Olívoza'. ³¹ Na' ka ziyajgake', che' Jesúza' legake':

—Yog'le kwej yichjle nad' ṅaanlle'. La' kin na Cho'a Xtill' Chioza': “Wit' beena' chap xil'ka' na' illeshlesgakb.” ³² Per ka yiban' ladj beṅ' wetka', yiyaa Galileana' lljalez' le'.

³³ Na'ch che' Pédrona'ne':

—La'kzi yog' beṅ'ki kwej yichjgake' li', nad' bi kwej yichj' li'.

³⁴ Na'ch che' Jesúza'ne':

—Dii li nia' li', ṅaanlle' shoṅ shii bi wchebo' shi nombi'o nad' ka zi' kwell shikwteza'.

³⁵ Na' Pédrona' chi'ene':

—La'kzi guetlenticia' li', biga inia' bi nombi'a li'.

Na' ka'kzə goll yog'lol beṅ'ka' nakgake'ne' txen.

Jesúza' be'lwille' Chioza' latja' le Getsemaní
(Mr. 14:32-42; Lc. 22:39-46)

³⁶ Na' ka bllinlen Jesúza' beṅ'ka' nakgake'ne' txen latja' le Getsemaní, na'ch golle' legake':

—Nizə li kwe' shlak shaa daa ka'lə llje'llwill' Chioza'.

³⁷ Na' bchi'e Pédróna' na' chop bish'te xiin Zebedewa', na' wzolo chakyeshile' dii wal inleeb. ³⁸ Na' golle' legake':

—Axt chalikazid' lii guettia' daa le chakyeshii yichjall'dawaani. Li igaan nizə na' bi guesle.

³⁹ Na' blee legake' zi lat' na' bchek' yichje'na' lo yona' na' be'lwille' Chioza', chi'e:

—Xadawaa, shi wakan, bengach ka ikwas dga yen ile'id', per aga gak ka cheenid', san gak ka cheenilo'.

⁴⁰ Na'ch biyaje' gana' lle' ben'ka' shon, na' ble'ile' ba chesgake'. Na' golle' Pédróna':

—¿Abikzə bchejlat'gaile la'ch' tgor kwezle nad' bi guesle? ⁴¹ Bi guesle. Li we'lwill Chioza' kwenche bi we'zle latj gon beli chenna' le' gan. Aga ki cheeni yichjall'do'lena' gonlen per beli chenna' bi chizoin.

⁴² Na'ch wyaje' de wchop shii jelwille' Chioza', chi'e:

—Xadawaa, shi ba nakten idil illag' dga, gakkzə ka cheenilo'.

⁴³ Na' ka billine' dii yoblə lekzka' cheslagake' daa bi wzogakile' bishgala'. ⁴⁴ Na' bikzə bisbane' legake', na' wzee sto shii jelwille' Chioza' de wyon shii na' golle'ne' ka ba gollkze'ne'. ⁴⁵ Na'ch biyaje' gana' bgaan ben'ka', na' golle' legake':

—¿Ani chestkile? Ba bllin gor nad', Ben' Bsel' Chioza' Yell-lioni, gak' lo na' ben' saaxyaka'. ⁴⁶ Li chas na' li sho'. Ba za' beena' wdie' nad' lo neeka'.

Bex'gake' Jesúza'

(Mr. 14:43-50; Lc. 22:47-53; Jn. 18:2-11)

⁴⁷ Bilan' yiyoll yee Jesúza' ka' ka bllin Juda' beena' nak txen ben'ka' shllin, nchi'e ben' zan

ben'ka' bsel' bꞑozka' chꞑabia' len ben' golka' chꞑabia' ben' Israelka'. Na' noꝁ'gake' no spad na' no yag. ⁴⁸ Na' Juda' ba bzajniile' ben'ka' nchi'e nakan gone' wli'e beena' goꝁ'gake', golle': "Kon beena' wnop', len goꝁ'le."

⁴⁹ Na' ka bllinlene' ben'ka' kwit Jesúza', lii wbig'tie' lawe'na' chi'ene':

—¡Chiox ꞑaa, maestro!

Na'ch bnop'e'ne'. ⁵⁰ Na' Jesúza' golle'ne':

—Bish'dawaa, ben daa zidyeno'.

Na'ch lii wbig'te ben'ka' beꝁ'gake' Jesúza'.

⁵¹ Na' ka beꝁ'gake'ne', to beena' nake'ne' txen wleje' spad che'na' na' wdine'n xmos bꞑoz choo bꞑoz xenna', bꞑhogtie' tꞑaa nague'na'. ⁵² Na'ch goll Jesúza'ne':

—Bigooshao' spad cho'na', la' yog' ben'ka' chitgakile' ben' yesya, lekzka' len guetgakile'.

⁵³ ¿Achakile bi gak inabid' Xa'na' gaklene' nad' na' lii wsel'tie' anj l zan inleeb, shel'ka'? ⁵⁴ Per shi ka' gon', ¿nakra gak yillini Cho'a Xtill' Chioza' gana' nan chonan byen gak ki?

⁵⁵ Na'ch goll Jesúza' ben'ka' ba noꝁ'gake'ne':

—¿Achakile' no wban no nad' za'lenzle no spad no yag kwenche goꝁ'le nad'? Yog' lla bli' bsedid' ben' loo yoodo'na', ¿biche bi beꝁ'le nad' shlak bli' bsedid' ben' na'? ⁵⁶ Per daa chonle ki, chillinin ka na Cho'a Xtill' Chioza' daa bzej dii ben'ka' wdixjee daa golle' legake'.

Na'ch yog'lol ben'ka' nak Jesúza' txen bꞑonjgake' na' bkwaan'gake' toze'.

Jwa'gake' Jesúza' lao ben'ka' chñabia' ben' Israelka'

(Mr. 14:53-65; Lc. 22:54-55, 63-71; Jn. 18:12-14,19-24)

⁵⁷ Na' ben'ka' beḡgake' Jesúza' jwa'gake'ne' lill Caifáza', beena' nak bḡoz choo bḡoz xen, na' lille'na' ba ndop nllag ben'ka' chli' chsedi leya' na' ben' golka' chñabia'. ⁵⁸ Na' Pédrona' janoe' Jesúza' de zit'lə, bllintie' lesh' chyoo che bḡoz choo bḡoz xenna' na' jche'lene' ben'ka' chap yoodo'na' kwenche ile'ile' ka gak che Jesúza'.

⁵⁹ Na' bḡozka' chñabia' len ben'ka' chñabia' ben' Israelka' wdiljgake' ben' chiljlallee che Jesúza' kwenche wchoglogake' guete'. ⁶⁰ Na' la'kzi ben' zan ben'ka' biya dii biyiljall'gake' che Jesúza', aga bidili cho'a dill' che'ka', axt ki bllin chop ben' ⁶¹ be'gake' toz dill', che'gake':

—Ki wna beeni: “Nad' wak yichinj' yoodo' che Chioza' na' shon llazə yiyontia'n dii yoblə.”

⁶² Na'ch wzolla' bḡoz choo bḡoz xenna', golle' Jesúza':

—¿Abikz bi ino' cheyi dga nagake' cho'?

⁶³ Na' Jesúza' bikzə wñie'. Na'ch che' bḡoz choo bḡoz xenna'ne':

—Chios yaa Chios banna' soe' de taschiw. Wnashki neto' shi lin' Crístona', beena' nak Xiine'.

⁶⁴ Na' goll Jesúza'ne':

—Awe, kan' nakan. Na' lekzka' nia' le', wle'ile nad', Ben' Bsel' Chioza' Yell-lioni, kwi'a shlaa de shli che Chioza', beena' zeelo nap yel' wak choo yel' wak xenna', na' lekzka' ile'ile nad' zizaa ladj bejka' ze xan yabana'.

⁶⁵ Na'ch bsho' bchez' xa bχoz choo bχoz xenna'.
Na' daa bene' ka', bli'e nan le bllee, na' wne:

—¡Kwinle ba benile naz beeni nake' Xiin Chioza'!
Bich chyaljicho beñ' gao xya che'. ⁶⁶ ¿Bi ka inale?

Na'ch gollgake'ne':

—Chiyal' guete'.

⁶⁷ Na'ch bllea xeneeka' cho'alaó Jesúsza' na' wdap' wlall'gake'ne'. ⁶⁸ Na' che'gake'ne':

—Shi lin' Crístona', wnashki non wdap' wlall' li'.

Pédrona' bi bchebe' shi nombi'e Jesúsza'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' shlak chak ka', Pédrona' chi'e lesh' chyoona'
ka bllin to noolə wen mandad kwite'na' chi'ene':

—Lenon' nako' txen Jesúsza', beñ' Galileana'.

⁷⁰ Na' lao yog' beñ'ka' lle' na', aga bcheb Pédrona'
shi nake' Jesúsza' txen, na' golle' noola':

—Bi nejid' bin no'.

⁷¹ Na' ka ziyaje' cho'a puerta' bizle'i sto beñ'
yoblə le' na' chi'e beñ'ka' lle' na':

—Len beenin nake' txen Jesúsza', beñ' Nazareta'.

⁷² Na' lekzka' aga bizcheb Pédrona' shi nake'
Jesúsza' txen, bzoatie' Chioza' de taschiw, chi'ene':

—Bi nombi'a beena'.

⁷³ Na' gokzə xtit na' jabig' beñ'ka' lle' na' kwit
Pédrona' na' che'gake'ne':

—Dii likzan lenon' nako' legake' txen, la' lii
nakkia'te ka chshaljo'.

⁷⁴ Na'ch wzolo Pédrona' chone' zña, chi'e:

—¡Dii balkzan nia' bi nombi'ane'! ¡Chioza'
wsak'zi'e nad' shi chziye'zan'!

Na' biyoll wne' ka' lii wchellte shikwteza'.

⁷⁵ Na'ch jadini Pédrona' daa goll Jesúsza'ne': “Shon

shii bi w̄chebo' shi nombi'o nad' ka zi' kwell shikwteza'." Na'ch biza' Pédrona' chbellyeshee.

27

Jwa'gake' Jesúza' lao Pilátona'
(Mr. 15:1; Lc. 23:1-2; Jn. 18:28-32)

¹ Na' ka wyeeni', yog'lōl̄ b̄xozka' ch̄n̄abia' na' ben' golka' ch̄n̄abia' ben' Israelka' bengake' toz dill' witgake' Jesúza'. ² Na' b̄chejgake'ne' jwa'gake'ne' lao Pilátona' beena' ch̄n̄abia' gana' mbani Judeana'.

Wit Juda'

³ Juda', beena' bene' Jesúza' lo na' ben'ka', ka gokbe'ile' ba nakan witgake' Jesúza' na' wdao bdiachgan le'. Na'ch wyaje' lao b̄xozka' ch̄n̄abia' na' lao ben' golka' ch̄n̄abia' jasane' shichoate mech de plata' daa be'gake'ne'. ⁴ Na' chi'e legake':

—Le malchga ben' daa bdia' to ben' bibi dol' nape' lo na'lena'.

Na' legake' che'gake'ne':

—¿Bera kwent che neto'? Li'z nezilo' bin beno'.

⁵ Na' jaza' Juda' mecha' loo yoodo'na', na' tech jayet kwine' jaloo do yene'.

⁶ Na' b̄xozka' ch̄n̄abia' bitopgake' mecha' na' che' ljwellgake':

—Bi gak yiyonchon toz mech che yoodo'na', la' nakan dii ba nap xya.

⁷ Na' be'gake' dill' yizi'gakile' mecha' to yell-lío dii le Yell-lío che Ben' Wen Yes' gana' wk-wash'gake' ben' zit'ka'. ⁸ Daan ax̄t naanlla yell-liona' len Yell-lío Chen. ⁹ Na' daa gok ka', billinin ka wna dii Jeremíaza', beena' wdixjee daa goll Chioza'ne', ka wne': “Bikaagake' shichoa mech

plat daa b̄chogbia' beṅ' Israelka' zak' beena'. ¹⁰ Na' kon len wxi'gakile' Yell-lío che Beṅ' Wen Yesaa, kon kana' wna X̄ancho Chioza' nad'."

Bllin Jesúza' lao Pilátona'

(Mr. 15:2-5; Lc. 23:3-5; Jn. 18:33-38)

¹¹ Ka bllin Jesúza' lao Pilátona', na'ch che' Pilátona'ne':

—¿Alin' beṅ' wṅabia' che beṅ' Israelka'?

Na' che' Jesúza'ne':

—Kan' ba wno'.

¹² Na' shlak b̄xozka' chṅabia' na' beṅ' golka' chṅabia' beṅ' Israelka' chaogake' xya che', bibi dill' billi'e legake'. ¹³ Na'ch goll Pilátona'ne':

—¿Abi chenilo' diika' chaogake' xya cho'?

¹⁴ Per Jesúza' ni to diika' chaogake' xya che' ni shcho'a dill' bi billi'e, na' le bibanchgayi Pilátona'.

B̄choglogake' guet Jesúza'

(Mr. 15:6-20; Lc. 23:13-25; Jn. 18:38–19:16)

¹⁵ Na' beṅ' wṅabia'na' yooloe' yog' yiz chisane' to beṅ' de lillyana' lla lṅi Paskwa', kon beena' inab yog' beṅ' yell yisane'. ¹⁶ Na' de to beṅ' lillyana', beṅ' le zeyi che' nake' beṅ' mal, na' lie' Barrabás.

¹⁷ Na' ka ndop nllag beṅ' yellka', che' Pilátona' legake':

—¿No beṅ'ki cheenile yisan'?, ¿aBarrabáza', awa Jesúzi, beeni nsi'gake' Cristo?

¹⁸ Golle' legake' ka' la' gokbe'ile' daa chakxe'gakile' Jesúzan' jwa'gake'ne' lawe'na'.

¹⁹ Shlak chi' Pilátona' gana' chone' yel' joschisa', bsel' xoole'na' to rson, chi'ene': "Bi gaklebilo' beṅ'ka' chao xya che' beena', la' aga bi dol' che' de, la' nll'e'yi wṅeid' to yel' che', na' le bsheban nad'."

20 Per b̄xozka' ch̄n̄abia' na' beṅ' golka' ch̄n̄abia' beṅ' Israelka' wlooyel'gake' beṅ'ka' lle' lla' na' in̄abgake' yisane' Barrabáza' na' gone' mandad guet Jesúza'. 21 Na' Pilátona' sto shii w̄n̄abile' legake':

—¿No beṅ'ki chop cheenile yisan'?

Na' beṅ'ka' che'gake'ne':

—¡Bisan Barrabáza'!

22 Na' che' Pilátona' legake':

—Na' ¿bera ka gonid' Jesúzi beeni nsi'gake' Cristo?

Na' yog'l̄ole' che'gake'ne':

—¡Bdee lee yag cruza'!

23 Na' che' Pilátona' legake':

—Per ¿bera dii malan' ba bene'?

Na' legake' zizikli chosyaadiagake', che'gake'ne':

—¡Bdee lee yag cruza'!

24 Na' ka gokbe'i Pilátona' bich bi de gone' daa zizikchli ba chaklleshgakile', bene' mandad j̄xi'gake' nisa' kwenche binee lao yog' beṅ'ka', na' chi'e:

—Aga bi dol' nap' nad' daa guet beeni. Len' gak xbag'lene'.

25 Na' yog'l̄ol beṅ'ka' che'gake'ne':

—¡Neto' len xīn̄nto'ka' idobinto'ne'!

26 Na'ch bisan Pilátona' Barrabáza', na' bene' mandad bet wdingake' Jesúza' na' bene'ne' lo na'gake' kwenche wda'gake'ne' lee yag cruza'.

27 Na' soldadka' b̄che'gake' Jesúza' gana' chon Pilátona' yel' jos̄chisa' na' biti'agake' yog'l̄ol soldadka' nakgake' txen. 28 Na'ch wdingake' xa Jesúza' na' bwakwgake'ne' to lech' x̄na ka che to beṅ' w̄n̄abia'. 29 Na' bengake' to bxoon̄ de xis yesh' na' bllingake'n yichje'na' ka to corona, na' nee de

shlina' bgox'gake'ne' to bar. Na'ch b̄chek' xibe'ka' lawe'na' na' b̄titjgake'ne' che'gake':

—;Toshiizi sechgayi c̄he beeni ch̄nabia' beñ' Israelka'!

³⁰ Na'ch no chlla' xeneeka' le', no chikaagake' bara' daa bgox'gake'ne' na' chyingake'n yichje'na'.

³¹ Na' ka wde b̄titjgake'ne' na'ch biyingake' lechaa bwakwgake'ne' na' biwakwgake' xe'na' nakwkze'. Na'ch b̄che'gake'ne' kwen̄che wda'gake'ne' lee yag cruza'.

Bda'gake' Jesúza' lee yag cruza'

(Mr. 15:21-32; Lc. 23:26-43; Jn. 19:17-27)

³² Na' ka ba chchejgake' cho'a yell Jerusalénna', billaggake' to beñ' Cirene, beñ' le Simón, na' bengake' byen bi'e yag cruz c̄he Jesúza'.

³³ Na' ka' bllingake' latja' le Gólgota, na' zejin Latj c̄he llit yichj beñ' wet. ³⁴ Na' nan wweejgake' Jesúza' vino daa n̄chix' to dii z̄la', per ka bnix̄e'n, bi goonile' yeeje'n.

³⁵ Na' ka biyoll bda'gake'ne' lee yag cruza', soldadka' bengake' to wyitj kwen̄che got'bia' nogake' yidol' xa Jesúza'. ³⁶ Na'tech wche'gake' wdap-gake'ne'. ³⁷ Na' yichj yag cruz c̄he'na' bda'gake' to dii choe'n dill' b̄iche nda'gake'ne' na', na' nan: “Beenin Jesúza', beñ' w̄nabia' c̄he beñ' Israelka'.”

³⁸ Na' lekzka' bda'gake' chop beñ' wban shl̄aa wej kwit yag cruz c̄he Jesúza'. ³⁹ Na' beñ'ka' chde gana' dee, chta yichje'ka' na' chgoogake'ne' bel-ban, ⁴⁰ che'gake'ne':

—Li' wno' yichinjo' yoodo'na' na' shon̄ llazə yiy-ontio'n, ;bisla kwino' lee yag cruzi shi leilo' nako' Xiin Chios!

41 Na' lekzka' bꞥozka' chꞥabia' na' beꞥ'ka' chli' chsedi leya', na' fariseoka' len beꞥ' golka' chꞥabia' btitjgakile'ne', che' ljwelle':

42 —Gok bisle' beꞥ' yoblə per bi chak yisla kwine'. Shi leile' len' beꞥ' wꞥabia' chechona', cho' beꞥ' Israel, yiyetjshkile' lee yag cruza' naa kwenche shajle'cho che'. 43 Nꞥenilallee Chioza'. Yislashkile'ne' naa shi leile' chakile'ne', la' wne' nake' Xiin Chios.

44 Na' aꞥt wbanka' da' lee yag cruza' kwite'na' lekzka' biya dii che'gake'ne'.

Wit Jesúza'

(Mr. 15:33-41; Lc. 23:44-49; Jn. 19:28-30)

45 Na' do ka gobill kat' biꞥhoꞥ doxen yell-lioni aꞥt do ka chida shoꞥch biyeeni'. 46 Na' do ka chida shoꞥə besyaa Jesúza' zilljə, ne':

—Elí, Elí, ꞥlama sabactani? —na' zejin: Chios ꞥha', Chios ꞥha', ꞥbiꞥhe ba wlej yicꞥjzo' nad'?

47 Na' baꞥ beꞥ'ka' lle' na', bengakile' ka wne', na'ch che'gake':

—Elíazan' chaxe', beena' wdixjee daa goll Chioza'ne' kani'yi.

48 Na' toe' lii zejdotie' jꞥi'e to dii bleeje' loo vino daa nak zichj zla', na'ch bzoen to lo xis na' jazoe'n cho'a Jesúza' kwenche yeeje'n. 49 Na' beꞥ'ka' sto che'gake':

—Jwayishkile'na', la'shki shi wid Elíaza' kwenche yidsle'ne'.

50 Na' ka biyoll besyaa Jesúza' zilljə dii yoblə, na' wite'. 51 Na' ka wite', lechaa ze loo yoodo'na' lii bchez'ten gokan choꞥlə. Na' gok to bedxo' na' wlaa yajka'. 52 Na' lekzka' aꞥt biyalj gana' bgash'

ben' wetka'. Na' zan ben' wetka', ben'ka' ben'ilall' Chioza', bibangake' sto shii ⁵³ na' bichejgake' gana' bgash'gake'. Na' ka bibanch Jesúza', biyoogake' yell Jerusalénna', na' ben' zan ble'gakile' legake'.

⁵⁴ Na' xan soldadka' len ben'ka' chaplene' Jesúza' le bblebgake' ka wxo' na' bichlæ diika' gok. Na' wntagake':

—Dii likzan Xiin Chios beeni.

⁵⁵ Na' zan noolka' wno Jesúza' dezd gana' mbani Galileana', ben'ka' goklengake'ne' che bi dii byalljile', lle'gake' de zit'læ bwiagake' doxen ka gok.

⁵⁶ Na' ladje'ka' len María, ben' yell Magdálana', na' María beena' nak xna' Jacóbona' len Joséna', na' xna' ben'ka' nak xiin Zebedewa'.

Bkwash'gake' Jesúza'

(Mr. 15:42-47; Lc. 23:50-56; Jn. 19:38-42)

⁵⁷ Na' ka chzeles yela' bllin to ben' wni'a lie' José, beena' nak ben' yell Arimatea na' goke' txen Jesúza'. ⁵⁸ Na' wyaje' lao Pilátona' janabe' kwerp che Jesúza', na' Pilátona' bene' mandad biyoe'gake'ne'. ⁵⁹ Na' bikaa Joséna' kwerp che Jesúza' na' bitobe'ne' to lech' xtil. ⁶⁰ Na' jlo'ene' to loo ba kob dii zi' benschawee to lee yaj. Na'tech bdee to yaj xen cho'ayinna'. Na'ch bizee. ⁶¹ Na' María, ben' yell Magdálana', len Maríana' sto wche'gake' cho'a bana'.

Ben'ka' wdap cho'a ba che Jesúza'

⁶² Na' betiyo, llana' chombaan ben' Israelka', wyaj bxozka' chnabia' len fariseoka' lao Pilátona', ⁶³ che'gake'ne':

—Ben'do', ba jadininto' ka wna dii ben' wxiye'na' kana' mbane', wne' yiyon lla yibane'

dii yoblə ladj ben' wetka'. ⁶⁴ Na' bsel'gach ben' lljtape' gana' bkwash'gake'ne' axt ka gakch shon lla kwenche bi shaj ben'ka' nakgake'ne' txen do wal chel lljalejgake' kwerp che'na', na' tena' ye'gake' ben': "Ba bibane' dii yoblə ladj ben' wetka'." La' shi ba bengake' ka', na'ch gongake' to dii wxiye' walch aga ka dii necha'.

⁶⁵ Na'ch che' Pilátona' legake':

—Na' lle' soldadka', li wche'gake' kwenche gapgake'n axt ga zeelo gakgake'.

⁶⁶ Na'ch wyajlengake' soldadka' na' bsejchachgake' gana' da' yaja' nkwasha'n cho'a bana'. Na'ch bzoagake' soldadka' kwenche gapgake'n.

28

Biban Jesúza' ladj ben' wetka'

(Mr. 16:1-8; Lc. 24:1-12; Jn. 20:1-10)

¹ Na' ka wde lla sabda', llana' chombaangake', ni bal lla nech che xmanna' sto, wyaj María nool Magdálana', len Maríana' sto jawiagake' cho'a bana'. ² Na' wzolo to bedxo' xen wal daa betj to anjl che Xancho Chioza' yabana', na' ka blline' cho'a bana' na' bikwase' yaja' daa nsejan cho'a bana' na' wllie' lawinna'. ³ Na' anjla' chey cheeni'e kakzə ga chep yes na' xe'na' nakan xtil inlleb. ⁴ Na' ka ble'i soldadka' le' axt bxiztitgake' daa le bllibgake' na' axt witgake' shlet. ⁵ Na'ch che' anjla' noolka':

—Bi illeble. Nejid' Jesúzan' chiyiljle, beena' wit lee yag cruza'. ⁶ Koch no de ni. Ba bibane' kon ka wne'. Li dakachi wwiale gani wdixjgake'ne'. ⁷ Na' li yiyajdo li lljayell ben'ka' nakgake'ne' txen: "Ba

bibane' ladj beṅ' wetka' na' ba ziyaje' Galileana' lljaleze' le', na' na'kzə ile'ilene'." Na' ba wnia' le' ka'.

⁸ Na'ch biza'do noolka' cho'a bana' chllebgake' na' le chibagakile' zjadixje'gakile' beṅ'ka' nak Jesúza' txen daa goll anjla' legake'. ⁹ Na' ka ziyajgake', bli'lao Jesúza' legake' na' bwape' legake' chiox. Na' jabig'gake' kwite'na' na' wdel'gake' ṅi'ena' be'la'ogake'ne'. ¹⁰ Na' che' Jesúza' legake':

—Bi illeble. Li lljayell beṅ' bishaaka' shajgake' Galileana' na' ile'gakile' nad' na'.

Wxi' laxj soldadka' kwenche bi we'gake' dill' biban Jesúza'

¹¹ Na' ka biza' noolka', baḷ soldadka' wdap gana' bkwash'gake' Jesúza' biyajgake' yell Jerusalénna' jayellgake' bḫozka' chṅabia' yog' diika' gok.

¹² Na'ch wyaj bḫozka' chṅabia' je'lengake' beṅ' golka' chṅabia' dill' naklə ka gongake' daa goll soldadka' legake'. Na' ka biyoll be'gake' dillaa, na'ch be'gake' soldadka' mech xen, ¹³ che'gake':

—Inatezle wal chel shlak chesle, beṅ'ka' nak Jesúza' txen bidlejgake' kwerp che'na'. ¹⁴ Na' shi ba biṅezi Pilátona' dga, neto'kzə lljazajniinto'ne' nakan gok kwenche bibi gonile' le'.

¹⁵ Na'ch soldadka' beḫ'gake' mecha' na' biza'gake' jazegake'n dill' kon ka gollgake' legake'. Na' axt ṅaanlla beṅ' Israelka' ni nagake' ka'.

Jesúza' golle' legake' we'gake' xtilleena' doxen yellioni

(Mr. 16:14-18; Lc. 24:36-49; Jn. 20:19-23)

¹⁶ Na' wyaj beṅ'ka' shnej, beṅ'ka' nak Jesúza' txen, Galileana' kwenche yillaggake'

Jesúza' lo yaana' gana' golle' legake'. ¹⁷ Na' ka ble'gakile' Jesúza', be'la'ogake'ne', per balgake' gokchoplall'gake'. ¹⁸ Na'ch jabig' Jesúza' kwite'ka', chi'e legake':

—Ba non Chioza' lo na' inabi'a yabana' na' yell-lioni. ¹⁹ Daan, li shaj doxen yell-lioni, li lljali' lljasedi yog' ben' kwenche gakgake' nad' txen. Na' wchoale legake' nis daa ba nonlilall'gake' Xacho Chioza', na' nad', Xiine', len Espíritu Sántona'. ²⁰ Na' wli' wsedile legake' gongake' yog' diika' ba ben' mandad gonle. Na' nad' soalen' le' toshiizi axt ka te che yell-lioni.

**Dill' wen dill' Kob Che Jesucristona'
New Testament in Zapotec, Cajonos (MX:zad:Zapotec,
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
f98bf0c8-4467-559d-82ab-96644a44d38f